

Tuhun Nyoo Cha Tyaa San Lucas

Nu sacuhun ra Lucas noo tuhun chi ra Teófilo

¹⁻³ Cha chitón yoho Tata Teófilo, vatyi cha cuaha ñáyivi nducu ñu cuhva ta tyaa ñu nuu tutu tuhun cha cuvı nu nyicú ndi. Tyaa ñu tari maa cuhva nacatyı ñáyivi chi yo, ñáyivi cha nyehe ta cahán tuhun ra Jesús nya quıvi xihna ri. Ta vityin tahn tucu chi chi yuhu tyı sacote tuhun ra chuun. Vatyi cha yahá sacuahı ta nyehe vahi tandihı nya nu quichahá. Ta vityin ñańi ñańi ri cuatyai tuhun ra.

⁴ Vatyi coto vahun tyı ndicha cha sacotó ñáyivi chuun.

Nu sacotó noo ángel chi ra Zacarías ama cucacu ra Juan ra sacondutyá chi ñáyivi

⁵ Quıvi cha cuvı ra Herodes rey nicahnu Judea, chiyo noo tata sutu, chinańi ra Zacarías. Ta yihı ra cuenda ityi tata sutu cha chinańi Abías. Ta ñasihi ra chinańi ña Elisabet. Ta vachi ñu tata ra Aarón, ra chiyo ta cha naha.

⁶ Ta ñahri maa cuatyı ñu iyó nuu Nyoo. Vatyi vaha xaan quichahá ñu tuhun cahán Nyoo. Ta yori maa cuvı tyaa cuatyı siqui ñu.

⁷ Soco yori maa sehe ñu chicoo. Vatyi cu Elisabet, ña cuvı coo sehe ña. Ta sın ri nıduvi tahan ñu chahnu xaan ñu.

⁸ Ta noo quıvi tahan chi ityi cuenda ra Zacarías cha sacuvi ra tyiño nuu Nyoo.

⁹ Tari cuhva costumbre maa tata sutu, nyehe ra nya ra taħan chi nyatu chi. Ta taħan chi nyatu chi ra Zacarías cha quihvi ra chichi vehe ñuhu, vatyí cahmi ra cutu.

¹⁰ Cha ni ri ca cha ñohó ra chahmí ra cutu cuan, cuaha xaan ñáyivi chicán tahvi ñu ityi chata vehe.

¹¹ Yucuan ta tuví noo ángel cuenda Nyoo nuu ra Zacarías. Ta chicuinyaa ra chiyo vaha arta nu chahmí ra cutu.

¹² Ta cha nanyehe ra Zacarías chi ángel cuan, iyo xaan cuñi ra. Ta yuhvi xaan ra.

¹³ Soco ángel cuan catyí ra chi ra:

—Zacarías, ma yuhvun. Vatyí Nyoo chiñi ra tuhun cahún. Ta ñasihun cu Elisabet cucoo noo sehe ña. Ta Juan cusacunañun chi cue.

¹⁴ Sií xaan cucuvi chuun. Ta cuaha xaan ñu, cusii cuñi quivi cacu cue.

¹⁵ Vatyí sehun, cahnu xaan ra cucuvi ra nuu Nyoo. Ma coho ra vinu ta ni ndixi. Ta ñihi xaan cuquihí Tatyí Ii Nyoo chi ra nyata cumañi cacu ra ta tandihí tyembu cha coo ra.

¹⁶ Ta cuaha xaan ñáyivi Israel cunyicon chi Sutú yo Nyoo cha cuenda ra.

¹⁷ Ta cucoo tunyee iñi Nyoo chi ra. Ta cuquihí xaan Tatyí Ii Nyoo chi ra. Vatyí cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chi ñáyivi chihin sehe ñu. Ta cusañaha ra chi ñáyivi quiñi iyó na quichaha ñu tuhun cahán Nyoo. Tyícuan caa cusanduvaha ra chi ñáyivi ta cuatu tuhva ñu chi Nyoo —catyí ángel chi ra Zacarías.

¹⁸ Ta ndaca tuhun ra Zacarías chi ángel, ta catyí ra:

—¿Yoso caa ta cote noo cha ndicha vaha? Vatyí yuhu cha chahnu xain. Ta ñasihi cha chahnu xaan ña ñandihí —catyí ra.

¹⁹ Ta ángel cuan quichahá catyí ra:

—Yuhu Gabriel nañí. Ta chiqué tyiño Nyoo. Maa ra tachí chii vatyí cahin nuun ta sacote tuhun vaha ihya chuun.

²⁰ Ta vityin nduñihun. Vatyí ña chinó iñun tuhun cahín. Ta ma cuví cahun nyacua nya chino cava tuhun cahin chuhun —catyí ángel cuan chí ra.

²¹ Ta ñáyiví cha nyatú chi ra Zacarías ityi chata vehe, iyo xaan cuñí ñu ñáá tuhun cha cucuee xaan ra chichi vehe ñuhu.

²² Soco cuhva cha quitá ra Zacarías, ña cuví maa cahan ra chihin ñu. Tyicuan ta tuví iñi ñu vatyí iyó cha nyehe ra chichi vehe ñuhu cuan. Ta quichahá cahan ra chihin ñu chihin seña ri. Vatyí ña cuví cahan ra.

²³ Ta quiví cha ndihí tyiño saha ra Zacarías vehe ñuhu cuan, ta cuanuhu ra nya vehe ra.

²⁴ Ta cha yahá tuhun cuan chicoñon sehe ñasihi ra, cu Elisabet. Ta ña quitá maa ña chata vehe cha ni ri ca cha ohon yoo. Ta chicá xiñi ña:

²⁵ “Tyehe caa sacuví Sutu Mañi yuhu chihin, tacuhva ma cahan cuehe ca ñáyiví chii”, chicá xiñi ña.

Nu sacoto noo ángel chi cu María vatyí cucacu ra Jesús

²⁶ Nu cu iñu yoo cha ñohó sehe cu Elisabet, tachí Nyoo chí ángel Gabriel ñuu Nazaret ityi Galilea.

²⁷ Vatyí cucahan ra chihin noo ñaha tyivaa cha nañí María. Ta cha nyaña cha tandaha ña chihin

noo ra nañí José. Ta ra José cuan vachi ra tata rey David.

²⁸ Ta tuví ángel cuan nu nyaá ña. Ta quichaha catyi ra chi ña:

—Nocumi chuun, María. Ñihun tumañi iñi nuu Nyoo. Vatyí maa ra nyaá chuhun. Ta chi yoho nasocó xaan ca Nyoo nuu tandihí ca ñusihí —catyi ángel cuan chi ña.

²⁹ Ta cuhva cha chiñi ña cha cahān ra, iyo xaan cuñi ña tuhun cahān ra. Ta ndichí xiñi ña: “¿Ñáá tuhun cha chahā ra ihya nocumi chi yo tyicuan caa?” ndichí xiñi ña.

³⁰ Ta catyi ángel cuan:

—Ma yuhvun, María, vatyí ñihún tumañi iñi nuu Nyoo.

³¹ Vatyí cuacohon noo sehun. Ta sacunañun Jesús chi ra.

³² Cahnu xaan ra cuacuvi ra. Ta cunañi ra Sehe Nyoo ra cuvi nuu. Ta Nyoo Sutu Mañi yo cusacuvi ra rey chi ra. Tari cuví ra David, ra vachi ra tata.

³³ Vatyí cunyaca ñaha ra chi ñáyivi Israel tandihí maa tyembu. Ta ma ndihí maa cha cunyaca ñaha ra —catyi ángel cuan chi ña.

³⁴ Yucuan ta ndaca tuhun cu María chi ángel, ta catyi ña:

—¿Yoso caa cuahan tuhun ihya? Vatyí yuhu, ta coo ca yíi.

³⁵ Ta nacahān ángel ta catyi ra:

—Maa Tatyí Ii Nyoo cuquichi sícun. Ta tunyee iñi Nyoo cahnu cuquichi tari noo vico ta casi chi sícun. Yucuan chaha ra ii cha cucacu cunañi ra Sehe Nyoo.

³⁶ Tyicuan caa tucu cu Elisabet ñáyivi chuun. Cucacu noo sehe ña vasi cha chahnu ña. Ñaha cha catyi ñáyivi vatyi ña cuví maa coo sehe. Soco vityin cha ñohó sehe ña. Cha iñu yoo ñohó.

³⁷ Vatyí Nyoo ñahri cha ma cuvi sacuvi ra —catyi ángel chi ña.

³⁸ Ta quichaha catyi cu María:
—Yuhu cuví musu Sutu yo Nyoo. Na sacuvi maa ra yoso cuhva catyún —catyi ña.

Yucuan ta cuahan ángel cuan.

Cuahan cu María cuanyehe ña chi cu Elisabet

³⁹ Cuví noo quiivi cuan, numi xaan cuahan cu María noo ñuu ityi Judea nu maa ri maa yucu cuví.

⁴⁰ Ta quihvi ña chichi vehe ra Zacarías. Ta chaha ña nocumi chi cu Elisabet.

⁴¹ Cuhva cha chiñi cu Elisabet tuhun cahan cu María, natyoño cha lee cha ñohó chichi ña. Ta chitu ña chihin Tatyí Ii Nyoo.

⁴² Ta chaa nacahan ña, ta catyi ña:
—Nyoo sahá ra tumañi iñi chuun cha nuu tandihi ñusihí. Ta nasocó ra chi sehun.

⁴³ ¿Ta yóó ñaha cuví yuhu? Vatyí quichi sihi Sutu Mañi yo quichi nyehe ña nu nyai.

⁴⁴ Cuhva cha chiñi tuhun cahun, ta natyoño sehi cha ñohó chichi. Vatyí si xaan cuví chi ra.

⁴⁵ Ta si xaan cuñi añimon vatyi chinó iñun cha cuacuvi tuhun cahán Nyoo chuhun —catyi cu Elisabet.

⁴⁶ Ta quichaha catyi cu María:
—Sacahní chi Nyoo chihin tandihi añime.

⁴⁷ Ta si xaan cuví chii vatyi sacacú Nyoo añime.

- 48 Vatyí cuví yuhu noo ñaha ndahvi ta Nyoo t̃in cuenda ra chii. Ta vityin tandih̃i quiṽi cucatyí ñáyiṽi chii vatyí cahnu xaan tumañi iñi ñih̃i.
- 49 Vatyí Nyoo, cahnu xaan cuví ra. Ta cahnu cha sacuví ra chihin. Ta ii xaan siṽi ra.
- 50 Ta tyicuan ri ndahvi cuñí ra chi tandih̃i ñáyiṽi cha sahá ñáyiṽi chi ra.
- 51 Cahnu xaan cha sacuví ra chihin tunyee iñi iyó chi ra.
- Sanaá ra cuhva chicá xiñi ñu cahnu sahá chi.
- 52 Sanocueé ra chi ñu sacahnú chii. Ta ra cha ña cahnu sahá chii, sacucahnú ra chi ra.
- 53 Chahá Nyoo cha vaha chi ñu cuñí coto cha vaha,
- ñu chitó vatyí chiñuhú Nyoo chi. Soco ñu tyaỹi cha cuñí maa tyi ñahri chiñuhu chi, chihin nundaha nu nd̃i ñu, sacuhún ra chi ñu.
- 54 Tyinyeé ra chi ñáyiṽi Israel cha cuví musu ra. Ta ña naá iñi ra chi ñu. Nyehé ndahvi ra chi ñu.
- 55 Tari cuhva catyí Nyoo chi ra Abraham, sutu yo, ta chi sehe ra, tyicuan caa sacuví Nyoo tyicuan ri maa —catyí cu María.
- 56 Ta cu María ndoo ña chihin cu Elisabet uñi yoo. Ta cha yah̃a uñi yoo cuan ta cuanuh̃u ña nya vehe ña.

Quiṽi cac̃u ra Juan, ra cha sacondutyá

- 57 Ta chãa quiṽi cha cuacacu cha lee sehe cu Elisabet. Cac̃u cue ta raỹi cuví cue.
- 58 Ta cha chiñi ñáyiṽi cha nyicú yatyin yuvehe ña ta ñáyiṽi chi ña cha tyicuan caa, s̃i xaan cuví chi ñu. Ta s̃i xaan cuñí tucu maa ña. Vatyí vaha xaan cha sacuṽi Nyoo chihin ña.

⁵⁹ Ta nu cu uña quiví cha cacu cue, chahan ñu chihin cue vehe ñuhu. Vatyí cuhva cuenda ñu chi cue chi Nyoo. Ta saha ñu circuncidar chi cue tari cuhva iyó maa ñu. Chahnya ñu chiin ñi cue nu cuví cue rayi. Ta cuñí ñu sacunañi ñu Zacarías chi cue tari sutu cue.

⁶⁰ Soco sihi cue catyí ña:

—Ma cuvi. Juan, cunañi cue.

⁶¹ Ta quichaha catyí ñu:

—¿Ñáá tuhun sacunañún Juan chi cue? Yori ñáyivi chi ndo cha nañi tyicuan caa —catyí ñu.

⁶² Ta quichaha ndaca tuhun ñu chihin seña ri chi sutu cue. Vatyí coto ñu ñáá sivi cuñi ra cha cunañi cue.

⁶³ Ta chican sutu cue noo vitu, ta nuu vitu cuan tyaa ra tyehe caa: “Juan cuví sivi cue”, tyaa ra.

Ta tandihi maa ñu cuan iyo xaan cuñi ñu tuhun cuan.

⁶⁴ Ta nacañan ra Zacarías caa cuhva ri cuan. Ta quichaha sacahnu ra chi Nyoo.

⁶⁵ Tandihi maa ñu iyó yatyin ri yuvehe ñu, yuhví xaan ñu tuhun ihya. Ta tandihi maa ñáyivi cha iyó yucu ityi Judea cuan nacatyí ñu chi tahan ñu tuhun ihya.

⁶⁶ Ta tandihi maa ñáyivi cha chitó tuhun cuan, ndichi xiñi ñu, ta ndacañan tuhun ñu chi tahan ñu:

—¿Yóó ra cuví cha lee cuan? —catyí ñu.

Vatyí ndicha, Nyoo nasoco xaan ra chi cue.

Nu sacahnú ra Zacarías chi Nyoo

⁶⁷ Sutú cue, ra Zacarías, tyitú ra chihin Tatyí Ii Nyoo. Tyicuan ta quichaha cahan ra tuhun cha chahá Nyoo chi ra, ta catyí ra:

68 —Cahnu xaan ra cuví Sutu Mañi yo Nyoo cuenda yo ñu Israel.

Vatyi quichi ra nu nyicú yo, cha cuví yo ñáyivi chi ra.

Ta sacacu ra chi yo.

69 Ta chaha ra noo ra cahnu chi yo, cha cusacacu chi yo.

Tata ra David ra cha sacuvi tyiño nuu Nyoo vachi ra.

70 Tyicuan caa cahan Nyoo chihin yuhu ra cacuvi profeta cuenda ra ta cha naha.

71 Vatyi tyicuan caa cusacacu ra chi yo ndaha ra xaan iñi chi yo, ra cha tasi cuñi nyehé chi yo.

72 Tyicuan caa cundahvi cuñi nyehé ra chi ñáyivi chi yo ta cha naha.

Ta ma sanaa ra iñi ra tuhun cahan ra.

73 Ican ihya tuhun cahan Nyoo chihin ra Abraham sutu yo.

74 Catyí ra vatyi cusacacu ra chi yo ndaha ra xaan iñi chi yo.

Vatyi ma yuhvi ca yo sacahnu yo chi ra.

75 Ta maa ra sanducachi ra iyó yo nuu ra.

Ta vaha coo yo nuu ra tandihi quivi cha cuacoo yo ñáyivi —catyí ra Zacarías.

76 Ta catyí ra Zacarías chi cha lee cuan tyehe caa:

—Ta yoho sehi, profeta Nyoo cahnu cucatyí ñáyivi chuun.

Vatyi cuhun ityi nuu Sutu Mañi yo. ta cucahun tuhun ra chihin ñáyivi vatyi cha cuñi quichi ra.

77 Ta cusacoton chi ñáyivi vatyi cunasaha Nyoo tucahnu iñi cuatyí ñu.

Ta tyicuan caa ta cacu añima ñu.

⁷⁸ Vatyí Sutu yo Nyoo cuñí ra chí yo. Ta cundahvi cuñí ra chí yo.

Ta saquichí ra noo ra tyinyeé chí yo. Tari noo ñuhu ñanyii cucuvi ra.

⁷⁹ Vatyí chihin cha sañahá ra chí yo sacundichín ra nu nyicú yo nu ñaa ñni cha catyi cuatyí yo.

Ta cusañaha ra chí yo yoso caa quihvi yo ityi vaha —catyi ra Zacarías.

⁸⁰ Ta cha luhlu cuan cuahan chahnu ra. Nyee cuñí ra chihin Tatyí li Nyoo. Ta chicoo ra noo chiqui ndi nyacua nya quivi cha chicohon nuu ñáyivi Israel chí ra.

2

Quivi cacu ra Jesús (Mt. 1.18-25)

¹ Ta quivi cuan iyó noo ra nyacá ñaha, nañí ra Augusto. Tachi ra tyiño natyaa ra sivi tandihi ñáyivi nichahnu ñuhu ñáyivi.

² Ta quivi cuan ra Cirenio cuví ra ra nyacá ñaha tandihi ñuu ityi Siria.

³ Ta tahán chí cuhun tandihi ñáyivi nya ñuu ñu. Vatyí cuhva ñu sivi ñu yucuan.

⁴ Yucuan chaha quita ra José ñuu Nazaret ityi Galilea. Ta chahan ra ityi Judea ñuu Belén nu cacu ra David. Yucuan chahan ra vatyí tata ra David vachi ra.

⁵ Ta chahan ra chí cuhva ra sivi ra chihin cu María. Ta cha cuñí tandaha ña chihin ra. Ta ñohó sehe ña.

⁶ Ta chiquitahan chaa quivi cha cacu sehe ña cha ni ri ca cha ñohó ñu Belén cuan.

⁷ Ta yucuan cacu sehe nuu ña. Ta natyihí ña chi cue chichi sahma. Ta nandacun ña chi cue chichi noo nu chachí quiti. Vatyí cuaha xaan ñáyivi cha coyo ñuu cuan. Ta ña nuña ca ni minoo vehe nu cunyaa ñu.

Nu cahán ángel chihin ra sahá cumi mbee

⁸ Vatyin ñuu Belén cuan nyicú suhva ra casahá cumi mbee sana ra cha cha cuaa cuan.

⁹ Ta sana iñi ra ta tuví noo ángel Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan ra.

¹⁰ Ta quichaha cahán ángel cuan, ta catyí ra tyehe caa:

—Ma yuhvi ndo. Vatyí cuacatyí mai noo tuhun chi ndo. Noo tuhun cha sii xaan cuacuvi chi tandihi ñáyivi.

¹¹ Vatyí vityin cacu ra sacacú aña ndo ñuu ra David. Noo ra cuví Cristo, ra cuví Sutu Mañi yo.

¹² Ta ihya cuví seña chahi chi ndo, cunyehe ndo chi cha lee cuan, siqui noo cue sahma. Catuví cue chichi noo nu chachí quiti —catyí ángel chi ra casahá cumi mbee cuan.

¹³ Ta caa cuhva ri cuan cha coyo cuaha xaan ca ángel casacahnú ra chi Nyoo, ta cacatyí ra:

¹⁴ Sacahnu yo chi Nyoo nu nyaá ra gloria.

Ta ñáyivi iyó siqui ñuhu ñáyivi cha ñihi tumañi iñi ra, na coo taxi aña ñu, catyí angel cuan.

¹⁵ Yucuan ta cuanuh coyo ángel cuan gloria. Tyicuan ta ra casahá cumi mbee quichaha catyí ra chi ra tahan ra:

—Coho ndo Belén. Cunyehe yo ñáá cha cuvi.
Vatyí maa Sutu yo Nyoo sacoto chi yo.

¹⁶ Tyicuan ta numi xaan cuahan coyo ra Belén. Ta ñañihí ra chi cue chihin cu María ta ra José. Ta catuví cue noo nu chachí quiiti.

¹⁷ Ta yaha cha canyehe ra chi cue, ta canacatyí ra chi ñu ñáá ndihí tuhun cahan ángel chihin ra cuenda cha lee cuan.

¹⁸ Ta tandihí ñu chiñí tuhun cahan ra, iyo xaan cuñí ñu.

¹⁹ Soco cu María ta cuhva chicá ri xiñi ña tuhun cuan.

²⁰ Ta ra sahá cumi chi mbee cuan cuanuhu coyo ra. Ta casacahnú ra chi Nyoo cha cuenda cha cachiñí ra ta canyehe ra. Vatyí chinq cava tandihí cha catyí ángel chi ra.

Nu cuacuhva cuenda ñu chi ra Jesús chi Nyoo vehe ñuhu cahnu

²¹ Ta nu cu uña quivi, saha ñu circuncidar chi cue, tari cuhva tuhva maa ñu. Ta sacunañí ñu chi cue, Jesús. Suri maa sivi cha catyí ángel chi cu María quivi cha cumañi ca cohon sehe ña.

²² Ta cha yaha quivi cha taha chi vatyí ndundi ñu nuu Nyoo, tari cuhva catyí maa ley Nyoo cha tyaa ra Moisés, tyicuan ta cuahan ñu Jerusalén. Vatyí cuacuhva cuenda ñu chi cue chi Nyoo.

²³ Sacuvi ñu tyicuan caa vatyí ñn caa maa catyí ley tyehe caa: “Tandihí rayí cha cuví sehe nuu ñu, cucuhva cuenda ñu chi Nyoo”, catyí ley cuan.

²⁴ Ta chahan ñu chicuhva cuenda ñu uvi tahan quiiti tari cuhva catyí maa ley Sutu yo Nyoo nu catyí chi tyehe caa: “Cuhva ndo uvi tahan cucu o uvi tahan ndicuiya”, catyí ley cuan.

25 Ta quiví cuan iyó noo ra ñuu Jerusalén cha nañí Simeón. Ta cuví ra noo ra vaha, ra sacahnú chi Nyoo. Ta nyatú tuhva ra nya quiví cusacacu Nyoo chi ñáyiví Israel. Ta yihí ra Tatyí Ii Nyoo.

26 Ta sacotó Tatyí Ii Nyoo chi ra vatyí ma cúvi ra cha ni ri ca cha ta nyehe ca ra chi ra sacacú chi ñu Israel, ra cuví Cristo, ra cha cusaquichi Sutu yo Nyoo.

27 Ta ra cuan chahan ra vehe ñuhu cuhva catyí maa Tatyí Ii Nyoo chí ra. Cuhva cuan chahan tucu sutu ta síhi cha lee cuan chinyacá ñu chi cue vehe ñuhu cahnu, vatyí sacuvi ñu tari cuhva catyí maa ley.

28 Ta quehen ra Simeón chi ra Jesús. Ta tyihí sucun ndaha ra chi ra. Ta quichahá sacahnu ra chi Nyoo. Ta catyí ra:

29 —Sutu Mañi yuhu. Na cúvi mai vityin chihin cha vaha.

Vatyí cha sacuvun cha catyun chi yuhu cha cuví sehun.

30 Vatyí cha nyehí chihin nui chi ra cusacacu chi ndi.

31 Vatyí sañahun chi ra nuu tandíhi ñáyiví.

32 Cha catyí ra ta cucahnu ñáyiví Israel nuu inga ñáyiví.

Ta ican ra cuví ra cha sacundichín añaima tandíhi inga ñáyiví cha ñima ñu Israel cuví. Vatyí cusacuvi ra na cutuñi ñni ñu tuhun Nyoo —catyí ra Simeón.

33 Ta ra José chihin síhi ra Jesús, iyo xaan cuñi ñu cha chahan ra Simeón tuhun cha lee cuan.

34 Yucuan ta chicoñ tahvi ra Simeón chi Nyoo chaha ñu. Ta catyí ra chi cu María síhi ra Jesús:

—Nyehē chi cha lee ihya. Vatyī cuaha xaan ñáyivī cuchino iñi ñu chi ra quivī coto ñu tuhun ra, ta cucacu añima ñu. Soco cuaha ñu ma chino iñi ñu chi ra, ta cunaa ñu. Ta cucahan ñu chi ra.

³⁵ Ta cha tyicuan caa cusanatuvī ra cha caa añima noo noo ñáyivī. Soco cha cuenda yoho, María. tari cha uhvi cha yahá sava noo tyicaa añima ñáyivī, tyicuan caa cha uhvi cunyehún cha catyī cha lee ihya —catyí ra Simeón.

³⁶ Ta yucuan ñohó tucu noo ñaha cha cuvī profeta Nyoo. Ta cha chahnu xaan ña. Nañi ña Ana. Ta sehe ra Fanuel noo ra vachi tata ra Aser cuvī chi ña. Luhlu xaan ña ta tandaha ña, ta ucha ri cuiya chiyo ña chihin yñi ña ta chihī ri ra.

³⁷ Ta cha cumi xico cumi cuiya chihī yñi ña. Ta vehe ñuhu cahnu ña quitá ña, vatyī ndiyaca ta ñiyaca chicán tahvi ña chi Nyoo. Ta iyó cuhva cha ña chachī ña cha ni ri ca cha chicán tahvi ña.

³⁸ Ta cuhva cha ñohó ra José ta cu María chihin cha lee, chañ ña nu canyicú ñu. Ta nacuhva ña tyahvi nyoo chi Nyoo. Ta quichaha cahan ña tuhun ra Jesús chihin tandihī ñáyivī cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

³⁹ Cha yaha cha sacuvi ñu tandihī maa yoso caa catyí ley Sutu yo Nyoo, ta cuanuhu ñu nya Galilea nya ñuu ñu nu nañi Nazaret.

⁴⁰ Ta ra Jesús cuahan chahnu ca ra. Ta cuahan ndunyee ca ra ta cuahan chicoo ca cha chiñi tuñi Nyoo. Vatyī nasoco Nyoo chi ra.

Nu ñohó ra Jesús chichi vehe ñuhu

41 Ra José chihin sihi ra Jesús ndihi cuiya ri tuhva ñu chahán nya Jerusalén cha vico pascua.

42 Ta quivi ndihi ra Jesús uchi uvi cuiya, chahan tandihi ñu Jerusalén tari tuhvá maa ñu chahán cha vico.

43 Ta quivi ndihi vico ta cuandichi ñu, ta ra Jesús ndoo ra Jerusalén. Ta ña saha ñu cuenda.

44 Cuñi maa ñu vatyí cuandichi ra mahñu nu tuvi ñáyivi cuan. Yucuan chaha ñahri chicá iñi ñu chicá ityi ñu noo quivi. Tyicuan ta nanducu ñu chi ra chichi nu tuvi ñáyivi cuan,

45 ta ña nañihí ñu chi ra. Tyicuan ta cuanuhu chata ñu cuananducu ñu chi ra nya Jerusalén.

46 Cha yaha cha uñi quivi ta nañihí ñu chi ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahán ra. Ta ndacá tuhun ra tuhun chi ra.

47 Ta tandihi ñu chiñi tuhun cahán ra, iyo xaan cuñi ñu chihin cha chiñi tuñi ra, ta chihin tuhun cha nacahán ra.

48 Cuhva cha nanyehe sutu ra ta sihi ra chi ra, iyo xaan cuñi ñu. Ta sihi ra catyí ña chi ra:

—Sehe luhli. ¿Ñáá tuhun cha sacuvun chi ndi tyehe caa? Sutun ta yuhu chicá xaan iñi ndi ta nanducu xaan ndi chuun —catyí ña.

49 Tyicuan ta catyí ra Jesús:

—¿Ñáá tuhun cha nanducu ndo chii? ¿Atu ña chito ndo vatyí ñiñi cuñi chi cha cahin tuhun Suti chihin ñáyivi? —catyí ra.

50 Soco ña cutuñi iñi ñu tuhun cahan ra.

51 Tyicuan ta cuanuhu ra chihin ñu nya Nazaret. Ta quichahá ra tuhun cahán ñu. Ta sihi

ra naquehen vaha ña tandihí tuhun ihya chichi
añima ña.

⁵² Yucuan cuví nu cuacuahnu ca ra Jesús. Ta
cuahan chaa ca cha chiñi tuñi xiñi ra. Ta sñi xaan
cuví chi Nyoo chihin ra ta ñáyiví ñandihí.

3

*Ra Juan, ra sacondutya, cahán ra tuhun Nyoo nuu
ñáyiví*

(Mt. 3.1-12; Mr. 1.1-8; Jn. 1.19-28)

¹ Nu ndihí chahun cuiya cha cuví ra Tiberio rey
cahnu ñuu Roma, ta ityi Judea nyacá ñaha ra
Poncio Pilato. Ta ra Herodes nyacá ñaha ra
Galilea. Ta yañi ra, ra Felipe nyacá ñaha ra Iturea
chihin Traconite. Ta ra Lisaniás nyacá ñaha ra
Abilinia quiví cuan.

² Ta ra Anás chihin ra Caifás, ican ra cuví ra ra
cacuví nuu chi tandihí tata sutu. Ta quiví cuan
cahán Nyoo chihin ra Juan sehe ra Zacarías noo
nu chiqui ndii.

³ Ta ra Juan chicá noo ra tandihí ñuu cha nyaá
yatyin ri nu nyaá noo yuvi cahnu cha nañi Jordán
cahán ra tuhun Nyoo chihin ñáyiví. Ta catyí ra chi
ñu na ndu uvi iñi ñu cuatyí ñu ta na condutya ñu.
Tyicuan caa ta Nyoo saha ra tucahnu iñi chi ñu,
catyí ra.

⁴ Tyehe caa cuvi tari cuhva catyí nu libru cha
tyaa ra Isaías profeta Nyoo ta cha naha. Ta catyí
ra:

Chiñí yo cha caná chaa noo ra noo nu chiqui ndii,
ta catyí ra:

“Tari sanduvahá ndo noo ityi, tyicuan caa sanduvaha ndo añima ndo vatyí cuaquichi Sutu Mañi yo.

Nuña ndo noo ityi ndoo chi ra na quihvi ra añima ndo.

⁵ Tari cha sanandutú ndo noo ticoho, ta tari sandundaá ndo noo yucu cahnu, ta tari sandundoó ndo cha yacua, ta tari sanduvií ndo nu quiñi caa, tyicuan caa nasama ndo cuhva iyó ndo.

⁶ Tyicuan caa ta tandihí ñáyivi ta nyehe ñu vatyí Nyoo chaha ra cha cacú añima ñu.”

⁷ Ta tyicuan caa cahán ra Juan chihin ñáyivi. Yucuan ta cuhva cha chiñi ñu tuhun cahán ra, ta catyí ñu chi ra vatyí na sacondutya ra chi ñu. Yucuan ta quichaha catyí ra chi ñu:

—¡Nyoho tari noo tata coo xaan cuví ndo! ¿Yóó cha sañaha chi ndo vatyí chihin cha condutya ri ndo ta ma tachi tuñi ca Nyoo chi ndo?

⁸ Nasama ndo cuhva iyó ndo, na nyehe ñáyivi vatyí cha ndu uvi iñi ndo cuatyí ndo. Ta ma catyí ndo vatyí tata ra Abraham vachi ndo. Vatyí nyacua nya noo yuu ihya, Nyoo cuví sananduvi ra noo ñáyivi chi ra Abraham.

⁹ Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñi Nyoo. Ta yutun cha ña chaha chiti, cahnya ñáyivi chi tun. Ta cahmi ñu chi tun. Tyicuan caa tucu nyoho cha cuñi cuiri cahun ndo nu cayu ñuhu —catyí ra Juan.

¹⁰ Yucuan ta quichaha ndaca tuhun ñáyivi chi ra:

—¿Yoso caa sacuvi ndi, cuñi yoho? —catyí ñu.

¹¹ Ta nacahan ra Juan, ta catyí ra:

—Yóo ra cha iyó uvi tahan camisa, tahan chi cuhva ra noo chi ra cha ñahri chi. Ta yóo ñu cha iyó cha cachi, tahan chi cuhva ñu cha cachi ñu ñahri chi —catyí ra.

¹² Ta chaa coyo tucu suhva ra catavá xuhun cuenda gobiernu Roma, ta cuñí ra condutya ra. Ta candaca tuhun ra chi ra Juan:

—Maestro, ¿yoso caa sacuvi tucu nyuhu?
—catyí ra.

¹³ Ta catyí ra Juan chi ra:

—Tari cuhva catyí ley tava ndo xuhun. Ta ma tava ndo cuaha ca.

¹⁴ Yucuan ta quichaha candaca tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:

—Ma tinyaa ca ndo cha chii ñáyivi. Ta ma tyanaha ndo chi ñu. Ma tyaa ndo cuatyí siqui ñu tatu ñahri cuatyí ñu. Ta ndoo ndo vaha yoso cuhva yahvi ndo —catyí ra Juan.

¹⁵ Iyo cuñí ñáyivi tuhun cahán ra Juan. Ta cuñí ñu tyí ican ra cuví Cristo, ra cha sacacú chi yo.

¹⁶ Soco ra Juan catyí ra chi tandihi ñu:

—Cha ndicha vatyí sacondutyé chi ndo chihin ndutya. Soco cha yaha yuhu chihin cuquichi inga ra cusacondutya chi ndo chihin Tatyí Íi Nyoo ta chihin ñuhu. Iyó ca tunyee ñi chi maa ra, ta ñima ca yuhu. Vatyí ña nañé cha cuví musu ra ta ñiri cha ndachi ñi xityin ndichan ra.

¹⁷ Tari noo ra cha cuanaquehen vaha ñi, ta natyihí vaha ra chichi yaca. Ta cahmi ra mihin.

Tyticuan caa cuví maa Sutu Mañi yo chihin yo. Tatu chinó iñi yo chi ra, cunaquehen vaha ra chi yo, ta cunyicu yo chihin ra. Soco tatu ña chinó iñi yo chi ra cutyihi ra chi yo anyaya nu cayu ñuhũ cha ma ndahva ca maa —catyí ra Juan.

¹⁸ Ta tyehe caa cahan ra Juan chihin ñu. Ta cuaha xaan ca tuhun cahan ra nuu ñu tyi cuaquichi Sehe Nyoo ta cua sacacu ra chi yo.

¹⁹ Ta cahán ra Juan chi ra Herodes cha cuenda tandihí cuii cha ña vaha nyacuví ra. Vatyí naquehen ra chi cu Herodías, ñasihí ra Felipe yañi ra. Ta cuaha ca cha ña vaha nyacuví ra.

²⁰ Soco ra Herodes tahán chí cha tyasohó ra tuhun ihya soco ña cuñí ra. Nu ndihí tuhun tyihí ndihí ra chi ra Juan vehe caa.

Quívi cua condutya ra Jesucristo (Mt. 3.13-17; Mr. 1.9-11)

²¹ Cumañi ca cha cohon ra Juan vehe caa sacondutya ra chí tandihí ñáyívi. Ta sacondutya tucu ra chí ra Jesús. Ta cha ní ri ca cha chicán tahvi ra Jesús chí Nyoo ta nuña andívi.

²² Ta nyehe ra Tatyí li Nyoo quichí síqui ra tari noo paloma. Ta tyacu noo ndusu andívi cha catyí tyehe caa:

—Yoho cuvún Sehi cha cuñí. Ta sñi xaan cuñí chuhun —catyí ndusu cuan.

Ñáyívi vachi ra Jesucristo tata (Mt. 1.1-17)

²³ Oco uchi cuiya ra Jesús ta quichaha saha tyiño ra tyiño Nyoo. Ta tandihí ñáyívi cuñí maa ñu vatyí sehe ra José cuví chí ra. Ta ra José, sehe ra Elí cuví chí ra.

²⁴ Ta ra Elí, sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melqui cuví chi ra. Ta ra Melqui, sehe ra Jana cuví chi ra. Ta ra Jana, sehe ra José cuví chi ra.

²⁵ Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós, sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra.

²⁶ Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra. Ta ra Matatías, sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra.

²⁷ Ta ra Judá, sehe ra Joana cuví chi ra. Ta ra Joana, sehe ra Resa cuví chi ra. Ta ra Resa, sehe ra Zorobabel cuví chi ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra.

²⁸ Ta ra Neri, sehe ra Melqui cuví chi ra. Ta ra Melqui, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra.

²⁹ Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra.

³⁰ Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra. Ta ra José, sehe ra Jonán cuví chi ra. Ta ra Jonán, sehe ra Eliaquim cuví chi ra.

³¹ Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata,

sehe ra Natán cuví chi ra.

³² Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra.

³³ Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra.

³⁴ Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra.

³⁵ Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra.

³⁶ Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra.

³⁷ Ta ra Lamec, sehe ra Matusalén cuví chi ra. Ta ra Matusalén, sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra.

³⁸ Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe ra Nyoo cuví chi ra.

4

*Nu nducú nyehe cuihna chi ra Jesús
(Mt. 4.1-11; Mr. 1.12-13)*

¹ Ta chitú ra Jesús chihin Tatyí Ii Nyoo cha yaha condutya ra. Yucuan ta quitá ra nu cuví yuvi cahnu Jordán ta cuanuhu ra. Ta Tatyí Ii Nyoo chinyaca chi ra noo nu chiqui ndi.

² Yucuan chinyaa ra uvi xico quivi. Ta nducú nyehe cuihna chi ra. Ña chachi maa ra quivi cuan. Yaha cuan ta quichaha chisoco ra.

³ Yucuan ta quichaha catyí cuihna chi ra:
—Tatu ndicha cha Sehe Nyoo cuví chuun, catyí chi yuu cha catuví ihya, na nanduvi pan.

⁴ Ta ra Jesús nacahan ra, ta catyí ra:
—Catyí tuhun Nyoo tyi ñima chihin cha cachi ri ñáyivi ta conyito ñu. Soco conyitó tucu ñima ñu chihin tandihi tuhun cahán Nyoo —catyí ra Jesús chi cuihna.

⁵ Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañaha ra tandihi nu nyacá ñaha ñáyivi siqui ñuhu ñáyivi.

⁶ Ta cuihna catyí ra chi ra Jesús:
—Ndaha yuhu nyaá tandihi ñáyivi ihya. Vatyí chaha Nyoo cha cunyaca ñahi tandihi ihya siqui ñuhu ñáyivi. Ta cuví cuhve yóo chi cuñí mai cuhve.

⁷ Cuhve tandihi ñáyivi cuan chuun tatu yoho ta cuiñi chitun nui, ta sacahnun chii —catyí cuihna cuan chi ra Jesús.

⁸ Soco ra Jesús catyí ra chi cuihna:
—Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri

chi maa Nyoo sacahnu yo. Ta ñn ri chi maa ra quichaha yo.”

⁹ Yahā cuan ta quehen tucu cuihna cuan chi ra Jesús. Ta chinyacā ra chi ra nya ñuu Jerusalén. Ta sandaa ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuví chuun, sandupehla nyacua nya nu ñuhú.

¹⁰ Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹ Cunaquehen ra chuun chihin ndaha ra. Ta ma cuhva ra cha taxin chahun chihin yuu —catyí ra chi ra.

¹² Tyicuan ta nachañ ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chi Sutu Mañi yo Nyoo”, —catyí ra.

¹³ Ta cuihna ña cuví sandahvi ñaha ra chi ra Jesús. Ta cuahan ra suhva quivi.

Nu quichahā ra Jesús cahan ra tuhun Nyoo chihin ñáyivi

(Mt. 4.12-17; Mr. 1.14-15)

¹⁴ Cha yahā tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí Ii Nyoo. Ta cahan ñáyivi tuhun ra tandihí ri ityi.

¹⁵ Ta sañahá ra chi ñáyivi nu cuví vehe ñuhu tandihí ri ñuu. Ta tandihí ñu sacahnú ñu chi ra.

Nu nyaá ra Jesús Nazaret ñuu nu chahnū ra
(Mt. 13.53-58; Mr. 6.1-6)

¹⁶ Tyicuan ta nachaa ra Jesús nya Nazaret, ñuu nu chahnū ra. Ta noo quivi nyitatú ñáyivi, ta

quihv̄i ra chichi vehe ñuhu, tari tuhva maa ra. Ta chicunanyā ra vatyí cua sacuahā ra tuhun Nyoo.

17 Ta chahā ñu noo libru Nyoo chi ra cha tyā ra Isaías ra profeta Nyoo ta cha naha. Ta cuhva cha nuñā ra, nañih̄i ra noo nu catyí tyehe caa. Ta quichahā sacuahā ra:

18 Nyaá Tatyí Ii Nyoo chihin vatyí maa ra tach̄i chii.

Vatyí nacach̄i ra chii vatyí sañahi tuhun vaha ra chi tandih̄i ñáyiv̄i ndahvi.

Tach̄i ra chii vatyí sanduvahi chi ñu uhvi añima.

Tach̄i ra chii vatyí sacote tuhun ra chi ñu nyaá ndaha ra ña vaha, vatyí cusacacu Nyoo chi ñu.

Tach̄i ra chii vatyí sanyehi chi ñáyiv̄i cuaa.

Ta sacote chi ñu nyehe t̄ndoho vatyí cucacu ñu.

19 Ta sacote chi ñu vatyí cha chā quiv̄i cha chahā Nyoo tumañi iñi chi ñu.

20 Ndh̄i sacuahā ra ta nacas̄i ra nu libru cuan. Ta nacuhv̄a ra chi noo ra cha nyaá vehe ñuhu cuan. Ta chicunyā ra. Yucuan ta tandih̄i ñáyiv̄i cha nyicú cuan ndoo ñu nyehe ñu chi ra.

21 Yucuan ta quichaha catyí ra chi ñu:

—Vityin quiv̄i ihya chin̄o cava tuhun cha nyaá nu libru cha sacuah̄i nuu ndo —catyí ra Jesús chi ñu.

22 Tandih̄i ñu, vaha cahán ñu tuhun ra Jesús. Ta iyo cuñí ñu tuhun cha cahán ra vatyí vaha xaan cha cahán ra. Ta quichaha ndaca tuhun ñu chi tahan ñu:

—¿Atu ñima ra ihya cuví sehe ra José?

23 Ta quichaha catyí ra Jesús chi ñu:

—Chité cha nacacá iñi ndo. Vatyí tyehe caa cua catyí ndo chii: “Tatu ra sanduvahá cuvún, sanduvaha xihna ca chi maun. Tandihí cha chiñi ndi cha sacuvún ñuu Capernaum. Sacuvi tucu ñuu maun vityin.”

²⁴ Ta catyí tucu ra Jesús:

—Cha ndicha vatyí ni noo ra profeta Nyoo, ta ña quichaha ñáyivi ñuu ra chi ra.

²⁵ Ta cha ndicha catyí chi ndo vatyí cuaha xaan ñu chihí yí chiyó Israel ihya cuiya cha chica noo ra Elías. Ta cuiya cuan ña coon savi uñi cuiya sisava. Ta cuaha xaan tama chiyó.

²⁶ Soco ña tachí Nyoo chi ra Elías vatyí tyinyee ra chi ni noo ñu chihí yí Israel cuan. Soco tachí Nyoo chi ra nu nyaá noo ñaha chihí yí ñuu Sarepta cha nyaá yatyin ñuu Sidón.

²⁷ Ta tyicuan caa tucu cuaha ra yihí cuehe cha tyahyu coño chi chiyó Israel quivi chica noo ra Eliseo, profeta Nyoo. Soco ña nduvahá ni noo ra Israel cuiya cuan. Minoo ri ra Naamán ra ñuu Siria nduvahá —catyí ra Jesús.

²⁸ Ta cha chiñi ñáyivi nyicú vehe ñuhu cuan tuhun cuan, cuxaan xaan tandihí cuii ñu.

²⁹ Ta nducuita ñu. Ta tñn ñu chi ra Jesús. Tava ñu chi ra xiñi noo yucu nya yuhu ñuu, vatyí tuchi ñu chi ra yucuan.

³⁰ Soco ra Jesús yahá ri ra mahñu ñu ta cuahan ra.

*Noo ra cha yihí tatyí ña vaha chi
(Mr. 1.21-28)*

31 Ta cuahan ra Jesús Capernaum cha nyaa Galilea quiví nyitatú ñáyiví. Ta quichaha sañaha ra chi ñáyiví.

32 Ta iyo cuñí ñu tuhun cahán ra. Vatyí ñihi cahán ra tari noo ra iyó vaha ityi chi cha cahán.

33 Ta chichi vehe ñuhu cuan nyaá noo ra cha yihí tatyí ña vaha chi. Ta quichaha canachaa ra, ta catyí ra:

34 —Saña chi ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chi ndi? Yuhu, ñohó nui chuun. Ta chité vatyí Sehe Nyoo cuví chuun —catyí tatyí ña vaha cuan sacahan chi chi ra cuan.

35 Ta cahan ra Jesús chihin tatyí ña vaha cuan, ta catyí ra:

—Taxi ri. Saña chi ra ndahvi chiña —catyí ra.

Tyicuan ta tatyí ña vaha cuan sanduvá chi ra cuan nu ñuhú. Ta quita tatyí cuan chi ra ta cuahan. Ta ñahri ca sacuvi chi chi ra ndahvi cuan.

36 Tandihí ñáyiví nayuhví ñu. Ta quichaha catyí ñu chi tahan ñu:

—¿Ñáá túhun cuví ihya? Ra Jesús ihya chihin cha iyó ityi chi ra ta chihin tunyee iñi ta tachi ra chi tatyí ña vaha cuan na quita. Ta quichaha chi nu cahán ra —catyí ñu.

37 Ta tandihí ri ityi cahán ñáyiví tuhun ra Jesús.

Nu sanduvahá ra Jesús chi maha tyiso ra Simón Pedro

(Mt. 8.14-15; Mr. 1.29-31)

38 Ta quita ra Jesús chichi vehe ñuhu cuan. Ta chaá ra vehe ra Simón. Ta tyiso ra Simón cuhví ña chihin cahñi. Ta quichaha cahán ñu chihin ra Jesús cha cuenda ña.

39 Ta nanyehe noo ra nu catuví ña. Ta quichaha catyí ra chi cahñi cuan vatyi na quita. Ta caa cuhva ri cuan ta quita cahñi cuan chi ña. Ta nducuita ri ña. Ta quichaha tyiñuhu ña chi ra.

*Cuaha xaan ñu cuhví sanduvaha ra Jesús
(Mt. 8.16-17; Mr. 1.32-34)*

40 Ta cuhva cha quee ñanyii, tandihí maa ñu cha cumí chi ñu cuhví tandihí nuu cuehe, chinyaca ñu chi ra Jesús. Ta tyiso ra ndaha ra siqui noo noo ñu. Ta tyicuan caa ta sanduvaha ra chi ñu.

41 Ta chichi cha tandihí ñu yihí ñu cha yihí tatyí ña vaha chi, ta quita chi. Ta suri cana chaa chi cuahan coyo chí, ta catyí chi:

—Yoho Sehe Nyoo cuví chuun —catyí chi.

Soco ña chaha ca ra Jesús cha cahan chi. Vatyi chitó chi vatyi ra Cristo, ra cha saquichí Nyoo cuví ra.

*Nu cahán ra Jesús tuhun Nyoo nuu tandihí cuii
ñáyivi ñuu cha iyó Galilea
(Mr. 1.35-39)*

42 Cundichin cuan ta quita ra Jesús ñuu cuan. Ta cuahan ra noo nu taxi ri iyó. Soco ñáyivi nanducu ñu chi ra. Ta chaa ñu nya nu ñohó ra. Ta ña cuñí ñu cha cuhun ra.

43 Soco catyí ra Jesús chi ñu:

—Cumañi sacote chi ñáyivi inga ñuu tuhun vaha yoso caa nyacá ñaha Nyoo aña ñu. Vatyi yucuan chaha vachi siqui ñuhu ñayivi.

44 Ta tyicuan caa chicá noo ra Jesús cahán ra tuhun Nyoo vehe ñuhu ityi Galilea.

5

Nu chahq̄ ra Jesús noo nyatu cha ñihi ra cuaha xaan tiyaca

(Mt. 4.18-22; Mr. 1.16-20)

¹ Noo quiv̄i nyaá ra Jesús yuhu miñi nu cuv̄i Genesaret. Ta chaq̄ coyo cuaha xaan ñáyiv̄i, vatyi cuñi ñu cuiñi ñu tuhun Nyoo. Ta tih̄in xaan ñohó ra Jesús mahñu ñu.

² Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyi cha quit̄a coyo ra cat̄in tiyaca cuan. Ta cha quichaha canacatyā ra yuhva ra.

³ Yucuan ta quihv̄i ra Jesús chichi noo canoa cuan. Ta canoa cuan chi ra Simón cuv̄i. Ta catȳi ra chi ra vatyi na tyandaha ra suhva ca cahun nya mahñu ca cuan. Tyicuan ta chicunyaā ra Jesús chichi canoa cuan. Ta quichaha sañaha ra chi ñáyiv̄i.

⁴ Cuhva cha ndih̄i cahan ra, catȳi ra chi ra Simón:

—S̄acuhun canoa nya nu cama ca ndutya cuan. Ta t̄uchi ndo yuhva vatyi t̄in ndo tiyaca —catȳi ra Jesús chi ra.

⁵ Ta nacahan ra Simón ta catȳi ra:

—Maestro, cha saha tyiño xaan ndi ñiyaca maa ta ni noo tiyaca ña ñih̄i ndi. Soco tatu maun catȳi, cuatuchi tucu ndi yuhva —catȳi ra Simón.

⁶ Cuhva cha cacañ̄i ra yuhva cuan, cuaha xaan tiyaca ñih̄i ra. Ta nyacua tahnya yuhva ra chihin cha vee ti.

⁷ Tyicuan ta cachaha ra seña chi ra tahan ra, ra cha canyicú chichi inga canoa cuan, na quichi

coyo ra ta tyinyee ra chi ra. Yucuan ta chaꝯ coyo ra cuan. Ta casacutu ra n̄nduvi canoa cuan chihin tiyaca. Ta nyacua cuñí nyee canoa cuan cha tyitu yihí tiyaca.

⁸ Cha nanyehe ra Simón Pedro cha tyicuan caa, ta chicuiñi chiti ra nuu ra Jesús. Ta catyí ra chi ra:

—Cuꝯchiyo chuun nui, Sutu Mañi yuhu, vatyi yuhu ra iyó cuatyi cuví —catyí ra.

⁹ Vatyi ra Simón iyo xaan cuñi ra chihin tandihi ra canyicu chihin ra. Vatyi cuaha xaan tiyaca catiñ ra.

¹⁰ Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñí ra. Ta catyí ra Jesús chi ra Simón:

—Ma iyo xaan cuñun. Vatyi vityin ta nu cuahan ca chi quivi, ma t̄in con tiyaca. Soco cunducun ñáyivi, tavon chi ñu nu quiñi caa na quihvi ñu cuenda Nyoo —catyí ra Jesús chi ra Simón.

¹¹ Yucuan ta casacunuhu ra canoa nya ñuhu ityi. Ta casandoꝯ ra tandihi cha iyó chi ra nyacua nya tiyaca cha t̄in ra. Ta cuahan ra chihin ra Jesús.

Nu sanduvaha ra Jesús chi noo ra tyahyu coño (Mt. 8.1-4; Mr. 1.40-45)

¹² Noo quivi ñohó ra Jesús noo ñuu nu iyo noo ra cuhvi. Ta tyahyu xaan coño ra. Ta cha nanyehe ra chi ra Jesús, ta chicuiñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñún, cuví sanduvahun chii —catyí ra.

13 Tyicuan ta tyisoꝛa ra Jesús ndaha ra siqui ra. Ta catyí ra:

—Cuñí sanduvahi chuun. Ta na nduvahun vityin ri —catyí ra Jesús chi ra.

Ta caa cuhva ri cuan ta nduvahaꝛa ra cuan.

14 Tyicuan ta catyí ra Jesús chi ra:

—Ma nacatyun chi ñáyivi. Noo ri catyí chuun, cuahan nu nyaá tata sutu. Ta sañahun chuun chi ra. Ta cuhva cuendon cha tahán chi cuhvon tari cuhva catyí nu ley ra Moisés tacuhva coto ñáyivi vatyí nduvahun —catyí ra Jesús chi ra.

15 Vasi ña cuñí ra cha coto ñáyivi, soco cuaha ca ñáyivi ñihi ñu tuhun ra. Ta cuaha xaan ñáyivi ndu in ri ñu, vatyí cuñí ñu cuiñi ñu tuhun cahán ra. Ta cuñí xaan ñu nduvaha ñu.

16 Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chicán tahvi ra chi Nyoo.

Nu sanduvahaꝛa Jesús chi noo ra cuhvi cha ña cuví nacanda
(Mt. 9.1-8; Mr. 2.1-12)

17 Noo quivi sañahá ra Jesús chi ñáyivi. Ta chicunycú suhva ra fariseo, ra quichahá xaan ley vehe ñuhu cha tyaaꝛa ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichiꝛa coyo ra ñuu cha iyó Galilea, ta ñuu Jerusalén, ta tandihí ca ñuu cha iyó Judea. Ta iyó xaan tunyee iñi Nyoo chi ra Jesús, tacuhva vatyí sanduvaha ra chi ñu cuhvi.

18 Yucuan ta chaꝛa coyo ra canyisó chihin noo chito chi noo ra ña cuví nacanda. Ta cuñí ra quihvi ra chichi vehe ta cacun ra chi ra nuu ra Jesús.

19 Soco ña cuví quihví ra vatyí tuví xaan ñáyivi. Tyicuan ta candaá ra ityi xiñi vehe. Ta sacuachiyo ra suhva tyiyo. Tyicuan ta sanoo ra chi ra cuhví cuan maa maa nuu ra Jesús mahñu nu tuví ñáyivi cuan.

20 Yucuan cuví nu nyehe ra Jesús vatyí cachinó xaan iñi ra chi ra. Ta quichaha catyí ra chi ra cuan:

—Xaa, cha chicoo ticahnu iñi tandihí cuatyun —catyí ra Jesús.

21 Tyicuan ta ra casacuahá cuenda ley vehe ñuhu chihin ra fariseo quichaha nacuaan iñi ra: “¿Yóo ra cuví ra ihya? Vatyí cuñí maa ra vatyí cuví saha ra ticahnu iñi cuatyí yo. Noo ri maa Nyoo cuví saha ra ticahnu iñi cuatyí yo”, ndichi xiñi ra.

22 Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa?

23-24 ¿Ñáá cha yí ca catyí yo? ¿Atu yí ca catyí yo: “Cuatyun cha yaha ndachi”, o yí ca catyí yo chi noo ñáyivi: “Ndícuíta ta cacon”? Soco vityin cua sañahi chi ndo vatyí iyó ityi chii cha sahi ticahnu iñi cuatyí. Vatyí yuhu Rayí cha quichi nya gloria cuví. Ta vityin cua sanduvahi chi ra ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndícuíta. Naquehen chiton ta cuanuhu nya vehun.

25 Ta caa cuhva ri cuan nducuíta ra cha cuhví cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo.

26 Tandihí ñáyivi iyo xaan cuñí ñu. Ta yuhví xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

*Nu cana ra Jesús chi ra Leví
(Mt. 9.9-13; Mr. 2.13-17)*

27 Yahā cuan ta quitā ra Jesús vehe cuan. Ta nanyehē ra chi noo ra cha tavá xuhun cuenda gobiernu ñuu Roma. Ta nañí ra Leví. Ta nyaá ra nu tyiyahví ñáyivi. Ta catyí ra Jesús chi ra:

—Coho chihin —catyí ra.

28 Tyicuan ta nducuitā ra Leví. Ta sandoo ra tandihí cha iyó chi ra. Ta cuahan ra chata ra Jesús.

29 Tyicuan ta savahā ra Leví noo vico cahnu vehe ra cuenda ra Jesús. Ta cuaha vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyivi.

30 Soco ra fariseo chihin ra sacuahá ley vehe ñuhu quichaha cahan nyaa ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá xuhun ta chihin ra cahnu cuatyí? —catyí ra.

31 Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chi.

32 Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyí iyó cuatyí, vatyí tacuhva nasama ñu cuhva iyó ñu —catyí ra Jesús chi ra.

Nu sañahá ra Jesús vatyí cha yaha canyaha ra chi ñu nyicón chi ra, cusavaha ñu ayuno (Mt. 9.14-15; Mr. 2.18-20)

³³ Tyicuan ta quichaha candaca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quívi maa chachi ra ta chihi ra. ¿Ñáá tuhun? —catyí ra.

³⁴ Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuvi. Vatyí sñi cuñí ñu, ta cuñí ñu cachi ñu.

³⁵ Soco cuhaa quívi cuachiyo ra tandaha cuan nu nyicú ñu. Yucuan ndicha quívi, ta cusaha ñu ayunar.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra (Mt. 9.16-17; Mr. 2.21-22)

³⁶ Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyí tatu sacuvi ñu tyicuan caa, cundiyyi sahma chaa cuan. Ta sñi ri ma cuhva chi chihin sahma chahnu cuan.

³⁷ Ta tyicuan caa tucu ma cuvi tyihi ñáyivi vinu chaa chíchi ñi chahnu. Vatyí cutahnya ñi cuan chihin vinu chaa cuan. Ta tiví vinu cuan ta tiví ñi chahnu cuan ñandihi.

³⁸ Yucuan chaha tahán chi tyihi yo vinu chaa chichi ñi chaa. Vatyí tyicuan ta nĩduvi ta saha cuenda chi tahan.

³⁹ Ta yori ñu chihi vinu chahnu, ta cuñí ñu coho ñu cha chaa. Vatyí catyí ñu, vaha ca vinu chahnu. Cuñí ca ñu vinu chahnu cuan vatyí ican cuan cuví costumbre cha iyó maa ñu.

6

Tohon ra cachicá noo chihin ra Jesús yoco trigu quiví nyitatu ñáyiví
(Mt. 12.1-8; Mr. 2.23-28)

¹ Noo quiví cha nyitatu ñáyiví, yahá ra Jesús mahñu cha tachi ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chiti cuan.

² Tyicuan ta catyí suhva ra fariseo chi ra:

—¿Ñáá tuhun cha sacuví ndo noo tyiño cha ña tahán chi sacuvi yo quiví nyitatu yo?

³ Ta nacahan ra Jesús, ta catyí ra:

—¿Atu ta sacuaha ca ndo cha sacuví ra David chihin ra tahan ra quiví cha chisoco ra?

⁴ Quihví ra chichi vehe Nyoo. Ta quehen ra pan cha chacun ñáyiví nuu Nyoo. Ta chachi ra. Ta chaha ra chi ra candihí chihin ra. Ta maa ri maa tata sutu tahán chi cachi pan cuan —catyí ra Jesús.

⁵ Yucuan ta catyí tucu ra Jesús:

—Yuhu cuví Rayi cha quichí nya gloria. Ta iyó ityi chii vatyí catyí chi noo noo ndo ñáá cha sacuvi ndo quiví nyitatu yo —catyí ra.

*Nu sanduvaha ra Jesús chi noo ra cha ityi ndaha
(Mt. 12.9-14; Mr. 3.1-6)*

⁶ Inga qui^{vi} cha nyitatu ñáy^{vi}, qui^{hvi} ra Jesús chichi vehe ñuhu. Ta quichaha sañaha ra chi ñáy^{vi}. Ta yucuan nanyehē ra chi noo ra cha na ityi chiyo ndaha vaha.

⁷ Ta ra casacuaha cuenda ley chihin ra fariseo, canducú nyehe ra chi ra Jesús, tatu sanduvaha ra chi ra cuhví cuan qui^{vi} nyitatu ñu. Tyicuan caa ta cuvi tyaa ra cuatyí siqui ra.

⁸ Soco ra Jesús chitó ra tuhun chicá xiñi ra. Ta catyí ra chi ra cha ityi ndaha cuan:

—Ndūcuita. Ta cuinanyaun mahñu ihya.

Tyicuan ta ra cha ityi ndaha cuan nducuita ra. Ta chicunanyaq̄ ra mahñu.

⁹ Tyicuan ta catyí ra Jesús chi ra canyicú cuan:

—Cua nducu tuhin noo tuhun chi ndo. ¿Yoso caa cuhva tahán chi cha sacuvi yo qui^{vi} nyitatu yo? ¿Atu tahán chi vatyí sacuvi yo cha vaha, o cha ña vaha? ¿Atu tahán chi vatyí sacacu yo chi ñáy^{vi}, o cha cahñi ndihí yo chi ñu?

¹⁰ Tyicuan ta ra Jesús nanyehē ra chi noo noo ra canyicú cuan. Ta quichaha catyí ra chi ra cuhví cuan:

—Sanacaa ndahun.

Tyicuan ta ra cuhví cuan sanacaq̄ ra ndaha ra. Ta nduvaha ndaha ra.

¹¹ Soco suhva ra canyicú cuan, cuxaḡn xaan ra. Ta quichaha candaca tuhun ra chi ra tahan ra:

—¿Yoso caa sacuví yo tacuhva cha ma cuvi ca cahan ra Jesús nuu ñáy^{vi}? —cacatyí ra.

Nacachi ra Jesús ndi uchi uvi tahan ra tyi caca ra tyiño ra

(Mt. 10.1-4; Mr. 3.13-19)

¹² Qui^vi cuan ndaa ra Jesús noo yucu. Ta ñiyaca maa chicán tahvi ra chi Nyoo.

¹³ Cuhva cha cundichin, cana ra chi tandihⁱ ri ñu nyicón chi ra. Ta nacachi ra uchi uvi tahan ri ra. Ta sacunañi ra chi ra, apóstol ra, ta cuñi chi catyí, ra caca tyiño nuu ra.

¹⁴ Ta ihya nyaá sivi ndi uchi uvi tahan ra: Ra Simón ra cha sacunañi ra Cristo Pedro chi, ta yañi ra, ra Andrés, ta ra Jacobo, ra Juan, ra Felipe, ra Bartolomé,

¹⁵ ra Mateo, ra Tomás, ra Jacobo sehe ra Alfeo, ta ra Simón ra yihⁱ cuenda ityi ra cacuñi cuhun cuatyí siqui gobiernu ñuu Roma cha nyacá ñaha chi ñu.

¹⁶ Ta ra Judas, yañi ra Jacobo, ta ra Judas Iscariote, ra cha naxico tuhun chi ra Jesús.

Nu sañahá ra Jesús chi cuaha xaan ñáyivi

(Mt. 4.23-25)

¹⁷ Noo ra Jesús yucu cuan chihin ndi uchi uvi tahan ra. Ta chicutayucu ra nu ndaa cuan chihin ñu nyicón chi ra. Ta cuaha ri ityi quita coyo ñáyivi. Quita coyo ñu ñuu Jerusalén ta tandihⁱ ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta chaa ñáyivi cuan vatyí cuiñi ñu tuhun cahán ra Jesús. Ta tandihⁱ ñu cuhví cuñi ñu vatyí sanduvaha ra chi ñu.

¹⁸ Ta tandihⁱ ñu cha yihⁱ tatyí ña vaha chi, nduvaha ñu saha ra.

19 Ta tandihí ñu cuñí ñu t̃in ñu chi ra. Vatyí nduvaha ñu chihin tunyee iñi Nyoo, vasi tacuhva t̃in ri ñu chi ra.

*Ñu ñihí tumañi iñi, ta ñu ña ñihí tumañi iñi
(Mt. 5.1-12)*

20 Tyicuan ta nanyehe ra Jesús chi ra cachicá noo chihin ra. Ta quichaha catyí ra chi ra:

—Tandihí nyoho cha ndahvi ndo, s̃i xaan cuví chi ndo, vatyí tahán chi cha cunyaca ñaha Nyoo aña ndo.

21 Tandihí nyoho cha chisocó ndo vityin, s̃i xaan cuví chi ndo. Vatyí coo quiví cha ma nyehe ca ndo soco. Tandihí nyoho cha chacú chaa ndo cha cuihya iñi ndo, s̃i xaan cuví chi ndo vatyí coo quiví ta ñahri ca tucuihya iñi coo chi ndo. Ta cuacu ndo chihin cha s̃i cuñi ndo.

22 S̃i xaan cucuvi chi ndo, quiví cha tasi cuñí ñáyivi nyehé ñu chi ndo, quiví tavá ñehe ñu chi ndo nu nyaá ñu, quiví cahán ñu chi ndo, quiví catyí ñu vatyí ñáyivi ña vaha cuví ndo vatyí chinó iñi ndo chi yuhu Rayi cha quichí nya gloria.

23 S̃i xaan cucuvi chi ndo quiví nyehe ndo t̃indoho cuan vatyí tyicuan caa tucu sacuvi ñáyivi ta cha naha. Cahān vavaha ñu chi ra cacuvi profeta Nyoo. Caña ndava ndo chihin cha s̃i cuñí ndo. Vatyí cahnu xaan cha cucuhva Nyoo chi ndo gloria.

24 Soco ndahvi nyoho, ñu tyayí. Vatyí vityin s̃i xaan cuñí ndo chihin tandihí cha tyayí ndo. Soco coo quiví maa maa ri t̃indoho cunyehe ndo. Vatyí ñahri cuñihi ndo nuu Nyoo.

25 Ta ndahvi nyoho cha cuñí maa ndo vatyí ñahri cumañí chi ndo cha vityin, vatyí coo quiví

cunyehe ndo soco. Nyoho cha s̄i cuñí ndo cha vityin, ndahvi nyoho vatyí coo quiví cunyehe ndo tucuihya iñi. Ta cuacu chaa ndo.

²⁶ Ta ndahvi nyoho vatyí vaha cahán ñáyiví siquí ndo. Vatyí tyicuan caa tucu ñáyiví ta cha naha, vaha xaan cahán ñu siquí ra cha cahán cha ña ndicha.

Cuñi ndo chi ñu xaan iñi chi ndo
(Mt. 5.38-48; 7.12)

²⁷ Tandihí nyoho cha chiñí ndo tuhun cahín, catyí chi ndo tyehe caa: Cuñi ndo chi ñu xaan iñi chi ndo. Sacuvi ndo cha vaha chihin ñu cha tasí cuñi nyehe chi ndo.

²⁸ Cahán ndo cha vaha chihin ñu cha cahán ña vaha siquí ndo. Cacan tahvi ndo chaha ñu cahán chi ndo.

²⁹ Tatu yóo cha cañi inchiyo nuu ndo, cuhva tucu ndo inga chiyo nacañi maa ñu. Tatu yóo cha tinyaa chaqueta ñihno ndo, cuhva ndihí ndo camiseta ndo.

³⁰ Cuhva ndo ñáá ndihí cha chicán ñu chi ndo. Tatu tinyaa ñu ñáá cha iyó chi ndo, ma ndacan ndo chi ñu.

³¹ Tari cuhva cuñí ndo cha sacuvi ñáyiví cha vaha chihin ndo, tyicuan caa sacuvi ndo cha vaha chihin ñu.

³² Tatu cuñí ndo chi maa ri maa ñu cha cuñí chi ndo, ñahri cha vaha xaan sacuví ndo. Vatyí tyicuan caa nyacuví tucu ñu quiñi iyó, cuñí ñu chi ñáyiví ñohó nuu ri ñu.

³³ O tatu sacuví ndo cha vaha chihin ñu cha sacuví cha vaha chihin ndo, ñahri cha vaha xaan nyacuví ndo. Vatyí tyicuan caa nyacuví tucu ñu quiñi iyó.

³⁴ O tatu sacuví ndo tumañi iñi chi noo ñáyivi, ta yihí iñi ndo vatyi cusacuvi tucu ñu cuan tumañi iñi chi ndo, ñahri cha vaha nyacuví ndo. Vatyi tyicuan caa nyacuví tucu ñu quiñi iyó. Tatu ñáá noo tumañi iñi sacuví ñu chi tahan ñu, nyatú ñu cha nacuhva tucu ñu cuan tumañi iñi chi ñu.

³⁵ Soco nyoho, cuñi ndo chi ñu xaan iñi chi ndo. Ta sacuvi ndo cha vaha chi ñu. Ta cuhva noo ndo chi ñu. Soco ma cuatu ndo ñáá tumañi iñi cunacuhva ñu chi ndo. Tyicuan ta cahnu xaan cha cuñihi ndo nuu Nyoo ta cucuvi ndo sehe vaha Nyoo cahnu. Vatyi Nyoo vaha ñáyivi cuví ra chihin ñu cha ña nacuhva tyahvi nyoo chi ra ta chihin ñu quiñi iyó.

³⁶ Vaha ñáyivi cuvi ndo chihin ñáyivi, tari maa Nyoo Sutu yo, vaha ñáyivi cuví ra chihin ndo.

*Ma cahan yo cha caa inga tahan yo
(Mt. 7.1-5)*

³⁷ Ma cahan ndo cha caá tahan ndo, tyicuan ta Nyoo ma tiin cuenda ra cha caá maa ndo. Ma soco ndo chi ñáyivi cha cuhun ñu anyaya, tyicuan ta ma sacuhun Nyoo chi ndo anyaya. Saha ndo tucahnu iñi chi ñáyivi. Ta Nyoo cusaha ra tucahnu iñi chi maa ndo.

³⁸ Cuhva ndo cha chiñuhú chi ñáyivi. Ta tyicuan caa cuhva tucu maa Nyoo cha chiñuhú chi maa ndo. Noo ñáyivi vaha, tatu xicó ñu ñáá cha xicó ñu chi ndo, tyitu maa chahá ñu chi ndo, tyicuan caa tucu cuhva Nyoo chi ndo. Vatyi tari cuhva cuhva ndo chi ñáyivi, tyicuan caa cuhva cuhva Nyoo chi ndo —catyí ra Jesús.

³⁹ Ta chahá ra Jesús cuhva ihya chi ñu, ta catyí ra:

—Noo ra cuaa ña cuví sañaha ra ityi chi nonga ra cuaa. Vatyí nĩnduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa tucu noo ra ña chitó ityi Nyoo, vasi cuñí ra, soco ma cuvi sañaha ra ityi Nyoo chi nonga ra.

⁴⁰ Ni noo ra cuatyaa sicuela ma cuvi coto ra cha chitó ra cha sañaha chi ra. Vatyí nicaa ni quichaha sacuahá ra. Coto ra soco nya ndihí sacuahá ra.

⁴¹ ¿Yoso caa tyi nyehún cuatyí luhlu cha cuví tari mihin lee ri cha yihí chiti nuu tahun, ta ña sahan cuenda cuatyí cahnu cha iyó chuun cha cuví tari vitu cahnu cha yihí nuu maun?

⁴² Tatu chiti nuu maun yihí noo vitu cahnu, yoso caa cuví catyun chi ra yañun: “Nyaca, natave mihin lee cha yihí chiti nuun.” ¡Yoho cha savahún chuun! Tava xihna vitu cahnu cha yihí chiti nuun. Tyicuan ta cuví nyehe vahun mihin lee cha cutavon chiti nuu yañun.

Chihin cha sacuví ñáyivi ta nicohon nuu ri yo chi ñu tatu ñu vaha, o ñu ña vaha cuví ñu (Mt. 7.17-20; 12.34-35)

⁴³ 'Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha.

⁴⁴ Tandihí yutun nicohon nuu yo chi tun chihin chiti ri tun. Vatyí tuñiyaca, ma cuhva tun mangu. Ta ni ri noo iñu nduhva ma cuhva tun tichaha ndivi.

⁴⁵ Ta tyicuan caa tandihí ñáyivi vaha, tuhun vaha cahán ñu. Vatyí yihí cha vaha añima ñu. Soco ñáyivi ña vaha, maa maa ri maa tuhun ña vaha

cahán ñu. Vatyí yihí cha caquiñi aña ñu. Chihin yuhu ñu cahán ñu tandihí cha quiñi caa cha quitá aña ñu.

Cacu aña ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu (Mt. 7.24-27)

⁴⁶ ¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuvi ndo tari cuhva cha catyí chi ndo?

⁴⁷ Ihya cua catyí chi ndo yóó chi ndacu nyoho cha vachi ndo nu nyaí, ta tyasohó ndo cha cahín, ta sacuví ndo cha catyí.

⁴⁸ Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta siqui yuu cuan savahá ra vehe ra. Ta quiñi coon xaan savi, ta cama xaan ndutya yahá, ta ña nduva vehe cuan vatyí siqui yuu nanyaá chi.

⁴⁹ Soco ñu cha chiñi tuhun cahín ta ña sacuví ñu tari cuhva catyí, cuví ñu tari minoo ra ña chitó savaha vehe. Vatyí ña chatyá ra nu quiñi chaha vehe ra. Ta ñima nu yuu savaha ra vehe ra. Ta chaa quiñi cha coon savi. Cama xaan ndutya yaha. Ta chatya chi chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyivi, tatu sacuví ñu tari cuhva catyí, tyicuan ta cacu ñu. Soco tatu ma sacuvi ñu, ma cacu ñu) —catyí ra Jesús.

7

Nu sanduvaha ra Jesús noo musu capitán sindaro (Mt. 8.5-13)

¹ Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum.

² Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñí vavaha ra. Ta cuhví ra. Ta cha cuñí cúvi ra.

³ Quiví cha chitó capitán cuan tuhun ra Jesús, tachí ra chí suhva ra cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chí musu ra.

⁴⁻⁵ Tyicuan ta chaꝯ coyo ra mandoñi cuan nu nyaá ra Jesús. Ta quichaha catyí ra chí ra:

—Iyó noo capitán cuenda ñuu Roma. Ta vaha xaan ñáyiví cuví ra chihin yo cha cuví yo ñáyiví Israel. Nyacua savahaꝯ ra noo vehe ñuhu yo. Ta tahán chí vatyí tyinyeun chí ra. Vatyí cuhví xaan noo musu ra. Ta cuñí ra vatyí sanduvahun chí ra.

⁶ Tyicuan ta cuahan ra Jesús chihin ra. Soco cuhva cha cumañi ca chaꝯ ra nya vehe capitán cuan, capitán cuan tachí ra chí suhva ra tahan ra. Ta quichaha catyí ra chí ra Jesús:

—Tata, catyí capitán vatyí ma sayangon chuun cha cuhun nya vehe ra na. Vatyí ña naña ra cha cuhun, na.

⁷ Yucuan chaha ña caña iñi ra quichi ra nu nyaún. ¿Atu ma sahun noo tumañi iñi chí ra vatyí noo tuhun cahan run ihya ri, ta nduvaha ri musu ra, na?

⁸ Vatyí maa ra capitán cuví ra. Ta nyacá ñaha rey chí ra. Ta maa ra nyacá ñaha ra chí ra cuatyí ca cha nuu ra. Tatu tava ra tyiño chí noo ra cuatyí cuan, na cuhun ra. Cuhun ra. O tatu catyí ra chí nonga ra na quichi ra, quichi ra. O tatu tachi ra chí inga ra na sacuvi ra tyiño, sacuvi ra. Ta tyicuan caa tucu yoho, tatu catyun na nduvaha

musu ra, tyicuan ta nduvaha ra na —catyí ra tahan capitán cuan chi ra Jesús.

⁹ Cha chiñi ra Jesús cha catyí ra cuan ta iyo xaan cuñí ra. Ta nanyehę ra chi ñáyiví cha nyicú chihin ra, ta catyí ra:

—Ndicha ndicha cuii vatyí chinó xaan iñi capitán cuan. Ta nañihi que chi ni noo ra Israel cha chinó xaan iñi tari ra cuan —catyí ra.

¹⁰ Yucuan ta cuanuhu ra tahan capitán cuan. Ta cha nachaa coyo ra nya vehe, ta nanyehę ra vatyí cha nduvaha musu cuan.

Nu sanandotę ra Jesús chi sehe noo ñaha ndahvi chihí yï

¹¹ Cha yaha tuhun cuan ta cuahan ra Jesús noo ñuu cha nañí Naín. Ta cuahan tucu ra cachicá noo chihin ra, ta cuaha xaan ñáyiví ñandihí.

¹² Tyicuan ta cuhva cha cua chaa ra yatyin ñuu cuan, nanyehę ra cuaha ñáyiví quitá coyo ñuu cuan. Ta canyísó ñu noo ndiyí, cuacuchi ñu sehe noo ñaha ndahvi cha chihí yï. Ta noo tuhun ri maa ra iyó chi ña, ta chihí ra.

¹³ Ta cha nanyehę ra Jesús chi ña, ta cundahvi cuñí nyehe ra chi ña. Ta quichaha catyí ra chi ña: —Ma cuacun.

¹⁴ Tyicuan ta tuhva ra ta tiin ra chatun cha yihí ndiyí cuan. Tyicuan ta ra canyísó chi ndiyí cuan chicuitayucu ra. Ta catyí ra Jesús chi ndiyí cuan:

—Ndícuita, ra cuehe —catyí ra.

¹⁵ Tyicuan ta ndícuita ndiyí cuan. Ta nicunyaa ra. Tyicuan ta quichaha cahan ra. Ta ra Jesús nacuhva cuenda ra chi ra chi sihi ra.

¹⁶ Cha nanyehē ñu cha tyicuan caa ta yuhvi xaan ñu cuví. Ta quichaha sacahnu ñu chi Nyoo. Ta catyí ñu:

—Cahnu xaan ra profeta Nyoo tuví nu nyicú yo ihya.

Ta catyí tucu ñu:

—Maa Nyoo, ican vachi nu nyicú yo, vachi tyinyee ra chi yo —catyí ñu.

¹⁷ Ta tandihí maa ñáyiví ñicahnu ityi Judea, chitó ñu cha sacuví ra Jesús.

*Nu tachí ra Juan uvi tahan ra chicá noo chihin ra nu nyaá ra Jesús
(Mt. 11.2-19)*

¹⁸ Ta ra cachicá noo chihin ra Juan nacatyí ra tuhun cha sacuví ra Jesús. Tyicuan ta cana ra Juan chi uvi tahan ra.

¹⁹ Ta tachí ra chi ra nu nyaá ra Jesús, vatyí cundaca tuhun ra chi ra tatu ican ra cuví Cristo ra cha cusaquichi Nyoo. Vatyí tatu ñima ra, tyi cuatu ra inga ra.

²⁰ Tyicuan ta ra cha tachí ra Juan, cuahan coyo ra. Ta chaa ra nu nyaá ra Jesús. Ta quichaha catyí ra:

—Ra Juan, ra sacondutyá, tachí ra chi ndi vatyí ndaca tuhun ndi chuun tatu icon cuví Cristo ra cha cusaquichi Nyoo. Vatyí tatu ñimon, cuatu ndi chi inga ra —catyí ra.

²¹ Ta cuhva cha canyicú ra tachí ra Juan cuan, ra Jesús sanduvaha ra cuaha xaan ñu cuhví, ta cuaha xaan ñu yihí tatyí ña vaha chi. Ta sananyehē ra chi ñu cuaa.

²² Tyicuan ta catyí ra Jesús chi ra tachí ra Juan:

—Cuahan ndo. Ta nacatyí ndo chi ra Juan tandihí cha nyehé ndo, ta tandihí cha chiñi ndo. Ta catyi ndo chi ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa nacuiñi ra soho, yoso caa nandotó ndiyi, yoso caa cahín tuhun Nyoo chihin ñu ndahvi yoso caa sacacú ra añima ñu. Ta catyi tucu ndo chi ra vatyí

²³ si xaan cuví chi ñu ña chicá uvi iñi nyicón chii —catyi ra Jesús chi ra.

²⁴ Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catyí ra:

—¿Ñáa cha chahan ndo chinyehe ndo quivi chahan ndo chiqui ndi cuan? ¿Atu chahan ndo chinyehe ndo noo ndoo cha naquisí tatyí?

²⁵ ¿O noo ra cha ñihnoó sahma vaha chinyehe ndo vaha? Ñima. Vatyí chitó ndo vatyí ra ñihnoó sahma vaha iyó vaha ra ñáyivi ta iyó ra vehe rey.

²⁶ ¿Atu ña chinyehe ndo chi noo profeta Nyoo? Ican. Ta cahnu ca ra cuví ra ican saha noo profeta.

²⁷ Ican tuhun ra Juan nyaá nuu tutu cha tyaá ra Isaías ta cha naha. Ta catyí Nyoo tuhun ra tyehe caa:

Yuhu tachí chi noo ra cahan tuhin ityi nuu nu cuahun.

Vatyí cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quivi quichun.

²⁸ Ta catyí chi ndo vatyí chichi cha tandihí ra cha cacu, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi

cuví ra noo ra luhlu ca soco cahnu ca ra ican saha ra Juan ra sacondutyá —catyí ra Jesús.

²⁹ Cha chiñi ñu tuhun ihya, tandihí ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyí cuhva sacuvi Nyoo vaha xaan.

³⁰ Soco tandihí ra fariseo chihin ra sacuahá cuenda ley vehe ñuhu, maa ra cuví ra ña cuñi cha sacondutyá ra Juan chi ra, vatyí ña cuñi ra quehen ra cha chahá Nyoo.

³¹ Ta catyí ra Jesús:

—¿Ñáa chihin sandu inuu ri chi nyoho, ñu iyó quivi ihya? ¿Yóo cha tari caa caá ndo?

³² Tari ra cuatyaa cuví nyoho. Vatyí ra cuatyaa nyasiquí ndotyín nuyahvi. Ta caná chaa ndotyín chi tahan ndotyín, ta catyí ndotyín: “Tivi ndi tiyoo ta ña chita chaha ndo. Ta chita ndi yaa cuihya, soco ña chacu ndo.” Ta tyicuan caa ni noo cuhva ña tahan iñi ndo.

³³ Vatyí ra Juan ra sacondutyá, quichí ra ta ña chachí vaha ra. Ta ña chihí ra vinu. Ta nyoho catyí ndo vatyí tatyí ña vaha yihí chi ra.

³⁴ Ta quichí tucu yuhu Rayi cha quichi nya gloria. Ta chachí ta chihí. Ta nyoho catyí ndo vatyí ra cuahyi cuví ta cuví noo ra tuhvá chihí. Ta ña tahan iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo,

³⁵ soco catyí chi ndo vatyí cha chiñi tuñi Nyoo, chahá ra chi ñu naquehen tuhun cahín ta tuhun cahán ra Juan. Ta maa ñu cusañaha ñu chi ndo vatyí vaha cha chiñi tuñi Nyoo —catyí ra Jesús.

Nu nyaá ra Jesús vehe ra Simón ra cuví fariseo

³⁶ Noo ra fariseo cha nañí Simón nacatyí tuhun ra chi ra Jesús noo vico vehe ra. Ta chaá ra Jesús vehe ra, ta chicunyaa ra mesa.

³⁷ Tyicuan ta noo ñaha cata iñi ñuu cuan chitó ña vatyí nyaá ra Jesús yucuan. Ta chaá ña chihin noo yutyí alabastro tyitu yihí ndutya vixi chahán.

³⁸ Ta chicunyaá ña yatyín ri chaha ra. Ta quichaha chacu chaá ña vatyí ndu uvi iñi ña cuatyí ña. Ta quitá ndutya nuu ña. Ta chihin ndutya nuu ña nacatyá ña chaha ra. Yahá cuan ta sana ityi ña chaha ra chihin ixi xiñi ña. Ta tyayuhu ña chaha ra. Tyicuan ta choso ña ndutya vixi chahán cuan siqui chaha ra.

³⁹ Cuhva cha nyehe ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichi chi ra ihya, coto ra yóo ñaha tiñ chaha ra, vatyí ñaha cuan, ñaha iyó cuatyí cuví ña.”

⁴⁰ Tyicuan ta ra Jesús catyí ra chi ra fariseo cuan:

—Yoho Simón, iyó noo tuhun cua catyí chuun —catyí ra chi ra.

Tyicuan ta nacañan ra Simón:

—Vaha, catyí chii, Maestro —catyí ra.

⁴¹ Ta quichaha catyí ra Jesús tyehe caa:

—Uvi tahan ra yosoyicá ra xuhun chi noo ra cha tuhva chahá noo. Ta noo ra cuan yosiyicá ra ohon cientu denario. Ta nonga ra yosiyicá ra uvi xico uchi ri denario (tari ohon cientu ri pesu).

⁴² Ta ninduvi tahan ra ña cuví tyiyahvi ra. Ta ra tuhvá chahá noo cuan, saha ra ticahnu iñi chi ninduvi tahan ra. Ta vityin catyí chii, yoho Simón

¿nya ra cua cuñi ca chi ra cha chahá noo cuan?
—catyí ra Jesús.

⁴³ Tyicuan ta nacahan ra Simón, ta catyí ra:

—Ra cha cuaha ca saha ra tucahnu iñi chi
—catyí ra.

Tyicuan ta catyí ra Jesús:

—Ndicha cha cahún.

⁴⁴ Tyicuan ta nanyehé ra Jesús chi ñaha sihi
cuan, ta catyí ra chi ra Simón:

—¿Nyhún chi ñaha ihya? Yuhu quihvi chichi
vehun. Ta ña chahun ndutya cha ndoo chahi tari
cuhva costumbre cha iyó chi yo. Ta ñaha ihya
nacatyá ña chahi chihin ndutya nuu ña. Ta yaha
cuan, ta sana ityi ña chihin ixí xiñi ña.

⁴⁵ Yoho ña tyayuhun ndahi, tari costumbre cha
iyó chi yo, soco maa ña nyacua nya kuhva cha
quihvi ihya ta ña sandihi ña cha tyayuhú ña chahi.

⁴⁶ Ta yoho ña tyihun aceitye xiñi, soco ñaha ihya
tyihi ña ndutya vixi chahán chahi.

⁴⁷ Ta catyí chuun, yoho Simón, vasi cahnu xaan
cuatyí ña, soco sahí ticahnu iñi chi ña. Yucuan
chaha cuñi xaan ña chii. Ta ñu sahí tucahnu iñi
chiin ri cuatyí, chiin ri cuñi ñu chii —catyí ra
Jesús.

⁴⁸ Tyicuan ta quichaha catyí ra Jesús chi ña:

—Cuatyun cha yaha sandachi. Vatyí cha saha
Nyoo ticahnu iñi chuun —catyí ra chi ña.

⁴⁹ Tyicuan ta ra nyicú chihin ra quichaha
ndichí xiñi ra: “¿Yóo ra cuví ra ihya? Vatyí sahá
ra tucahnu iñi cuatyí ñáyivi.”

⁵⁰ Tyicuan ta quichaha catyí ra Jesús chi ñaha
sihi cuan:

—Cuahan vityin, cha cacun vatyi chinó iñun chii. Cuahan chihin cha vaha —catyí ra chi ña.

8

Ñusihi cha tyinyeé chi ra Jesús

¹ Cha yahá tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cahan noo ra nuu ñáyivi. Ta sacoto ra chi ñu tuhun vaha yoso cuhva cuñi Nyoo cunyaca ñaha ra chi ñu. Ta ndi uchi uvi tahan apóstol, ra cha tyatyíño ra chi, cuahan coyo ra chihin ra.

² Ta cuahan coyo tucu suhva ñusihi cha sanduvahá ra, ñu cuhvi ta ñu yihí tatyí ña vaha chi. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chi ta nduvahá ña.

³ Ta cuahan tucu cu Juana ñasihi ra Chuza ra cuví tyiño cuenda ra Herodes, ta cu Susana chihin cuaha xaan ca ñu cha tyinyeé chi ra chihin ñáá cha iyó chi ñu.

Nu sañahá ra Jesús vatyi tari noo ra chicá noo tachi, tyicuan caa cuví ra cahán tuhun Nyoo (Mt. 13.1-9; Mr. 4.1-9)

⁴ Ta cuaha xaan ñáyivi quitá noo noo ñuu, vatyi cua nyehe ñu nu cahan ra Jesús tuhun Nyoo. Ta tuvi xaan ñu nyicú ñu, ta quichaha catyi ra chi ñu chihin noo cuhva:

⁵ —Quitá noo ra vehe ra. Ta cuahan ra nu iyó tyiño sahá ra, vatyi cua quití ra chítí trigu nu ñuhú ra. Ta cuhva cha quití ra canacoyo suhva chítí cuan yuhu ityi. Ta chañi ñáyivi siqui. Ta quichií saa ta chachií tí.

⁶ Ta suhva ca chiti cuan canacoyo t̄icu yuu. Caña chiti cuan. Soco na ityi ri vatȳi chiiin xaan ñuhu yihí chaha. Ta s̄in ri ña cachin.

⁷ Ta suhva ca chiti canacoyo chichi chiti iñu, soco quīvi caña tun ñin ri, tu iñu cuan chahñī chi tun.

⁸ Soco suhva ca chiti canacoyo nu ñuhú vaha ta quīvi chahnu tun, vaha xaan chahā tun chiti. Vatȳi noo ri chiti cuan, cientu chiti quitā chihin —catyí ra Jesús.

Ta cha yahā catyí ra tuhun cuan. Ta quichaha cana chaa ra vatȳi na cuiñī ñáȳivi, ta catyí ra:

—Tatu cutuñī iñi ndo, tyasōho ndo tuhun cahín —catyí ra.

*Nu sacotó ra Jesús ñáá cuenda sañahá ra chihin
cuhva ri
(Mt. 13.10-17; Mr. 4.10-12)*

⁹ Yahā cuan ta ra cachicá noo chihin ra, ndacā tuhun ra chi ra ñáá cha cuiñī chi catyí tuhun cha nacatȳi ra chi ñáȳivi.

¹⁰ Tyicuan ta quichaha catyí ra:

—Chi nyoho sacotó Nyoo tuhun xehe, yoso caa nyacá ñaha ra. Soco chi tandīhi ca ñu cuan, cuhva ri chahí chi ñu. Tacuhva nyehe ñu ta cuví chi tari cha ña ndichin nyehé ñu, ta cuiñī ñu soco ma cutuñī iñi ñu ñáá tuhun cuví.

*Nu sacotó ra Jesús ñáá cha cuiñī chi catyí tuhun ra
tachí cuan
(Mt. 13.18-23; Mr. 4.13-20)*

¹¹ Cuhva cha catyí chi ndo, cuiñī chi catyí tyehe caa: chiti cuan tari tuhun Nyoo cuví.

¹² Ta tari nu canacoyo chiti trigu cuan yuhu ityi, tyicuan caa cuví noo ñu chiñī tuhun Nyoo. Soco

quichĩ cuihna ta tinyaa ra tuhun Nyoo chi ñu tacuhva cha ma chino iñi ñu. Ta ma cacu ñu.

¹³ Ta tari nu canacoyo chiti cuan ticu yuu, tyicuan caa tucu inga ñáyivi cha chiñi tuhun Nyoo. Ta sii xaan cuví chi ñu suhva ri quivi. Soco vatyi ña yihí vaha yoho ñu, suhva ri quivi chingo iñi ñu, soco quivi cha quichaha nyehe ñu tindoho, ta sandihi ri ñu tuhun cha chinó iñi ñu.

¹⁴ Tari nu canacoyo chiti chichi iñu, tyicuan caa cuví tucu inga ñu chiñi tuhun Nyoo. Chiñi ñu tuhun Nyoo soco ña cuñi ñu sacuvi ñu tari cuhva chiñi ñu. Vatyi yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyiyo ca iñi ñu cha tyayii. Ta nonga tucu ñu sii ca cuñi ñu chica noo yanga ri ñu. Ta tari cha ña chicoo chiti nuu ñu cuví cuan.

¹⁵ Soco tari nu canacava chiti nu ñuhú vaha, tyicuan caa cuví noo ñu cha chiñi tuhun Nyoo. Ta vaha añima ñu vatyi chinó iñi ñu chihin tandihi añima ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuvi ñu tandihi tuhun cahán ra.

*Ma tyihi xehe yo ñuhú cha sandundichin Nyoo
añima yo coto tinyaa ra
(Mr. 4.21-25)*

¹⁶ Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quihvi ñáyivi chichi vehe soco ndichin.

¹⁷ Vatyi ñahri noo cha ñohó xehe, ta cuñún, tyi ma natuvi. Ta ni noo tuhun xehe, ta cuñun, tyi ma quita nu ndichin ta coto yo.

18 Yucuan chaha tyasoho ndo tuhun cahín. Vatyí tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihí maa chi ndo nyacua nya cha chiin ri cha cuñí maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús (Mt. 12.46-50; Mr. 3. 31-35)

19 Tyicuan ta chaa sihi ra Jesús chihin yañi ra nu nyaá ra. Soco ña cuví chaa ñu vatyí tuví xaan ñáyivi.

20 Tyicuan ta sacoto ñáyivi canyicú cuan chi ra Jesús, ta catyí ñu:

—Sihun chihin yañun nyicú ñu chata vehe. Ta cuñí ñu cahan ñu chuhun.

21 Tyicuan ta nacahan ra Jesús, ta catyí ra:

—Tandihí maa ñáyivi cha chiñí ta sacuví tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

Nu sacutaxin ra Jesús tatyí ñihi vavaha nu miñi (Mt. 8.23-27; Mr. 4.35-41)

22 Cuví chi noo quivi cuan quihvi ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Coho ndo inga chiyo miñi ihya.

Yucuan ta cuahan coyo ra chihin canoa cuan.

23 Ta cha ni ri ca cha cuahan ra mahñu miñi cuan, tin ñumahna chi ra Jesús. Tyicuan ta sana iñi ra ta chaa noo tatyí ñihi vavaha. Ta quichaha tyihi chi ndutya chichi canoa cuan. Ta quichaha cuñí nyee canoa cuan vatyí cama xaan ndutya quihvi.

²⁴ Tyicuan ta casandoyō ra chi ra Jesús. Ta quichaha catyi ra:

—¡Maestro! ¡Maestro! Cha cuñí nyee yo chichi ndutya —catyi ra.

Tyicuan ta nducuita ra Jesús. Ta quichaha catyi ra chi tatyí cuan ta chi ndutya cuan, na cutaxin chi. Ta cutaxin ri.

²⁵ Tyicuan ta quichaha catyi ra chi ra cachicá noo chihin ra:

—¿Ñáá tuhun yuhví ndo? ¿Atu ña chinó iñi ndo vatyí yuhu sahá cuende chi ndo? —catyi ra.

Soco ra cuan, yuhvi xaan ra. Ta iyo xaan cuñí ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyí nyacua nya tatyí ta ndutya ta quichahá tuhun cahán ra.

Nu nduvaha noo ra yihí tatyí ña vaha ñuu Gadara (Mt. 8.28-34; Mr. 5.1-20)

²⁶ Tyicuan ta chaa coyo ra ityi Gadara cha nyaá inga chiyo miñi ityi nuu Galilea.

²⁷ Ta quitā ra chichi canoa cuan. Ta yucuan chaa noo ra cha quichi noo ñuu ityi cuan chisatahan ra chi ra. Ta yihí tatyí ña vaha chi ra. Ta cha naha xaan ña ñihnó maa ra sahma. Ni ri ña iyó ra vehe ra. Chicá noo ri maa ra nu ñaña calavari cuan.

²⁸⁻²⁹ Ta tuhvá tatyí ña vaha cuan naquiqui chi ra. Ta yucuan chaha chahñí ñu ndaha ra ta chaha ra chihin cadena. Soco tatyí ña vaha cuan chahá fuerza chi ra cha cahnya ra. Ta sacono chi chi ra. Ta chinyaca chi chi ra noo nu yori maa ñáyivi iyó. Ta cuhva cha nyehe ra chi ra Jesús, chicuiñi chiti ra nuu ra. Ta quichaha canachaa ra, ta catyi ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyí ma sanyehun tundoho chii —catyí ra yihí tatyí ña vaha cuan chi ra Jesús.

Ta catyí ra tyehe caa vatyí ra Jesús tachí ra chi tatyí ña vaha cuan, na quita chi ra ndahví cuan.

³⁰ Ta quichaha ndaca tuhun ra Jesús chi tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chi ra cuan, ta catyí ra:

—Nyuhu nañí ndi, Legión.

Tyicuan caa catyí ra vatyí cuaha xaan tatyí ña vaha yihí chi ra. Cuenda mil tatyí ña vaha cuan yihí chi ra.

³¹ Tyicuan ta tatyí ña vaha cuan catyí chi ra Jesús vatyí ma tuchi ra chi chi nu tindoho nu ma cuvi maa quita chi.

³² Ta chicán tatyí ña vaha cuan chi ra Jesús nacuhva ra caquihví chi chichi quini cha canyicú yuhu miñi cuan. Tyicuan ta chaha ra Jesús permiso cha caquihví chi chichi quini cuan.

³³ Ta quita tatyí ña vaha cuan chi ra ndahvi cuan. Ta caquihví chi chichi quini cuan. Tyicuan ta cachino quini cuan. Ta yatyin cuan nyaá noo xahva yuhu miñi cuan. Yucuan canacoyo ti chichi miñi cuan. Ta cachihí ti chihin ndutya cuan.

³⁴ Tyicuan ta ra casahá cumi chi quini cuan, yuhví xaan ra. Ta cuahan coyo vavaha ra cua nacatyí ra chi ñáyivi nya ñuu. Ta tandihí ri ñáyivi cha nyehe ra, ta nacatyí ra tuhun cuan.

³⁵ Tyicuan ta chaꝯ coyo ñáyiví cua nyehe ñu ñáá cha cuví cuan. Tyicuan ta chaꝯ ñu nu nyaá ra Jesús. Ta nañihí ñu chi ra cha yihí tatyí ña vaha cuan chi. Nyaá ra nuu ra Jesús. Ta ñihnó ra sahma ra. Ta vaha cuñí ra. Ta yuhví xaan ñu cuví.

³⁶ Tyicuan ta tandihí ñu cha nyehe cha cuví cuan, nacatyí ñu chi tandihí ca ñáyiví yoso caa quitá tatyí ña vaha chi ra ndahvi cuan, ta nduvahꝯ ra.

³⁷⁻³⁹ Yucuan ta tandihí ñáyiví ityi Gadara cuan quichaha catyi ñu chi ra Jesús na cunuhu ra ityi nu quichi ra. Vatyí yuhví xaan ñu chihin cha sacuví ra chihin tatyí ña vaha cuan. Tyicuan ta ra cha quitá tatyí ña vaha cuan chi, catyi ra chi ra Jesús, na cuhva ra cha cuhun ra chihin ra. Soco catyi ra Jesús chi ra:

—Cuꝯnuhu nya vehun. Ta naꝯuhva cuendon chi ñáyiví chuun ñáá cha sacuví Nyoo chuhun —catyi ra.

Yucuan ta ra Jesús nandihví ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahvi cha nduvaha cuan, cuanuhu ra nya ñuu ra. Ta ityi cuahan ra nacatyí ra chi tandihí ñáyiví ñuu cuan yoso caa sanduvahꝯ ra Jesús chi ra.

*Nu nduvahꝯ sehe ra Jairo ta ñaha sihi cha tñn sahma ra Jesús
(Mt. 9.18-26; Mr. 5.21-43)*

⁴⁰ Quiví cha nachaꝯ ra Jesús cha chahꝯn ra inga chiyo miñi cuan, cuaha xaan ñáyiví nyatú ñu chi ra. Ta sih xaan cuñí ñu vatyí nachaꝯ ra.

⁴¹ Tyicuan ta chaꞗ noo ra cha nañí Jairo, ra cuví nuu vehe ñuhu, ta chicuiñi chiti ra nuu ra. Ta quichaha chacu ndahvi ra nuu ra, na cuhun ra vehe ra.

⁴² Vatyí iyó noo tuhun ri sehe ra, ta iyó uchi uvi cuiya ña. Ta cha cuñí cúvi ña chihin cuehe. Ta cuahan ra Jesús vehe ra. Ta cuaha xaan ñáyivi cuahan chihin ra Jesús, ta tihin xaan cuahan ra mahñu ñu.

⁴³ Ta chihin ñáyivi cuan cuahan noo ñaha cuhví. Cha iyó uchi uvi cuiya ndoho ña noo cuehe niñi. Ta cha ndihi maa xuhun ña sanaꞗ ña, ta ña nduvahá ña.

⁴⁴ Soco chaꞗ ña nu nyaá ra Jesús ityi chata ra. Ta tñn ña sahma ra. Ta caa cuhva ri cuan, ta chicunyasi cha chati niñi ña.

⁴⁵ Tyicuan ta quichaha catyí ra Jesús:

—¿Yóó cha tñn sahme?

Ta tandihi ñu cuahan chihin ñu catyí ra:

—Yori.

Ta catyí ra Pedro ta ra tahan ra chi ra Jesús:

—Maestro, cuaha xaan ñáyivi cuahan chuhun, ta tihin xaan cuahun. Ta suri maa ñu tyandahá ñu chuun. Ta ndacá tuhun con “¿Yóó cha tñn sahme?” —catyí ra.

⁴⁶ Soco ra Jesús catyí ra:

—Chitó mai vatyí iyó noo cha tñn sahme. Vatyí tuví iñi cuahan suhva tunyee iñi cha iyó chii —catyí ra.

⁴⁷ Tyicuan ta ñaha sihi cuan nyehe ña vatyí cha chitó ra. Ta quichaha nihi ña chihin cha yuhví ña. Ta chicuiñi chiti ña nuu ra. Ta quichaha nacatyí ña chi ra ñáá tuhun cha tñn ña sahma ra, ta yoso

caa nduvaha ña caa cuhva ri cuan. Ta chiñí tandihí ñáyiví cuan cha nacatyí ña.

48 Yucuan ta catyí ra Jesús chi ña:

—Yoho sihi, cha nduvahun vatyí chinó iñun chii. Cuahan chihin cha vaha —catyí ra.

49 Ni cahán ca ra Jesús tuhun ihya, ta chaá noo ra quitá vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yaha chihí ña. Ma sayanga con chi Ra Sacuaha chiña —catyí ra.

50 Soco cha chiñí ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

51 Ta cuhva cha chaá ra Jesús vehe ra Jairo, ña chaha ra quihví ñáyiví chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasihí ra, quihví ñu chichi vehe cuan nu catuví cuehe luhlu cha chihí cuan.

52 Ta tandihí ñu chacú chaá ñu cha cuenda vatyí chihí cue. Soco ra Jesús catyí ra chi ñu:

—Ma cuacu ca ndo. Vatyí ña chihí cue. Quixí cue —catyí ra.

53 Soco chacú nyaa ñu tuhun cahan ra. Ta ña chinó iñi ñu. Vatyí chitó ñu tyi cha chihí cue.

54 Tyicuan ta tñn ra Jesús ndaha cue. Ta ñihi cahan ra ta catyí ra chi cue:

—Ndücüita, cuehe luhlu —catyí ra.

55 Tyicuan ta nandoto cue. Ta caa cuhva ri cuan ndicuitá cue. Ta quichaha catyí ra Jesús:

—Cuhva ndo cha cachi cue.

⁵⁶ Ta sutu cue ta sihi cue, iyo xaan cuñí ñu. Soco catyí ra Jesús chi ñu vatyí yori maa chihin cahán ñu tuhun cha cuví cuan.

9

Nu tachí ra Jesús ndi uchi uvi tahan ra cachicá noo chihin ra vatyí cucahan ra tuhun Nyoo (Mt. 10.5-15; Mr. 6.7-13)

¹ Sandu ñin ri ra Jesús ndi uchi uvi tahan ra cachicá noo chihin ra. Ta chaha ra tunyee ñni chi ra vatyí cuví tava ra tatyí ña vaha, ta cuví sanduvaha ra chi ñu cuhví.

² Ta tachí ra tyiño chi ra vatyí na sanduvaha ra chi ñu cuhví, ta cahan ra tuhun Nyoo yoso caa nyacá ñaha ra ñanima ñáyivi.

³ Ta catyí ra chi tandihí ra cuan:

—Ñahri cha cuisón ndo ityi cahun ndo, ni yutun ma tuví ndo. Ni yitín, ta ñi ri cha cachi ndo ta ma cuisón ndo. Ta ñi ri xuhun ta ma cuisón ndo. Tacuhva ñihnó ri ndo cahun ndo.

⁴ Ta savaha ri vehe cha chaa ndo, cunyaa ndo yucuan nyacua nya cha chaa quívi cha cahun ndo inga ñuu.

⁵ Ta nu ña cuñí ñu cuiñi ñu tuhun cahan ndo, quita ndo ñuu cuan. Ta ñaquisi ndo ñiyaca chaha ndo. Tyehe caa sacuvi ndo na cuví chi tari minoo seña chi ñu, vatyí ña cuñí ñu tyasoho ñu tuhun Nyoo —catyí ra Jesús chi tandihí ra cuan.

⁶ Tyicuan ta cuahan coyo ra tandihí cuíi maa ñuu. Ta cahán ra tuhun vaha Nyoo ta yoso caa cuñí chi ta cacu ñu. Ta sanduvaha ra chi ñu cuhví.

*Nu cuñí ra Herodes coto ra yóó ra chicá noo cahán
tuhun Nyoo ta sanduvahá chi ñáyivi
(Mt. 14.1-12; Mr. 6.14-29)*

⁷ Ra Herodes ra cuví ra nyacá ñaha ñicahnu ityi Galilea, ñihí ra tuhun cha sacuví ra Jesús. Ta ña ñihí vaha ra cuhva yóó ra cuví ra. Vatyí yihí ñu catyí ñu vatyí ra Juan, ican ra nandoto.

⁸ Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto.

⁹ Soco catyí ra Herodes:

—Maa mai tyihí tyiño chichanya sucun ra Juan. ¿Tu tyicuan caa, yóó ra chiñí xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chi ra cha chicá noo cuan.

*Nu chahá ra Jesús cha cachi ohon mil rayii
(Mt. 14.13-21; Mr. 6.30-44; Jn. 6.1-14)*

¹⁰ Ta cuhva cha nachaa coyo ra chicá tyiño nuu ra Jesús, canacatyí ra chi ra Jesús tandihí cuii maa cha cuví nu chahan coyo ra. Tyicuan ta tava sin ra Jesús chi ra ta cuahan coyo ra yatyin ri noo ñuu cha nañí Betsaida.

¹¹ Soco cuhva cha ñihí ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo aña ñáyivi. Ta sanduvahá ra chí ñu cuhví.

¹² Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chi ra:

—Catyí chí ñáyivi ihya na cunuhu ñu cunyitatu ñu, ta na cunducu ñu noo cha cachi ñu noo ñuu

cha nyaá yatyin ri cuan. Vatyí ihya ñahri maa cha cachi yo iyó —catyí ra.

¹³ Tyicuan ta quichaha catyí ra Jesús chi ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chi ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihi cha cachi tandihí ñáyivi ihya. Ni ri cusata ndi soco ma ñihi —catyí ra.

¹⁴ Vatyí ohon mil rayii nyicú yucuan. (Ta siin ri nyicú ñusihí chihin sehe ñu.) Yucuan ta ra Jesús catyí ra chi ra cachicá noo chihin ra:

—Na cunyicu ñáyivi cha uvi xico uchi tahan ñu noo noo nu cunyicu ñu.

¹⁵ Tyicuan ta chicunyicu tandihí ñu.

¹⁶ Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehe ndaa ra andivi, ta nacuhva ra tyahvi nyoo chi Nyoo. Tyicuan ta tahvi sava ra pan ta tiyaca cuan. Ta chaha ra chi ra cachicá noo chihin ra na casacha ra chi ñáyivi.

¹⁷ Tyicuan ta tandihí ñu chachi ñu. Ta chitu chichi ñu. Yaha cuan ta ndoo ca yiquin ta sacutu ra uchi uvi tahan tica chihin yiquin cuan.

Nu catyí ra Pedro tyi ra Jesús cuví ra Cristo, ra sacacú chi yo

(Mt. 16.13-19; Mr. 8.27-29)

¹⁸ Noo quivi quita siin ra Jesús chihin ra cachicá noo chihin ra. Ta quichaha chicán tahvi ra chi Nyoo. Ta nu ndihí chicán tahvi ra, ta quichaha

ndaca tuhun ra chi ra chicá noo chihin ra ta catyí ra:

—¿Ñáá catyí ñáyivi, yóo ra cuví yuhu?

¹⁹ Tyicuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutya chi ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndaca tuhun ra Jesús chi tandihí ra, ta catyí ra:

—Ta nyoho, ¿yóo ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quitá nu nyaá Nyoo.

Nu sacoto ra Jesús yoso caa cucahñi ñáyivi chi ra (Mt. 16.20-28; Mr. 8.30—9.1)

²¹ Ta catyí ra Jesús chi ra cachicá noo chihin ra vatyí yori maa chihin cahan ra tuhun cuan.

²² Tyicuan ta catyí tucu ra chi ra:

—Yuhu Rayñi cha quichí nya gloria cuví. Ta tahán chi vatyí cuaha xaan tundoho cunyehi. Ta ra cacuví mandoñi ta ra cacuví nuu chi tata sutu chihin ra casacuaha cuenda ley, ma chino ñni ra chii. Ta cucahñi ra chii. Soco nu cu uñi quiví cunandote —catyí ra.

²³ Tyicuan ta quichaha catyí tucu ra chi tandihí ra:

—Tatu nya nyoho cuñi ndo cunyicon ndo chii, cahnya ñni ndo cha cuñi maa ndo sacuvi ndo, tacuhva cuví sacuvi ndo cha cuñi Nyoo. Ma ndu

uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví cruzi cha tahán chi cuiso ndo.

²⁴ Ta nya ndo ña cuñi ndo nyehe ndo tundoho cha catyi yuhu, cunyehe ndo tundoho anyaya. Soco nya ndo cuhva ndo ñayivi ndo cha catyi yuhu, cucacu añima ndo.

²⁵ ¿Ñáá cuenda quita chi ndo cha saha ganaa ndo tandihi cha iyó ñayivi, tatu cuhun añima ndo anyaya?

²⁶ Vatyí tatu cahan nuu ndo cha cahán ñayivi chi ndo cha catyi yuhu, ta cha catyi tuhun cahín, cucahan tucu nuu mai nyehi chi ndo nachaa quivi quichi inga chaha. Vatyí cuquichi chihin cha cahnu cuví, ta cha cahnu cuví Sutu yo Nyoo ta ángel cuenda ra. Vatyí yuhu cuví Rayi cha quichi nya gloria.

²⁷ Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo (Mt. 17.1-8; Mr. 9.2-8)

²⁸ Uña quivi yahá cha catyi ra Jesús tuhun cuan. Ta ndaa ra noo yucu vatyí cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra.

²⁹ Ta cha ni ri ca cha chicán tahvi ra Jesús, nasama cuhva caá sahma ra ta nuu ra. Tyaqui xaan cuichin nanduvi sahma ra. Ta xiño xaan.

³⁰ Tyicuan ta tuvi uvi tahan ra candatuhún chihin ra, ra Moisés ta ra Elías.

³¹ Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cúvi ra.

³² Ta vasi cuñí xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra.

³³ Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra.

³⁴ Ta cha ni ri ca cha cahán ra ta quichí noo vico siqui ra. Ta yuhví xaan ra cacuví cha caquihvi ra chichi vico cuan.

³⁵ Tyicuan ta chichi vico cuan chiñi ra noo ndusu cha catyí:

—Ican ra ihya cuví Sehi, ta cuñí xain chi ra. Tyasoho ndo tuhun cahán ra —catyí ndusu cuan.

³⁶ Ta cha yaha cahan ndusu cuan, nanyehe ra Pedro ta ra ndihi chihin ra vatyí noo ri ca maa ra Jesús nanyaá yucuan. Ta yori maa chihin cacahan ra tuhun cha nyehe ra.

*Nu sanduvaha ra Jesús chi noo ra cuehe luhlu cha yihí tatyí ña vaha chii
(Mt. 17.14-21; Mr. 9.14-29)*

³⁷ Ta cha inga quivi cha noo ra Jesús yucu cuan, cuaha xaan ñáyivi chisatahan chi ra.

³⁸ Tyicuan ta chichi cha cuaha ñáyivi cuan, noo ra cana chaa xaan ra, ta catyí ra:

—Maestro, saha tumañi ñni chii. Nyehe ndahvi chi sehi. Vatyí noo tuhun maa ra iyó chii.

³⁹ Ta yihí ndihí tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá tiñi yuhu ra. Ta quiñi xaan nyacuví chi chihin ra. Ta ña cuñí maa tatyí ña vaha cuan saña chi ra.

⁴⁰ Cha cahin chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹ Tyicuan ta nacahan ra Jesús ta catyí ra:

—Nyoho, ñu ña chinó iñi cuví ndo. Ta ni caa ni quiñi iyó ndo. ¿Yoso ca tahan quivi cunyai chihin ndo ta cunyeer iñi tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi sehun.

⁴² Ta cuhva cha cua tuhva ra cuehe cuan nu nyaá ra Jesús, ta tuchí tatyí ña vaha cuan chi cue nya sava. Soco ra Jesús tavá ra chi tatyí ña vaha cuan. Ta sanduvahá ra chi cue. Tyicuan ta nacuhva cuenda ra chi cue chi sutu cue.

⁴³ Ta tandihí ñáyivi, iyo xaan cuñí ñu cha cahnu cha sacuví Nyoo chihin ñu.

Inga chaha tucu cahán ra Jesús tuhun yoso caa cucahñi ñáyivi chi ra
(Mt. 17.22-23; Mr. 9.30-32)

Cha ni ri ca cha iyo cuñí ñáyivi cha sacuví ra Jesús, ta quichaha catyí ra chi ra cachicá noo chihin ra:

⁴⁴ —Tyasoho vaha ndo tuhun cahín. Ta ma naa iñi ndo. Vatyí yuhu Rayi cha quichí nya gloria, cucuhva cuenda ñu chii ndaha ra xaan iñi chii —catyí ra Jesús.

⁴⁵ Soco ra cachicá noo chihin ra ña cutuñí iñi ra ñáá tuhun cahán ra. Vatyí Nyoo ña chahá ra cha

cacutuñi iñi ra. Ta cayuhví ra ndaca tuhun ra chi ra Jesús ñáá cha cuví cuan.

Nu sañaha ra Jesús yóó ra cha cahnu ca cucuvi nu nyacá ñaha Nyoo

(Mt. 18.1-5; Mr. 9.33-37)

⁴⁶ Yucuan ta ra cachicá noo chihin ra quichaha cacuvi yuhu ra tuhun nya ra cahnu ca cuví chichi cha uchi uvi tahan ra.

⁴⁷ Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu.

⁴⁸ Ta quichaha catyí ra chi tandihí ra cuan:

—Tatu chihin sivi natín cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natín cuenda ndo. Ta tatu natín cuenda ndo chii, chi maa Nyoo cha saquichí chii, natín cuenda ndo. Vatyí ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

Ñu cha ña cahán chi yo, ican ñu cuan tyinyee chi yo
(Mr. 9.38-40)

⁴⁹ Yucuan ta ra Juan catyí ra chi ra Jesús:

—Maestro, nyehé ndi chi noo ra cuan. Cahán ra sivun ta tavá ra tatyí ña vaha. Soco ña chaha ca ndi. Vatyí ñima chihin yo chicá noo ra —catyí ra.

⁵⁰ Tyicuan ta catyí ra Jesús chi ra:

—Ma casi ndo nu cahan ra. Vatyí yóó ra ña cahán chi yo, tumañi iñi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyí ña vaha cha chicá xiñi ra

⁵¹ Tuvi iñi ra Jesús vatyí cha nyaña yatyin cha tahán chi cunuhu ra gloria, ta sanduní ra iñi ra.

Ta quehen ra ityi ta cuahan ra Jerusalén nu cucuví ra.

⁵² Ta tachi ra tyiño na cuhun coyo ra cachicá noo chihin ra ityi nuu ca noo ñuu ityi Samaria. Vatyí canducu ra nu nyitatu ra.

⁵³ Soco ñu Samaria cuan, ña cuñí ñu cha ndoo ra yucuan, vatyí tuví iñi ñu vatyí Jerusalén cuahan coyo ra, ta ñu Samaria ña cuví nyehe ñu chi ñu Jerusalén.

⁵⁴ Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuvi ra Elías? cacan yo chi Nyoo na saquichi ra ñuhu andivi siqui ñáyivi Samaria cuan, vatyí cayu ñu vatyí ña cuñí ñu cha ndoo yo ñuu ñu —cacatyí ra.

⁵⁵ Tyicuan ta nanyehę ra Jesús chi ra. Ta cahan ra chi ra ta catyí ra:

—Taxi ri ndo. Vatyí ña cutuñi iñi ndo ñáá tyiño vachi yuhu.

⁵⁶ Vatyí yuhu Rayi cha quichi nya gloria, ña vachi vatyí sanai añima ñáyivi, Soco vachi vatyí sacaqui chi ñu —catyí ra.

Tyicuan ta cuahan coyo ra inga ñuu.

*Ñu cha cuñí quihvi cuenda ra Jesús
(Mt. 8.19-22)*

⁵⁷ Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñí cunyi quen chuun. Ta cuhin chuhun tandihí ri ityi cuahun —catyí ra.

⁵⁸ Yucuan ta catyí ra Jesús chi ra:

—¿Atu ndichon? Vatyí yuhu ñahri maa cha iyó chii. Ñaña iyó vehe ti. Ta saa iyó taca ti. Soco yuhu Rayi cha quichi nya gloria ñahri maa nu cava xiñi iyó —catyí ra chi ra cuan.

⁵⁹ Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cuhun xihne cucuchi chi suti —catyí ra.

⁶⁰ Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihí maa ñu chi tahan ndiyi ñu chichi ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chi ñu chi Nyoo na cunyaca ñaha ra chi ñu —catyí ra.

⁶¹ Tyicuan ta quichaha catyí inga ra chi ra Jesús:

—Tata, cuñi cunyiquen chuun. Soco cuhva xihna na cuhin cuahin chihin ñu vehi —catyí ra.

⁶² Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí iñi ra cha sandoo ra, ña yihí vaha iñi ra cha cuví cunyaca ñaha Nyoo chi ra —catyí ra Jesús chi ra.

10

Nu tachi ra Jesús chi uñi xico uchi tahan ra cuahan tuhun Nyoo chihin ñáyivi

¹ Cha yahá tuhun cuan ta nacachi Sutú Mañi yo Jesús chi inga uñi xico uchi tahan ca ra. Ta tachi

ra chi uvi uvi ra noo noo ityi cuahan ra tandihí ñuu ta tandihí ityi nu tahán chi cuhun ra Jesús.

² Ta catyí ra chi ra:

—Tari noo itu cahnu vavaha, tyicuan caa nu tyiño sahí. Soco ña cuaha musu. Yucuan chaha çacan ndo chi Nyoo na saquichi ca ra musu. Vatyí tyinyee ra chi ndo cahan ndo tuhun ra chihin ñáyivi.

³ Ta cuahan ndo ta nyehe ndo vatyí cua sacuhin chi ndo tari mbee mahñu lobo. Vatyí lobo tuhvá ti chachí ti chi mbee. Ta tyicuan caa cucuñi ñáyivi satañi ñiñi ñu chi ndo.

⁴ Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun.

⁵ Cuhva cha quihvi ndo chichi vehe noo ñáyivi, cahan vaha ndo chihin ñu. Ta catyí ndo, na coo cha vaha añima ñu.

⁶ Ta tyicuan caa tatu iyó ñáyivi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu.

⁷ Ta ndoo ndo suri maa vehe cuan. Tatu chaha ñu cha cachi ndo, çachi ndo. Tatu chaha ñu cha coho ndo, çoho ndo yucuan. Vatyí ra sahá tyiño, iyó ityi chi ra cha cachi ra cha sahá ganaa ra. In ri maa vehe cuan cunyaa ndo nyacua nya cha chaa chi quivi cha cuhun ndo inga ñuu.

⁸ Ta nu chaa ndo noo ñuu ta vaha cahan ñu chihin ndo, çachi ndo ta çoho ndo tandihí cha cuhva ñu chi ndo.

⁹ Ta sanduvaha ndo chi ñu cuhví ñuu cuan. Ta catyí ndo chi ñu: “Cha nyaña yatyin Nyoo ra cunyaca ñaha añima ndo.”

10 Soco tatu chaa ndo noo ñuu ta ña cuñí ñu tyasoho ñu tuhun cahan ndo, quita ndo ityi cahnu. Ta catyi ndo chi ñu:

11 “Nyacua nya ñiyaca ñuu ndo cha iñi chaha ndi, ta cunaquisi ndi. Vatyí tari noo seña vatyí ndoo cuatyí ndo siqui ndo. Vatyí Nyoo nyaña yatyin ra chi ndo ta ña tyasohó ndo tuhun cahán ra yoso caa cuñí ra cunyaca ñaha ra añima ndo.” Tyicuan caa catyi ndo chi ñu —catyí ra Jesús chi ra nyicón chi ra.

12 Ta quichaha catyí tucu ra chi ra:

—Quiví tachi tuñi Nyoo chi ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyó ta cha naha ñuu Sodoma, ñu chihí cha catyi cuatyí ñu —catyí ra Jesús.

*Ñáyivi ña tyasohó tuhun cahán ra Jesús cunyehe ñu tundoho
(Mt. 11.20-24)*

13 Ta catyí ra:

—¡Ndahvi nyoho, ñáyivi ñuu Corazín! Ta ¡ndahvi nyoho, ñáyivi ñuu Betsaida! Vatyí nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu, ñahri nyatu cahnu nyehe ñu. Soco tyehe ta nyehe ñu quívi cuan cha nyehé nyoho vityin, tañi tyehe ri ndihvi noo ñu sahna tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan.

14 Yucuan chaha, nyoho ñuu Corazín chihin ñuu Betsaida, ñihi ca cutachi tuñi Nyoo chi ndo ican saha ñáyivi Tiro ta ñáyivi Sidón cuan.

15 Ta nyoho ñu ñuu Capernaum, cuñí maa ndo vatyí cundaa ndo nyacua nya andiví. Soco cunoo ndo nyacua nya anyaya, vatyí ña quichahá ndo tuhun Nyoo —catyí ra Jesús.

16 Ta catyí ra chi ndi uñi xico uchi tahan ra cuan:

—Ñáyivi cha tyasohó tuhun cahán nyoho, tuhun cahán yuhu tyasohó ñu cuví cuan. Ta ñu ña quichahá tuhun cahán nyoho, tuhun cahán yuhu ña quichahá ñu cuví cuan. Ta ñu ña quichaha tuhun cahán yuhu, tuhun cahán ra cha saquichi chii, ña quichahá ñu cuví cuan —catyí ra Jesús chi tandíhi ra.

Nu nachaꞗ coyo ndi uñi xico uchi tahan ra cha chikahan tuhun Nyoo

17 Yucuan cuví nu nachaꞗ coyo ndi uñi xico uchi ra cha chikahan tuhun Nyoo chihin ñáyivi. Ta siꞑ xaan cacuví chi ra. Ta cacatyí ra chi ra Jesús:

—Sutu Mañi yuhu, nyacua nya tatyí ña vaha ta quichahá tuhun cahán ndi tatu cahán ndi sivun —catyí ra.

18 Tyicuan ta catyí ra Jesús chi ra:

—Ay, yuhu nyehi andiví nu cana cava cuihna, ra nañi Satanás. Tari noo tacha, tyicuan caa cana cava ra.

19 Ta yuhu, chahi fuerza chi ndo vatyí cuví chasaha ndo chi ra ña vaha cuan. Ta cuví cuaca chaha ndo siꞑi coo ta tisuhma, ta ñahri cha cuví chi ndo.

20 Soco ma siꞑ xaan cuví chi ndo vatyí cuví tava ñehe ndo tatyí ña vaha cuan. Siꞑ ca cuví chi ndo vatyí nyaá sivi ndo nu libru Nyoo —catyí ra Jesús.

Nu sacahnú ra Jesús chi Nyoo vatyí s̄i cuñí ra vatyí sañahá Nyoo tuhun vaha chi ñu ndahvi (Mt. 11.25-27; 13.16-17)

²¹ Cuhva cuan s̄i xaan cuñí ra Jesús sahá Tatyí Ii Nyoo, ta catyí ra:

—Sacahní chuun, Sutu Mañi yuhu, vatyí nyacá ñahun andiví ta ñuhu ñayiví. Vatyí maun sañahún tuhun maun chi ñu ndahvi ihya. Ta ña sañahún chi ra chitó ta ra cha chiñi tuñi. Tyicuan caa Sutu Mañi yuhu vatyí tyicuan caa kuhva cuñún —catyí ra Jesús.

²² Ta catyí ra Jesús chi tandihí ra sacuví tyiño nuu ra:

—Tandihí maa tuhun cuan chaha Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chi Suti, noo tuhun ri mai ñohó nui chi ra. Ta chi ñáyiví cuñí mai sacote tuhun ra, chi ñu cuan cusacote —catyí ra.

²³ Tyicuan ta nanyehe ra chi ra cachicá noo chihin ra. Ta catyí ra chi ra:

—S̄i xaan cuñí nyoho ta ñáyiví cha iyó vityin vatyí nyehé ndo cha sacuví.

²⁴ Vatyí cuaha xaan rey ta ra profeta Nyoo ta cha naha cuñí ra nyehe ra cha nyehé nyoho vityin. Soco ña nyehe ra. Ta cuñí ra cuiñi ra tuhun cha chiñí nyoho vityin. Soco ña chiñi ra —catyí ra Jesús.

Nu sañaha ra Jesús chi yo vatyí tahán chi tyinyee yo chi ñáyiví savaha ri

²⁵ Tyicuan ta chaá noo ra sacuahá cuenda ley vehe ñuhu. Ta quichaha ndaca tuhun ra chi ra Jesús, Vatyí nducu nyehe ra chi ra. Ta catyí ra:

—Maestro, ¿yoso caa cunyacuvi ta cuhin nu coi noo ñayiv̄i cha ma naa ca maa?

²⁶ Tyicuan ta nacahan ra Jesús, ta catyí ra:

—¿Ñáá catyí nu ley? ¿Yoso caa tuhun cha sacuahún?

²⁷ Tyicuan ta nacahan ra sacuaaha cuenda ley cuan ta catyí ra:

—Catyí ley, cuñi yo chi Nyoo chihin tandih̄i añima yo ta chihin cha n̄i iñi yo, ta chihin tandih̄i fuerza yo, ta chihin cha tandih̄i cha chiñi tuñi xiñi yo. Ta cuñi yo chi ñáyiv̄i tahan yo tari cha cuñi yo chi maa yo. Tyicuan caa catyí chi —catyí ra cuan.

²⁸ Tyicuan ta catyí ra Jesús chi ra:

—Ndicha cha cahún. Tyicuan caa sacuvun ta cacu añimon ta coun ñayiv̄i cha ma naa ca maa —catyí ra Jesús.

²⁹ Soco ra sacuaaha cuenda ley cuan cuñi ra savaha ra chi ra, ta quichaha catyi tucu ra chi ra Jesús:

—¿Yóó cha cuví ñáyiv̄i tahin? —catyí ra.

³⁰ Tyicuan ta nacahan ra Jesús, ta catyí ra:

—Noo ra quita ra Jerusalén ta cuahan ra nya ñuu Jericó. Ta tahan ra chi ra suhu. Ta suhu ra tandih̄i cuii maa cha nyiso ra, nyacua nya sahma ra. Ta cañi ra chi ra nyacua chacun taxin ra chi ra. Ta sandoo maa ra chi ra yucuan.

³¹ Tyicuan ta yaha noo tata sutu ityi cuan. Soco cuhva cha nanyeh̄e ra chi ra catuví cuan nya sava ri yaha ra.

³² Tyicuan ta yaha tucu nonga ra cha yihí cuenda vehe ñuhu, cha nañi levita. Soco cha

nanyehe ra chi ra catuví cuan suri nya sava ri yaha ra.

³³ Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyehe ra chi ra catuví yucuan, ta quichi nundahvi cuñi ra nyehe ra chi ra.

³⁴ Ta tuhva ra nu catuví ra, ta quichaha saha ra tatan chi ra. Ta tyihí ra aceitye ta vinu nu cahvi chi ra. Ta sahvi ra noo sahma chata ra. Yaha cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra.

³⁵ Ta cha inga quivi cha cuñi cuhun ra Samaria cuan. Ta tava ra uvi tahan xuhun. Ta chaha ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cuhvon cha cachi ra. Ta saton tatan chi ra na nduvaha ri ra. Tatu cuñi ca chi xuhun, tyiyahvi mai chuun nandichi”, catyí ra. Yucuan ta cuahan ra —catyí ra Jesús.

³⁶ Nu ndihí nacatyí ra Jesús tuhun ihya, quichaha ndaca tuhun ra chi ra sacuaha cuan, ta catyí ra:

—Vaha. ¿Chichi cha uñi tahan ra cuan, nya ra cuví ra tahan ra ndahvi cuan? —catyí ra Jesús.

³⁷ Tyicuan ta quichaha catyí ra sacuaha cuan:

—Ra cha cundahvi cuñi chi ra —catyí ra.

Tyicuan ta quichaha catyí ra Jesús:

—Cuahan ta sacuvi tucu yoho tyicuan caa chihin ñáyivi cha iyó tundoho chii —catyí ra.

Nu chinyaa ra Jesús vehe cu Marta chihin cu María

³⁸ Ta quehen ra Jesús ityi cuahan ra. Ta chaꝥ ra noo ñuu. Ta yucuan iyó noo ñaha cha nañí Marta. Ta chaꝥ ra vehe ña.

³⁹ Ta cu Marta iyó noo cuhu ña cha nañí María. Ta cu María chicunyaꝥ ña yatyin ri chaha ra Jesús, vatyi cuiñi ña tuhun cahán ra.

⁴⁰ Soco cu Marta cuaha xaan tyiño nyaá sacuvi ña. Ta chaꝥ ña nu nyaá ra Jesús, ta quichaha catyí ña chi ra:

—Tata. ¿Atu ña chicá xiñi yoho vatyi cuhi sandoó maa ña chii chihin tyiño? Catyí chi ña na tyinyee ña chii —catyí ña chi ra.

⁴¹ Soco ra Jesús catyí ra chi ña:

—Marta, Marta, chicá xaan xiñun ta cutyiño xaan cuñun chihin tyiño chiña.

⁴² Soco iyó noo tuhun cha tahán chi caca xiñi yo. Ta cu María ihya nacachj ña tyiño vaha ca sacuvi ña cha tyasohó ña tuhun cahín. Ta yuhu ma cuvi tinyai chi ña —catyí ra Jesús chi cu Marta.

11

Nu sañaha ra Jesús chi ra cachicá noo chihin ra yoso caa cacan tahvi ra chi Nyoo (Mt. 6.9-15; 7.7-11)

¹ Cuví noo chaha cha chicán tahvi ra Jesús. Ta cuhva cha ndihj chican tahvi ra, ta quichaha catyí noo ra chicá noo chihin ra chi ra:

—Sañaha chi ndi yoso caa cacan tahvi ndi chi Nyoo. Tari sañaha ra Juan chi ra chicꝥ noo chihin ra —catyí ra.

² Tyicuan ta catyí ra Jesús chi ra:

—Cua cuhve cuhva chi ndo yoso caa. Tyehe caa çacan tahvi ndo:

Sutu Mañi yuhu, yoho cha nyaun andiví. Sacahnu
xaan ndi chuun.

Na quichi quiví cha nyaca ñahun ihya siqui ñuhu
ñayiví.

Na sacuvi ñáyiví ihya siqui ñuhu ñayiví tandihi
cuhva cuñí maun, tari cuhva cuví gloria.

³ Cuhva cha cachi ndi tacuhva yoso cuhva yaha
ndi noo noo quiví.

⁴ Saha tucahnu ñni chi ndi. Tari maa ndi sahá ndi
tucahnu ñni chi ñu tasi ñni chi ndi.

Ma cuhvon cha nducu nyehe ra ña vaha chi ndi,
soco sacacu chi ndi tacuhva ma sacuvi ndi
cuatyí nuun.

Tyicuan caa cacan tahvi ndo —catyí ra Jesús.

⁵ Ta catyí tucu ra ñandihí:

—Saha yo tuhun tyi nyoho iyó noo amigon, ta
chaa ra vehun cha ñuu ta catyí ra chuun: “Xaa,
saha tumañi ñni chii, cuhva noo ñni tahan pan
chii.

⁶ Vatyí noo ra tahin nichaa ra vehi. Ta cañi xaan
quichi ra. Ta ñahri maa cha iyó chii cuhve chi ra.”

⁷ Ta yoho cunacahun ta catyun chi ra: “Ma
sayangon chii, ndee. Vatyí nyasí yuvehi. Ta
ñiquixi chihin sehi. Ta ña cuvi nducuite ta cuhve
cha cuhve chuun cha vityin.” Tyicuan caa
cucatyun chi ra.

⁸ Ta catyí yuhu chuun. Vasi ra tahun cuví chi ra,
ma nducuiton ta cuhvon chi ra cha numi ri. Soco
tatu ndoo ra yucuan, ta ma cundihñi ra cacan ra
chuun, sacachan ra yuehun ta cana chaa ra
chuun tacuhva cha ma cuvi cusun, ta cundihñun
cha sacachan ra yuehun, tyicuan ta nducuiton

ta cuhvon chi ra, tacuhva cha ma sayanga ca ra chuun.

⁹ Ta tyicuan caa tucu nyoho, cacan ndo chi Nyoo. Ta cuhva ra chi ndo. Nanducu ndo ta ñihi ndo. Sacachan ndo yuvehe ta nuña.

¹⁰ Vatyí tatu chican ndo, ñihi ndo. Tatu nducu ndo, ñihi ndo. Ta tatu sacachan ndo yuvehe, nuña yuvehe.

¹¹ Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chahá noo yuu chi sehe ndo tatu chican ndotyín pan. Ta ña tuhvá ndo chaha ndo noo coo chi sehe ndo, tatu chicán ndotyín tiyaca.

¹² Ta ña tuhvá ndo chaha ndo noo tisuhma chi sehe ndo tatu chicán ndotyín ndiví cachi ndotyín.

¹³ Nyoho cha quiñi iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu Mañi yo cha nyaá andiví, cuaha ca cha vaha cuhva ra chi ndo tatu cacan ndo chi ra. Ta cuhva ra Tatyí li ra cunyaa aña ndo.

*Ra xaan ñhi chi ra Jesús catyí ra vatyí chihin fuerza cuihna sacuví ra milagru
(Mt. 12.22-30; Mr. 3.20-27)*

¹⁴ Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva cha quitá tatyí ña vaha cuan chi ra ñihi cuan, nacahan ra. Tyicuan ta ñáyiví, iyo xaan cuñí ñu.

¹⁵ Ta yihí ñu catyí ñu:

—Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

16 Ta yihí ñu cuñí ñu nducu nyehe ñu chi ra, ta chican ñu chi ra Jesús na savaha ra noo seña chi ñu chihin tunyee iñi Nyoo.

17 Soco ra Jesús chitó ra tuhun chicá xiñi ñu. Ta quichaha catyi ra chi ñu:

—Tatu gobiernu ta cacusiin ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha cunyaca ñaha ra. Tatu noo vehe ta cacusiin ñu chihin tahan ñu, cutivi nu nyicú ñu.

18 Ta tyicuan caa tucu cuihna. Tatu tandihi ra cacusiin ra chihin tahan ra cundihi fuerza cha iyó chi ra. Ta ihya catyí chi ndo tyehe caa vatyi nyoho catyí ndo vatyi chihin fuerza ra Beelzebú tavé tatyí ña vaha.

19 Soco tyehe ta tavé tatyí ña vaha tari cuhva catyí ndo, ndaca tuhun ndo chi ra nyicú chihin ndo yóo chi fuerza tavá maa ra tatyí ña vaha. Maa ra sacoto ra chi ndo cha ndicha vatyi nyoho tondo ri chicá xiñi ndo.

20 Soco catyí chi ndo vatyi yuhu tave tatyí ña vaha chihin fuerza Nyoo. Ta cuñí chi catyí cuan vatyi ndicha cuii Nyoo ra nyacá ñaha ñáima ñáyivi cha chaá ra nu nyicú ndo.

Nu sañahá ra Jesús vatyi ñihi ca fuerza Nyoo ta ñima ca fuerza cuihna

21 Tatu noo ra iyó vavaha fuerza chi ra ta nyisó ra mityi ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuvi tinyaa ra suhu.

22 Soco tatu quichi inga ra cha cuaha ca fuerza iyó chi, ta cañi tahan ra chihin ra, ta cuvi chasaha

ra chi ra, tyicuan ta tinyaa ra ndaha tyiño ra, ta sachá ra chi ra tahan ra.

²³ Ñáyiví ña sahá tyiño chihin, sativí ñu tyiño sahi. Ta ñu ña tyinyeé chii cha cahán ñu tuhun Nyoo chihin ñáyiví, cuñí chi catyi vatyí ña chahá ñu cha coto ñáyiví tuhun cahín.

Nu sañahá ra Jesús chi yo yoso caa ndichi tucu tatyí ña vaha inga chaha tatu naa iñi yo chi Nyoo (Mt. 12.43-45)

²⁴ Tatu noo tatyí ña vaha quitá chi noo ñáyiví, chicá noo chi noo ñuhu ityi, nanducú chi noo nu nyitatu chi. Soco ña nañihi maa chi nu nyitatu chi, tyicuan ta ndichi xiñi chi: “Cunuhu tiqui nya vehi nu quite.”

²⁵ Yucuan ta nachaa chi aña nu quitá chi. Ta nanyehe chi vatyí ndi xaan ta vii xaan.

²⁶ Tyicuan ta cua naquehen chi ucha ca tahan tatyí ña vaha cha yaha ca cuhva ta ican saha maa chi. Tyicuan ta ñin ri quihvi tandihí chi aña ñu cuan. Yucuan chaha yaha ca cuhva nanduvi ñu ican saha cha cuví maa ñu —catyí ra Jesús.

Ñu cha ndicha iyó vaha ñáyiví

²⁷ Cha ni ri ca cha cahán ra Jesús tuhun cuan, ta caná chaa noo ñaha cha ñohó mahñu ñáyiví cuan. Ta quichaha catyí ña:

—Ñana cha sií cuví chi ñaha cha sacacu chuun ñaha cha chahá caxun —catyí ña.

²⁸ Soco ra Jesús catyí ra:

—Sií ca cuñí ñu cha chiñí tuhun cahán Nyoo ta quichahá ñu —catyí ra.

Ñáyivi ña vaha, maa ri maa nyatu cahnu cuñi ñu nyehe ñu

(Mt. 12.38-42; Mr. 8.12)

²⁹ Tyicuan ta chaꞗ coyo ñáyivi nu nyaá ra Jesús. Ta quichaha catyí ra chi ñu:

—Ñáyivi cha iyó vityin quiñi xaan iyó ñu. Ta nyiyo iñi ñu. Cuñi ñu nyehe ñu seña ta cha iyo. Soco noo ri cunyehe ñu, tahan cha sacuvi Nyoo chihin ra Jonas.

³⁰ Tari ra Jonás cuvi ra seña chi ñáyivi ñuu Nínive ta cha naha, tyicuan caa tucu yuhu Rayi cha quichi nya gloria, cuví tari noo seña chi ñáyivi cha iyó vityin.

³¹ Quivi tachi tuñi Nyoo chi ñáyivi cunandoto ñaha cuví reina ityi sur ta cha naha, ta cucatyí ña vatyí cahun ndo anyaya, vatyí maa ña vasi cañi ñuu ña, soco quichi ña, quichi tyasoho ña tuhun cha chiñi tuñi cahan ra Salomón. Ta ihya cahnu ca cuví ra cha cahan chihin ndo vityin ta ñima ca ra Salomón.

³² Ta quiwi cutuñi chi tandihi ñáyivi, cunducuita ñu chiyó ñuu Nínive ta cha naha, ta cucatyí ñu vatyí nyoho ñu cha iyó vityin cahun ndo anyaya, vatyí maa ñu ñu Nínive, canasama ñu cuhva iyó ñu quiwi cahan ra Jonás tuhun Nyoo chihin ñu. Ta vityin yuhu ra cahnu ca cahan chihin ndo ta ñima ca ra Jonás.

Nu sañaha ra Jesús vatyí na saha yo cuenda añima yo coto vaha ñahri cha ndichin Nyoo nyaá

(Mt. 5.15; 6.22-23)

³³ Yori ndo tyaa ndo lámpara ta tyihi xehe ndo, o tyihi ndo chichi noo caja. Vatyí ñuhu cuan tahan

chi coso minoo nu sucun. Tacuhva quihvi ñáyivi vehe ndo, soco ndichin.

³⁴ Chiti nuu ndo noo cha sandichin chi ndo cuví. Ta tyicuan caa tucu ñima ndo, tatu iyó cha ndichin Nyoo ñima ndo, vaha ñáyivi cuví ndo. Tatu ñahri cha ndichin Nyoo nyaá tari noo ra cuaa cuví ndo, ña cuví nyehe ndo ityi vaha cha cuahan nu nyaá Nyoo.

³⁵ Yucuan chaha saha ndo cuenda ñima ndo. Tatu nyaá cha ndichin Nyoo chihin ndo, o nyaá cha ñaa ñi.

³⁶ Tatu tyitu ñima ndo chihin cha ndichin Nyoo ñahri ca maa noo nu ñaa ñi iyó chi ndo, vatyí sandichin chi tandihí ndo. Tari cha nyaá noo lámpara sacatá chi ñuhú chi ndo cuví cuan —catyí ra Jesús.

Cahán ra Jesús chi ra casacuaha cuenda ley vehe ñuhu ta chi ra fariseo, ra caquichaha xaan ley cuan (Mt. 23.1-36; Mr. 12.38-40; Lc. 20.45-47)

³⁷ Cuhva cha ndihí cahan ra Jesús nuu ñáyivi, noo ra fariseo, ra quichaha xaan ley vehe ñuhu, catyí ra chi ra Jesús, vatyí na cahun ra cucachi ra nya vehe ra. Ta chaá ra Jesús vehe ra. Ta quihvi ra chicunyaa ra mesa.

³⁸ Tyicuan ta ra fariseo cuan iyo cuñí ra vatyí ña nacatyá ra Jesús ndaha ra, tari cuhva costumbre maa ñu cha cumañi cachi ñu.

³⁹ Soco ra Jesús catyí ra chi ra:

—Nyoho, ra cacuví fariseo, tari cha chata ri vaso ta coho sanduvii nyoho. Soco ityi chichi, quiñi caa. Vatyí ña nacatyá ndo. Tyicuan caa nyoho. Vatyí cuñí ñáyivi vatyí vaha ñáyivi cuví

ndo. Soco xehe ri suhu ndo ta ña sacuví ndo cha vaha.

⁴⁰ Ndava xaan iñi ndo. ¿Atu ña chitó ndo vatyi ra cha savahá ityi chata vaso, suri maa ra savahá ityi chichi? Vatyi tari vaso cuví ndo.

⁴¹ Tahán chi sahá ndo tumañi iñi chi ñáyivi, ta tyinyee ndo chi ñu. Sacuvi ndo cha vaha chihin ñu, tyicuan ta nduvii tucu ityi chichi ndo.

⁴² ¡Ndahvi nyoho ra fariseo! Vatyi nyoho vasi vaha chaha ndo diesmo chi Nyoo cuenda yucu cha nañi menta ta ruda ta ñáá ndihi ca yucu cha tachí ndo, soco ña quichahá ndo cuhva cha vaha cha cuñi Nyoo sacuvi yo, ta cha cuñi yo chi ra. Ta ican ihya cuví cha tahán chi sacuvi ndo, soco ma sandihi ndo cha cuhva ndo diesmo ñandihí.

⁴³ ¡Ndahvi nyoho cha cuví ndo fariseo! vatyi cuñi ndo cunyaa ndo nu tyayu vaha ca chichi vehe ñuhu. Ta cuñi ndo cha saha ñáyivi ñáyivi chi ndo nuyahvi.

⁴⁴ ¡Ndahvi nyoho ra sacuaha cuenda ley, ta nyoho ra fariseo! Vaha sahá ndo chi ndo, soco cuví ndo tari noo ñaña ndiyi cha ña quetuví. Vatyi yahá ñáyivi siqui soco ña chitó ñu ñáá cha ñohó chichi ñaña cuan. Vatyi ñahri seña catuví nu yihí ndiyi cuan. Cuñi maa ñu vatyi vaha ndo, soco ña chitó ñu vatyi ña vaha añima ndo —catyí ra Jesús.

⁴⁵ Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chiin chi nyuhu —catyí ra.

⁴⁶ Tyicuan ta quichaha catyí ra Jesús chi ra:

—¡Ndahvi tucu nyoho ra casacuaha cuenda ley vehe ñuhu! Vatyi sanducuaha ca ndo ley cha tachí

Nyoo ta cha naha. Ta ña tahán chi. Ta yori ndoyó carga cuan, ta saniñi ndo na sacuvi ñu ta ni maa ndo ni chiin ña tyinyee ndo chi ñáyivi.

⁴⁷ ¡Ndahvi nyoho! Vatyí sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu ndo ta cha naha.

⁴⁸ Chihin cuan cuñi chi catyi vatyí ndoó ndo vaha cha sacuvi sutu chahnu ndo ta cha naha. Vatyí sutu ndo cachahñi ra chi ra profeta Nyoo. Ta nyoho sanduvahá ndo ñaña ra.

⁴⁹ Yucuan chaha catyi Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chi ra.

⁵⁰ Ta ndicha tyicuan caa sacuví ndo. Nyoo cutachi tuñi ra chi ndo cha cuenda tandihí ra profeta ra cachahñi sutu chahnu ndo nyata chino ñuhu ñayivi ta nyacua nya vityin.

⁵¹ Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu yatyin nu nyaa arta. Yucuan chaha catyi Nyoo vatyí cutachi tuñi ra chi ñáyivi cha iyó vityin cha catyi cuatyí ñu chiyó ta cha naha.

⁵² ¡Ndahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihvi ñáyivi ityi Nyoo. Ta ni maa ndo ña quihvi ndo nu nyaá Nyoo. Ta ni ri ña chahá ndo cha quihvi inga ñáyivi cha cuñi quihvi —catyi ra Jesús.

⁵³⁻⁵⁴ Ndihi cahan ra Jesús tuhun cuan, ta quitá ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi

cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí síqui ra.

12

Nu sañahá ra Jesús vatyí ma cuví tixehe yo cuatyí yo

¹ Cuenda mil ñáyivi ndu ñin ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cachicá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyi sahá ra tyi vaha ra. Soco ma cuví tixehe ra cuatyí ra.

² Vatyí ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyí ma coto ñáyivi.

³ Yucuan chaha ñáá ndihi tuhun cha cahán ndo nu xehe, cuquita chi nu ndichin. Ta ñáá ndihi tuhun cha cahan ndo chichi vehe ndo, cucuiñi tandihi ñáyivi noo quivi.

¿Yóó chi tahán chi cuyuhvi yo, chi ñáyivi o chi Nyoo?

(Mt. 10.28-31)

⁴ Ta catyí chi ndo cha cuví ndo ra tahin, vatyí ma yuhvi ndo chi ra chahñi coño ñuhu ri. Vatyí yaha tuhun cuan ta ñahri ca cha cuví sacuvi ra.

⁵ Soco cua catyí chi ndo yóó chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñayivi ndo. Ta yaha cuan ta cuví tyihi ra aña ndo anyaya.

⁶ 'Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihi ri ti, Nyoo ña naa iñi ra chi ni noo ti.

⁷ Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

Ma yuhvi yo cahán yo tuhun ra Jesucristo nuu ñáyivi

(Mt. 10.32-33; 12.32; 10.19-20)

⁸ 'Catyí chi ndo vatyí nya ndo cahán ndo tuhin chihin ñáyivi, tyicuan caa tucu cucahin tuhun ndo nuu ángel Nyoo gloria. Vatyí yuhu Rayi cha quichi nya gloria cuví.

⁹ Soco nya nyoho cha cahán nuu ndo cahán ndo tuhin chihin ñáyivi, tyicuan caa tucu yuhu, ma cahin tuhun ndo nuu ángel cuenda Nyoo.

¹⁰ Ta vasi cahán ñáyivi chi yuhu Rayi cha quichi nya gloria, Nyoo cusaha ra tucahnu iñi chi ñu. Soco yóo cha cahán ña vaha siqui Tatyí Ii Nyoo ma ñihi ñu tucahnu iñi cuenda cuan.

¹¹ 'Cuhva cha cunyaca ñáyivi chi ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo.

¹² Vatyí cuhva cha cua nacahan ndo, yucuan cuhva cuhva maa Tatyí Ii Nyoo ñáá tuhun tahán chi nacahan ndo —catyí ra Jesús.

Nu chahá ra Jesús cuhva vatyí ña tahán chi cunyicon yo cha tyayí

¹³ Noo ra cha ndihi chihin ñáyivi cuaha cuan, catyí ra chi ra Jesús:

—Maestro, catyi chi yañi vatyí natahvi sava ra cha tyayii cha sandoo sutu ndi chi ndi —catyí ra.

¹⁴ Tyicuan ta catyí ra Jesús chi ra:

—¿Yóó cha tyiso chi yuhu cha cuví juez ta catyi ndo vatyí tahvi sava yuhu cha chii ndo? —catyí ra.

¹⁵ Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayii. Vatyí ña chiñuhú ri cha coo cuaha ndaha tyiño yo tacuhva coo vaha yo ñayivi —catyí ra.

¹⁶ Tyicuan ta chaha ra Jesús noo cuhva ihya chi ñu:

—Chiyó noo ra tyayii. Ta cuaha xaan tyiño sahá ra iyó.

¹⁷ Tyicuan ta ndichi xiñi ra: “¿Yoso caa cusacuvi? Ñahri nu naquehen vahi tandihi tyiño sahi.

¹⁸ Soco cha chité yoso caa cunyacuvi. Cusatani yaca nyihi nu yihí niñi, vatyí nyihi xaan. Ta cusavahi cha nahnu ca. Ta yucuan cunaquehen vahi tandihi maa niñi cha cuquita nu iyó tyiño sahi.

¹⁹ Tyicuan ta cuaha cuiya ma saha tyiño que. Cunyatati ta cusii cuñi. Ta cachi vahi. Ta cuchoh vahi”, ndichi xiñi ra.

²⁰ Soco catyí Nyoo chi ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóó chi cua ndoo?”

²¹ Tyicuan caa cuvi chi ñáyivi cha sacayá tandihi cha tyayii soco ñahri maa iyó chi ñu nuu Nyoo —catyí ra Jesús.

Ma caca xaan iñi yo ñáá ndihi cha chiñuhú chi yo (Mt. 6.25-34)

²² Tyicuan ta quichaha catyí ra Jesús chi ra cacticá noo chihin ra:

—Catyí chi ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahna cuihno ndo.

²³ Vatyí yahvi ca nyaá ñayiví yo ican saha cha cachi yo. Ta yahvi ca nyaá coño ñuhu yo ican saha cha cuihno yo.

²⁴ Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo chahá ra cha cachi ti. Ta nuu Nyoo yahvi ca nyaá nyoho ta ñima ca saa.

²⁵ Ta vasi chicá xaan xiñi ndo soco ma cuvi sandusucun ca ndo ni chiin ca chi ndo.

²⁶ Tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun tandihí ca cha chiñuhu chi ndo?

²⁷ Saha ndo cuenda yoso caa iyó tu ita vatyí ña sahá tyiño tun. Soco catyí chi ndo vatyí ni rey Salomón chihin tandihí cha tyayí ra ta ña tyaqui cha ñihnó ra tari cha sacuihno Nyoo chi tu ita cuan.

²⁸ Tatu tyicuan caa sacuihnó Nyoo chi tun ita cha iyó nu chiqui vityin, ta tyaan cucayu tun chichi horno, ta nyaca cuví chi nyoho ta ma sacuihno ra. Soco maa ndo ña chinó vaha iñi ndo chi ra.

²⁹ Ma caca xaan xiñi ndo tuhun cha cachi ndo ta cha coho ndo.

³⁰ Vatyí ñayiví cha ña chinó iñi chi Nyoo chicá xiñi ñu tuhun ihya. Soco nyoho chinó iñi ndo chi Sutu yo Nyoo ta maa ra chító ra ñáá cha chiñuhú chi ndo.

³¹ Vaha ca cha nanducu ndo yoso caa nacuhva cuenda ndo chi ndo chi Nyoo vatyí cunyaca ñaha

ra añima ndo. Ta tyicuan caa ta ñihi ndo tandihí cha chiñuhú chi ndo.

*Cha vaha cha iyó gloria
(Mt. 6.19-21)*

³² Ma yuhvi nyoho, mbee sane. Vasi ña cuaha ndo soco Sutu yo Nyoo cuñí ra chi ndo. Yucuan chaha cucuhva ra quihvi ndo nu nyacá ñaha ra.

³³ Xico ndo cha iyó chi ndo. Ta cuhva ndo chi ñu ndahvi. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan. Vatyí ni ri ra suhu, ni quití, yori cha sativí iyó yucuan.

³⁴ Vatyí nuu cunyaa cha tyayí ndo, yucuan cuví nu nyaá xiñi ndo. Ta yucuan cucunyaa añima ndo —catyí ra.

*Nu sañahá ra Jesús chi yo yoso caa cuatu tuhva yo
chi ra quiví quichi ra inga chaha*

³⁵ Cuatu tuhva vaha ndo quiví quichi inga chaha.

³⁶ Ta cuvi ndo tari musu cha canyatú tuhva chi chitoho ñáá cuhva ndichi ra cha cuahan ra noo vico tandaha. Ta nyatú tuhva ra, vatyí tacuhva tañi tyehe ri nuña ra yuvehe cuhva cha sacachan chitoho ra cha nachaa ra.

³⁷⁻³⁸ Ta caa cuhva ri cuan sii xaan cuñí ra nyehe ra chi ra. Vatyí nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatyaa ra chi musu cuan yuhu mesa ta cacachi ra. Tyicuan ta sii xaan cucuñi musu cuan. Vatyí tyicuan caa nyacuví chitoho ra chihin ra.

³⁹ Ta coto ndo tuhun ihya vatyí tatu noo chitoho noo vehe, ta coto ra ñáá cuhva cuquihvi

ra suhu vehe ra, saha ra cuenda vehe ra. Ta ma cuhva ra quihvi ra suhu cuan chichi vehe ra. Vatyí coto quehen ra tandihí cha iyó chi ra.

⁴⁰ Ta tyicuan caa cuví tucu nyoho, cuatu tuhva ri ndo. Vatyí yuhu Rayíi cha quichi nya gloria, sana ri ñni ndo ta cuquichi —catyí ra Jesús.

Musu vaha ta musu ña vaha
(Mt. 24.45-51)

⁴¹ Tyicuan ta quichaha ndaca tuhun ra Pedro chi ra Jesús:

—¿Yóó chi cuenda cahun tuhun ihya? ¿Atu cha cuenda maa ri maa ndi, o cha cuenda tandihí ñáyivi?

⁴² Tyicuan ta nacahan ra Jesús, ta catyí ra chi ra:

—Musu cha tyasohó tuhun cahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri cuhva chahá ra cha cachi tandihí ca musu cuan.

⁴³ Ta sñi xaan cuví chi musu cuan tatu cuhva cha sahá tyiño ra, ta nachaa chitoho ra. Vatyí quichaha ra tandihí cha tahán chi sacuvi ra.

⁴⁴ Ta catyí chi ndo vatyí cha ndicha cuví. Vatyí chitoho ra cunatyaa ra tandihí cuii cha cumí ra ndaha ra. Vatyí vaha quichahá ra chihin tyiño sahá ra.

⁴⁵ Soco tatu chicá xiñi musu cuan vatyí naha xaan cuahan chitoho ra, ta quichaha nyacuvi ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñí ra sahá tyiño ra. Tyiño chachí ta tyiño chihí ndixi iyó ra.

⁴⁶ Tyicuan ta sana ñni ra ta ndichi chitoho ra quivi cha ña nyatú ra chi ra noo cuhva cha ña chito ra. Tyicuan ta cutachi tuñi chitoho ra chi ra,

tari tuhva maa ra chihin musu cha ña quichahá
tuhun cahán ra.

47 "Ta noo musu cha chitó yoso caa iyó chitoho
ta ña sacuvi tari cuhva cuñi chitoho ra, cuaha
xaan tundoho cunyehe ra.

48 Soco tatu noo musu cha ña chitó ta sacuvi ra
cha ña vaha, tachi tuñi chitoho ra chi ra. Soco
chiin ri, vatyí ña chitó ra, ta chinyacuví ra. Tatu
noo musu ta cuaha cha chaha chitoho ra chi ra,
cuaha tahán chi nacuhva cuenda ra chi chitoho
ra. Ta ra cha cuaha xaan nyaá ndaha, cuaha xaan
tahán chi nacuhva cuenda ra chi chitoho ra.

*Nu catyí ra Jesús vatyí cha catyí ra cucañi tahan
ñáyiví chihin tahan ñu
(Mt. 10.34-36)*

49 "Tari cha sanatahín ñuhu síqui ñuhu ñáyiví,
tyicuan caa cuví tyiño vachi. ¡Ñana cha cuñi cha
nacayu catyin ri ñuhu ihya!

50 Vatyí nyaá yahi noo tundoho cahnu, ta ñana
cha nyehí tundoho nyacua nya ndihi tyiño sahí.

51 Cuñi maa ndo vatyí cha vachi cuhve cha taxi
ri coo ndo síqui ñuhu ñáyiví ihya. Soco yuhu vachi
vatyí sasiin chi ndo.

52 Vatyí cha vityin ta ityi nuu ca, ohon ñáyiví
noo vehe cucusiin ñu. Uñi ñu cañi tahan chihin
uvi ñu. Ta uvi ñu cucañi tahan chihin uñi ñu.

53 Ta ra cuví sutu, cucañi tahan ra chihin sehe
ra. Ta ra cuví sehe cucañi tahan ra chihin sutu ra.
Ta ñu cuví sihi cucañi tahan ñu chihin sehe ñu. Ta
ñu cuví sehe cucañi tahan ñu chihin sihi ñu. Ta ñu
cuví tyiso cucañi tahan ñu chihin chono ñu. Ta ñu
cuví chono cucañi tahan ñu chihin tyiso ñu
—catyí ra Jesús.

Nu catyí ra Jesús chi ñáyiví vatyi ña nacotó ñu vatyi cha chaa quiví cha quichi Sehe Nyoo (Mt. 16.1-4; Mr. 8.11-13)

⁵⁴ Catyí tucu ra Jesús chi ñáyiví cuaha cha nyicú yucuan:

—Tatu cha nyehe ndo vatyi cha ndihví vico, catyí ndo vatyi cua coon savi. Ta tyicuan caa cuví.

⁵⁵ Tatu cha nyehe ndo vatyi cha caá tatyí ityi tyañuhu, catyi ndo vatyi cha chaa quiví ihñi. Ta tyicuan caa cuví.

⁵⁶ Nyoho sahá ndo tyi chitó ndo, ta nacotó ndo tandihí tuhun andiví, ta tandihí tuhun ñuhu ñayiví. Soco ¿ñáá tuhun cha ña nacotó ndo ñáá tyembu nyaá ndo vityin?

Nducu yo cuhva yoso caa coo vaha yo chihin ra chicán cuatyi chaha yo coto cuhun yo vehe caa (Mt. 5.25-26)

⁵⁷ ¿Ñáá tuhun ña sahá ndo cuenda nya cha vaha ta nya cha ña vaha?

⁵⁸ Tatu noo ra chicán cuatyi chahun ta cuahun chihin ra nu nyaá ra cuví tyiño, ityi cuahun nducun cuhva ni coo vahun chihin ra cha cumañi ca chaa ndo nu nyaá ra cuví tyiño. Coto nacuhva cuenda ra chuun chí juez. Ta juez cuan cunacuhva cuenda ra chuun chí policía. Ta policía cuan cutyihí ra chuun chí chichi vehe caa.

⁵⁹ Tatu tyicuan caa cuví, catyí chuun vatyi ma quiton nyacua nya tyiyahvun tandihí cha tahán chí tyiyahvun —catyí ra Jesús.

13

Cuñi chi cha nasama yo cuhva iyó yo o cunyehe yo tundoho

¹ Tyicuan ta suri quivi cuan canyicu suhva ra. Ta quichaha canacatyí ra chi ra Jesús yoso caa cha nyacuvi ra Pilato chihin suhva ra Galilea. Vatyí tyihi ra tyiño na cucahni sindaro chi ra Galilea cha cachaha ofrenda chi Nyoo vehe ñuhu. Ta nasaca ra niñi ra cuan chihin niñi quití cha cua cuvi ofrenda cuan.

² Ta nacahan ra Jesús ta catyí ra chi ra:

—¿Atu chicá xiñi nyoho vatyí cahnu xaan ca cuatyí ra Galilea cuan cha nuu tandihí ra ityi ñuu ra. Ta yucuan chaha cachihí ra?

³ Ñima. Vatyí tatu nyoho ta ma nasama ndo cuhva iyó ndo, tyicuan caa tucu cunaa nyoho.

⁴ Ta ndi chahun uñi ra cachihí cha canacava torre Siloé cuan siqui ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñi maa ndo?

⁵ Ñima. Vatyí tatu nyoho ta ma nasama ndo cuhva iyó ndo, cunaa tucu nyoho.

Nu catyí ra Jesús noo cuhva yoso caa nyatú Nyoo cha nasama yo cuhva iyó yo

⁶ Tyicuan ta chaha ra Jesús noo cuhva. Ta catyí ra:

—Noo ra iyó yutun cha nañi higo chi ra. Ta nanyaá tun nu ñuhú ra. Ta chahan ra chinyehe ra tatu iñi chiti tun. Ta nanyehe ra vatyí ñahri.

⁷ Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo

chi tun. Vatyí ¿ñáá ri tuhun sayangá tun nu ñuhú ihya? Vatyí ñahri chiti chahá tun”, catyí ra.

⁸ Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityin. Na cuinanyaa maa tun nonga cuiya ihya. Cusanduvite ñuhú chaha tun ta cutyihí ñuhú tyahyu.

⁹ Vasi tyicuan caa ta cuhva tun chiti. Soco tatu ña chaha tun chiti, tyicuan ta cahnya yo chi tun”, catyí ra.

Quivi nyitatu ñáyivi sanduvaha ra Jesús chi noo ñaha tihí chata

¹⁰ Noo quivi cha nyitatu ñáyivi sañahá ra Jesús chi ñu chíchi vehe ñuhu.

¹¹ Ta yucuan nyaá noo ñaha cha yihí tatyí ña vaha chi. Ta cha chahun uñi cuiya cuhví ña cha ndutihí chata ña. Ta ña cuví ndundoo ña.

¹² Tyicuan ta nanyehe ra Jesús chi ña. Ta cana ra chi ña. Ta quichaha catyí ra chi ña:

—Cha nduvahun. Ñahri ca cuehe ndohún
—catyí ra chi ña.

¹³ Tyicuan ta tyiso ra ndaha ra siqui ña. Ta caa cuhva ri cuan ta ndundoo ña. Tyicuan ta quichaha sacahnu ña chí Nyoo.

¹⁴ Soco ra cuví nuu vehe ñuhu, cuxaan xaan ra. Vatyí quivi nyitatu ñáyivi sanduvaha ra Jesús chi ña. Ta quichaha catyí ra chí ñáyivi canyicú cuan:

—Iyo iñu tahan quivi tahan chí saha tyiño yo. Yucuan quivi quichi ndo quichi cuví tatan chí ndo. Ta ma quichi ndo quivi nyitatu yo —catyí ra.

¹⁵ Tyicuan ta ra Jesús quichaha catyí ra chí ra:

—Nyoho cha sahá ndo tyi vaha ndo. ¿Atu ña ndachi tucu nyoho quiti sana ndo vatyi sacoho ndo ndutya chi ti quivi nyitatú yo?

¹⁶ Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuhñi ña chihin cuehe ihya sahá ra ña vaha. Ta yori ndachi chi ña. ¿Atu ña tahán chi ndachi yo chi ña vasi quivi nyitatu yo? —catyí ra Jesús.

¹⁷ Tyicuan ta cuhva cha catyí ra Jesús tuhun cuan, tandihi maa ra xaan iñi chi ra cahan cuvi nuu ra. Soco tandihi maa ñáyivi cusii cuñi ñu chihin cha cahnu cha sacuvi ra Jesús.

Nu catyí ra Jesús vatyi tari noo chiti mostaza cuvi cha nyacá ñaha Nyoo aña yoo
(Mt. 13.31-32; Mr. 4.30-32)

¹⁸ Tyicuan ta quichaha catyí ra Jesús:

—¿Ñáá chihin sandiqui tahin cha nyacá ñaha Nyoo aña yoo? ¿Ñáá chihin sandu inuu ri yo?

¹⁹ Tari noo chiti mostaza, tyicuan caa cuvi. Vatyi noo ra tachi ra noo chiti nu ñuhú, ta chahnu tun. Ta cuvi tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyi tari yuchan iya tyicuan caa cuvi cha nyacá ñaha Nyoo aña yoo
(Mt. 13.33)

²⁰ Tyicuan ta quichaha catyí ra Jesús inga chaha:

—¿Ñáá ca chihin sandu inuu ri yo yoso caa nyacá ñaha Nyoo aña yoo?

²¹ Cuví chi tari noo yuchan iya cha nasaca noo ñaha sihi chihin uñi cuhva yutyi pan. Vatyi tari

ndaa pan cuan chihin yuchan iya cuan, tyicuan caa cuahan nducuaaha ca ñu nyacá ñaha Nyoo aña —catyí ra.

Yuvehe tihin ta ityi cuiñi cha cuahan nu nyaá Nyoo (Mt. 7.13-14, 21-23)

²² Ityi cuahan ra Jesús Jerusalén cahán ra tuhun Nyoo chihin ñáyivi tandihí ñuu nu yahá ra.

²³ Ta quichaha ndaca tuhun noo ra chí ra:
—¿Atu ña cuaha maa ñáyivi cucacu aña?
—catyí ra.

Tyicuan ta nacahan ra Jesús, ta catyí ra:

²⁴ —Nanducu ndo cuhva quihvi ndo yuvehe tihin. Vatyí yíi xaan quihvi ndo nu nyacá ñaha Nyoo. Vatyí cuaha xaan ndo cha cucuñi ndo quihvi ndo yucuan. Ta ma cuvi.

²⁵ Vatyí tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú ndo ityi chata cusacachan ndo yuvehe, ta cucatyí ndo: “Nuña yuvehe.” Ta ra cuan cucatyí ra chí ndo: “Ña chité nya ityi quichi nyoho.”

²⁶ Tyicuan ta nyoho cucatyí ndo: “Nyuhu chachí ndi ta chíhi ndi chuhun. Maun sañahun tuhun Nyoo chí ndi ityi nu nyaá vehe ndi”, cucatyí ndo chí ra cuan.

²⁷ Soco ra cuan cunacahan ra chihin ndo ta cucatyí ra: “Cha catyí chí ndo vatyí ña chité nya ityi quichi nyoho. Canyaha ndo nu nyai, tandihí nyoho ñu nyacuví cha ña vaha”, cucatyí ra chí ndo.

²⁸ Yucuan ta cuacu ndo ta sacahñi noho ndo cha nyehe ndo chí ra Abraham ta chí ra Isaac ta chí ra Jacob, ta chí tandihí ra profeta Nyoo cha

chiyo ta cha naha. Vatyí canyicú ra nu nyacá ñaha Nyoo. Ta nyoho ndoo ndo ityi chata.

²⁹ Ta cuquichi ñáyiví ityi tyañuhu, ta ityi norte, ta ityi nu caña ñanyii, ta ityi nu quee ñanyii. Ta cunyicu ñu cachi ñu chihin Nyoo nu nyacá ñaha ra.

³⁰ Ta yóo ñu cha cuñí cuhun ityi nuu, ican ñu cuhun nu ndihí. Ta ñu cuahan nu ndihí, ican ñu cuhun ityi nuu —catyí ra.

*Nu nducuihya iñi ra Jesús nyehé ra chi ñáyiví ñuu Jerusalén
(Mt. 23.37-39)*

³¹ Suri maa quiví cuan chaꝯ coyo suhva ra fariseo. Ta catyí ra chi ra Jesús:

—Quita ihya vatyí ra Herodes cuñí ra cahñi ra chuun —catyí ra.

³² Soco ra Jesús quichaha catyí ra chi ra:

—Cuꝯhan ndo ta catyí ndo chi ra ñucuii quiñi iyó cuan, vatyí nyacua nya nu chaa maa chi quiví cha ndihí tyiño sahi cha tave tatyí ña vaha ta cha sanduvahi chi ñu cuhví, tyicuan ta cundihí tyiño sahi.

³³ Soco nya tahán chi cha ndihí maa tyiño sahi, tyicuan ta cuhun mai cucúvi nya Jerusalén. Vatyí ma cuvi cha cúvi noo ra profeta Nyoo ityi chata Jerusalén.

³⁴ ¡Ndahvi nyoho ñáyiví Jerusalén! vatyí chahñí ndo chi ra profeta ra cachahá cuenda tuhun cahán Nyoo chi ndo. Ta tuchi ndo yuu chi tandihí ra cha saquichí Nyoo nu nyicú ndo. Ta yuhu cuaha xaan chaha cuñí saha cuende chí ndo tari noo ndiví cha sahá cuenda ti chí sehe ti, ta

naquehen vaha ti chi ti chichi ndichin ti. Soco maa ndo ña cuñi ndo.

³⁵ Nyehe ndo vityin vatyi cha sandoj chi ndo. Ta catyí chi ndo vatyi ma nyehe ca ndo chii nyacua nya chaa chi quivi cuacatyí ndo vatyi cahnu xaan ra vachi chihin sivi Nyoo —catyi ra Jesús.

14

Nu sanduvaha ra Jesús chi noo ra cuhvi cha yihí cuiño chi

¹ Cuví chi noo quivi nyitatú ñáyivi. Ta ra Jesús cuahan ra cua cachi ra vehe noo ra cuví nuu chi ra fariseo. Ta suhva ca fariseo cuan cañañi ra chi ra Jesús tatu ñáá cha ña vaha cunyacuvi ra.

² Yucuan ta nuu ra Jesús nyaá noo ra cuhvi cha yihí cuiño chii.

³ Tyicuan ta quichaha catyi ra Jesús chi ra casacuaha ley vehe ñuhu ta chi ra fariseo:

—¿Atu vaha sanduvaha yo chi ñáyivi cuhvi quivi nyitatú yo? —catyí ra.

⁴ Tyicuan ta tandihi ra cuan, taxi taxi cacuvi ra. Yucuan cuví nu tyiso ra Jesús ndaha ra siqui ra cuhvi cuan. Ta sanduvaha ra chi ra. Ta natachi ra chi ra na cunuhu ra.

⁵ Tyicuan ta quichaha catyi ra Jesús chi ra fariseo:

—Tatu canacava noo burru sana ndo, o nonga quití sana ndo chichi noo xahva, ¿atu ma cutava ndo chi ti tañi tyehe ri, vasi quivi nyitatú yo cuví? —catyí ra.

⁶ Tyicuan ta inga chaha tucu taxi cuii ri nicunyicu ra fariseo. Vatyi ña ñihi ca ra tuhun nacahan ra.

Nu sañaha ra Jesús chi yo vatyí ma cahnu saha yo chi yo

⁷ Cha nyehe ra Jesús vatyí tandihí ra canyicú vico cuan nacachí ra tyayu vaha ca cunyaa ra. Tyicuan ta quichaha chaha ra tuhun ihya chi ra:

⁸ —Nya quívi cuhun ndo vico tandaha, ma nanducu ndo tyayu vaha ca cunyaa ndo. Vatyí coto quichi inga ra cha cahnu ca cuvi ican saha ndo,

⁹ ta coto quichi ra cha nacatyí tuhun ta catyí ra chuun: “Cuhva tyayu chiña. Vatyí cunyaa ra ihya.” Tyicuan ta yoho chihin cha cahán nuun, ta cuhvon. Yucuan ta cunyaun nu ndihí.

¹⁰ Soco catyí chi ndo, vatyí nya quívi nacatyí tuhun ra chi ndo, cunyaa ndo noo nu ñima rí tuhun. Vatyí quichi maa ra cha nacatyí tuhun chi ndo ta catyí ra chi ndo: “Ra tahin, ñaha, cunyaun nu tyayu vaha tyehe.” Ta tyicuan caa sacucahnu ra chuun nu ñáyivi nyicú yuhu mesa chuhun.

¹¹ Vatyí yóó ra cha cahnu sahá chii, cuquehen ra ticahan nuu. Ta yóó ra cha ndahvi sahá chii, cahnu cucuvi ra —catyí ra Jesús.

¹² Tyicuan ta quichaha catyí tucu ra chi ra nacatyí tuhun chi ra:

—Nya quívi coo vico vehun, ma nacatyí tuhun chi ra tahun, ní chi yañun, ní ri chi ñáyivi chuun, níri chi ñu nyicú yuvehun ñu tyayí. Vatyí ñu cuan cuví nacatyí tuhun ñu chuun, na coo tucu vico vehe maa ñu. Tyicuan ta nacahnya ñu cuenda cha chahan ñu vico vehun.

¹³ Soco cua catyí chuun vatyí nya quívi coo vico vehun, nacatyí tuhun chi ñu ndahvi, chi ñu cuhví, chi ñu coxo, ta chi ñu cuaa.

¹⁴ Tyicuan ta s̄i cuví chuun, vatyí ñu cuan ma cuvi natyiahvi ñu chuun. Soco cuñihun yahvun quiví cunandoton chihin ñáyiví vaha.

*Nu chah̄a ra Jesús noo cuhva yoso caa nacatyí
tuhun ra chi yo vatyí quihvi yo nu nyacá ñaha Nyoo
(Mt. 22.1-10)*

¹⁵ Ta chiñi noo ra cha nyaá yuhu mesa cuan tuhun cahán ra Jesús. Ta quichaha catyí ra chi ra:
—S̄i xaan cuvi chi ñu cachi nu nyacá ñaha Nyoo
—catyí ra.

¹⁶ Tyicuan ta catyí ra Jesús:
—Noo ra cuan savah̄a ra noo vico cahnu
vavaha vehe ra. Ta nacatyí tuhun ra chi cuaha
xaan ñáyiví.

¹⁷ Tyicuan ta chah̄a cuhva cha cuxiñi ñu, ta tach̄i
ra chi musu ra nacana ra chi ñu. Vatyí cha chah̄a
cuhva cha cuxiñi ñu.

¹⁸ Soco tand̄ih̄i ñu cuan quichaha catyí ñu vatyí
ma cuhun ñu. Ta noo ra cuan catyí ra: “Ni sate
noo ñuhú. Ta cuñí chi cuhin cunyehi. Ican tuhun
chiquén na saha ra tucahnu iñi chii vatyí ma
cuhin.”

¹⁹ Tyicuan ta inga tucu ra cuan catyí ra: “Ni sata
cui ri ohon tahan yunta quiti. Ta cuhin cunyehi
tatu vaha ti. Ican tuhun chiquén tumañi iñi chi ra
na saha ra tucahnu iñi chii, vatyí ma cuvi cuhin.”

²⁰ Tyicuan ta inga tucu ra cuan catyí ra: “Ni
nd̄ih̄i tand̄ahi, ta ma cuvi cuhin”, catyí ra.

²¹ Tyicuan ta musu ra cuan cuanuhu ra. Ta
nacatyí ra tand̄ih̄i tuhun cuan chi ra cha tach̄i chi
ra. Cha chiñi ra savaha vico cuan cha tyicuan caa,
ta cuxaan xaan ra. Ta catyí ra chi musu ra:
“Cuahan tand̄ih̄i maa ityi. Ta quichi nyacon chi

ñu ndahvi, chi ñu cuhví, ta chi ñu coxó, ta chi ñu cuaa”, catyí ra.

²² Ta cha yahá nachaa musu cuan ta catyí ra chi ra cha tachí chi ra: “Cha sacuví tandihí maa cha catyún. Ta nuñá ca chichi vehe”, catyí ra.

²³ Tyicuan ta chitoho ra catyí ra chi ra: “Cuahan cua nducu ca chi ñu tandihí maa ityi. Ta saníñun chi ñu na quichi coyo ñu, vatyí na cutu chichi vehi.

²⁴ Vatyí catyí chuun vatyí ni minoo ñu cha nacatyí tuhín cha xihna ri, ma cachi ñu chihin” —catyí ra Jesús.

Cuaha xaan tundoho nyehe yo tatu cuenda ra Jesús yihí yo

(Mt. 10.37-38)

²⁵ Cuaha xaan ñáyiví nyicón chi ra Jesús. Tyicuan ta nanyehe ra chi ñu, ta quichaha catyí ra:

²⁶ —Tandihí nyoho cha nyicón ndo chii, tatu cuñí ca ndo chi ñáyiví chi ndo ican saha chi yuhu, ñima cuende yihí ndo. Ta tatu cuñí ca ndo chi maa ndo ican saha chi yuhu, ñima cuende yihí ndo.

²⁷ Vatyí nya nyoho cha ña cuñí ndo nyehe ndo tundoho cha cunyicon ndo chii, ña tahán chi cuví ndo ñu cuende, vatyí cha nyehe ndo tindoho yucuan cuví cruzi cha tahán chi cuiso ndo.

²⁸ Vatyí tatu nya nyoho cuñí ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan.

²⁹ Vatyí tatu quichaha sacacu ndo vehe cuan, ta quichaha ña cuví sandihí ndo vatyí ñahri ca xuhun ndo, cuacu nyaa ñáyiví chi ndo.

³⁰ Ta cuacatyí ñu: “Ra cuan quichaha savaha ra vehe ra, ta ni ña cuví sandihí ra”, cuacatyí ñu.

³¹ O tatu noo rey cha cuñí cañi tahan chihin inga rey ¿atu ña chicunyaa xihna ra ta ndichi xiñi ra tatu ñihi uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan?

³² Tatu chitó ra vatyí ma cuvi chasaha ra chi inga rey cuan, tyicuan ta cañi ca vachi rey cuan, ta tachi ra chi noo musu ra vatyí cucatyí ra chi rey cuan na ndihí tuhun yucuan ri.

³³ Ta tyicuan caa cuví chi nyoho. Tatu ma cahnya iñi ndo tandihí maa cha cuñi ndo ta cha cumi ndo, ma cuvi cunyicon ndo chii.

Nu sañahá ra Jesús vatyí tari ñi cha ndihí cha uhva, tyicuan caa cuvi yo tatu ndu uvi iñi yo cha chino iñi yo chi ra

(Mt. 5.13; Mr. 9.50)

³⁴ Vaha ñi vatyí sacu uhva chi cha cachi yo. Soco tatu ndihí cha uhva chi, ña vaha ca chi.

³⁵ Ñahri ca tyiño cuví saha chi. Ta sacuita yo vatyí ña vaha ca. Nya nyoho cha cutuñi iñi ndo, tyasoho ndo tuhun cahín —catyí ra Jesús.

15

Nu sañahá ra Jesús vatyí tari mbee cha cuanaa tyicuan caa cuvi yo

(Mt. 18.10-14)

¹ Tandihí ra tavá xuhun cuenda gobiernu ñuu Roma, ta ra iyó cuatyí, tuhva ra nu nyaá ra Jesús, tacuhva cuiñi ra tuhun cahán ra.

² Tyicuan ta ra fariseo ta ra casacuaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachí ra chihin ra —cacatyí ra.

³ Tyicuan ta ra Jesús caḥan ra noo cuhva ihya, ta catyí ra:

⁴ —Ta nya nyoho cha iyó noo cientu mbee sana ndo, tatu cuanaa noo ti, ¿atu ma sandoo ndo chi tandihí ca ti cuan nu chiqui. Ta cunanducu ndo chi quití cha cuanaa cuan, nyacua nya cha nañihi ndo chi ti?

⁵ Ta cuhva cha nañihi ndo chi ti, ta natyiso soco ndo chi ti. Ta sñi vavaha cuví chi ndo.

⁶ Ta cuhva cha nachaa ndo vehe ndo, ta ndu ñin ri ndo chihin ra tahan ndo ta chihin ñu nyicú yatyin yuvehe ndo, yucuan ta catyi ndo chi ñu vatyí na cusñi cuñi ñu chihin ndo vatyí nañihí ndo chi mbee sana ndo cha chinaa.

⁷ Ta ihya catyí chi ndo, vatyí sñi xaan ca cuvi chi ángel Nyoo andiví cha catyi noo ra cha iyó cuatyí ta nasama cuhva iyó ra, ta ñima ca cha catyi ndi cumi xico chahun cumi tahan ñáyiví cha ñahri cuatyí.

Ñaha sihi cha cuanaa xuhun ta nañihí ña

⁸ Ta catyí chi ndo, tatu iyó noo ñaha cha iyó uchi tahan xuhun ña, ta tatu cuanaa noo xuhun ña, tyaa ña noo candil. Ta tihví ña tandihí cuii maa chichi vehe ña. Ta nanducu ña tandihí cuii nyacua nya cha nañihi ña xuhun cuan.

⁹ Ta cuhva cha yaha nañihí ña, cuahan ña cua nanducu ña chi ñaha tahan ña, ta ñáyiví cha nyicú yuvehe ña, ta catyi ña chi ñu: “Cusñi cuñi ndo chihin vatyí cha nañihí xuhin cha chinaa”, catyí ña.

¹⁰ Ta catyí chi ndo vatyí tyicuan caa s̄i cuví chi ángel Nyoo cha catyí noo ra iyó cuatyí ta ndu uvi ñi ra cuatyí ra —catyí ra Jesús.

Nu sañahá ra Jesús yoso caa cuñi Nyoo chi noo ra ndu uvi ñi cuatyí

¹¹ Tyicuan ta quichaha catyí tucu ra Jesús cuhva ihya:

—Noo ra, chiyo uvi tahan sehe ra.

¹² Ta noo chaha, ra luhlu ca cuan catyí ra chi sutu ra vatyí nacuhva ra cha tahán chi chi ra. Tyicuan ta sutu ra chaha ra chi ñinduvi sehe ra.

¹³ Ta ña cuaha ri quiví cuan ta ra luhlu ca cuan xico ra tandihí cuí maa cha chaha sutu ra chi ra. Ta sandu ñn ri ra xuhun ra, ta quehen ra ityí ta cuahan ra noo ñuu cañi. Ta yucuan chiyo ra, sanaa ra tandihí maa xuhun ra chihin tusi ñi. Ta quiñi xaan chicá noo ra.

¹⁴ Tyicuan ta chaa noo tama ityí nu iyó ra. Ta quichaha chisoco ra vatyí ndihí xuhun ra sanaa ra.

¹⁵ Tyicuan ta chahan ra chican ra tyiño chi noo ra ñuu cuan. Ta ra cuan tachí ra chí ra noo nu iyó quini sana ra, vatyí cusaha cuenda ra chí ti.

¹⁶ Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuvi ñi ra cachi ra cha cachachí quini cuan soco yori maa chaha cha cachi ra.

¹⁷ Tyicuan ta nichon ñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chí ra. Ta yuhu cuñi cúvi soco ihya.

¹⁸ Vityin cunuhin nu nyaá suti. Ta catyí chí ra tyi chicoo cuatyí nuu Nyoo ta nuu maa ra.

19 Ta ña naña que cha cuvi sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

20 Tyicuan ta quehen ra ityi cuanuhu ra nya vehe sutu ra. Cañi ca vachi ra ta nanyehe sutu ra chi ra, ta cundahvi cuñi ra nyehe ra chi ra. Ta chingo ra chisatahan ra chi sehe ra. Ta nanumi ra chi ra.

21 Tyicuan ta quichaha catyí ra chi sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuví sehun chii”, catyí ra chi sutu ra.

22 Soco sutu ra tyihi ra tyiño, ta catyí ra chi musu ra: “Tava ndo sahma vaha ca ta sacuihno ndo chi ra. Ta tyihi ndo noo xehe nundaha ra. Ta nyaaca ndo zapato quihi chaha ra ñandihí.

23 Ta siin ri cahñi ndo noo becerru cha xahan ca, vatyí cachi yo chi ti. Vatyí vityin cucoo yo noo vico.

24 Vatyí ra sehi ihya cha chihí ra saha mai tuhun. Cuñi mai vatyí ma nyehe que chi ra, soco natuvi ra”, catyí sutu ra. Tyicuan ta quichaha chicoo ñu vico. Ta sii xaan cacuñi ñu vatyí natuvi ra cuan.

25 Tyicuan ta inga sehe ra, ra cha chahnu ca, ñohó ra nu chiquí. Ta cuhva cha cuanachaa ra nya vehe ra, ta quichaha chiñi ra yaa. Ta chiñi ra vatyí sii xaan cachitá chaha ñu.

26 Tyicuan ta cuhva cha cuyatyin ra nya vehe ra ta cana ra chi noo musu ra. Ta ndaca tuhun ra ñáa cha cuví cuan.

27 Tyicuan ta musu ra quichaha catyí ra: “Yañun, ican nachaa. Ta yucuan chaha tachi sutun vatyí na cahñi ra chi noo becerru xahan ca.

Vatyi vaha ri nachaa yañun, ta ñahri cha cuvı̄ chi ra”, catyí ra.

²⁸ Tyicuan ta cuxaan xaan cuñı̄ ra. Ta ña cuñı̄ ra ndihvı̄ ra chichi vehe. Soco sutu ra chahan ra chicahan ndahvi ra chihin ra, vatyi na ndihvı̄ ra chichi vehe.

²⁹ Tyicuan ta nacahan ra ta catyí ra chi sutu ra: “¿Atu chiin cuiya sahá tyiñe chuhun? Ta tyasohı̄ tuhun cahún. Ta ni noo chaha ta ta nacahnu que nu cahún. Soco ni noo ndixihyu lee ta cuhva con chii vatyi coi vico chihin ra tahin.

³⁰ Soco vityin cha nachaā sehun ihya, ra cha sanaā xuhun chihin ñu cata iñi. Ta vityin chahun noo becerro quı̄ti xahan ca chi ra”, catyí ra chi sutu ra.

³¹ Tyicuan ta nacahan sutu ra ta catyí ra chi ra: “Sehi, yoho tyicuan ri nyaún chihin. Ta tandihı̄ cha cumi, chuun cuvı̄.

³² Soco vityin tahnı̄ chi sacuvi yo vico ihya. Ta cusı̄ cuñı̄ yo. Vatyi nachaā yañun, ra cha sahā mai tuhun vatyi chihı̄. Tari quı̄vı̄ nandotō ra cuvı̄ ihya. Ta chinaā ra, ta nañihı̄ tucu yo chi ra inga chaha”, catyí ra chi sehe ra —catyí ra Jesús.

16

Nu sañahá ra Jesús chi yo yoso caa saha yo tumañi iñi chihin cha iyó chi yo

¹ Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayı̄ vavaha ra. Ta iyó noo ra yındaha tandihı̄ tyiño sahá ra. Ta chahan coyo musu ra canacatyı̄ ra chi ra tyayı̄ cuan, vatyi ra

yihí ndaha tyiño cuan, sanaa ra tandihí cha iyó chi ra.

² Tyicuan ta cana ra tyayihí cuan chi ra yindaha tyiño cuan, ta catyí ra chi ra: “Cha cuaha xaan cuatyí chahún quichi nu nyaí. Nacuhva cuendon tandihí tyiño cha sacuvun chii. Vatyí ma saha tyiño con chihin”, catyí ra chi ra.

³ Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñi ca ra cha sahá tyiñe chihin ra. Ta ñahri fuerza iyó chii cha saha tyiñe nu ñuhú. Ta cahán nui caye chichi ñuu.

⁴ Soco cha chité yoso caa cunyacuvi vityin, ta vaha coo ñáyivi chihin quivi cha ma coo ca tyiño sahi, ta vaha chai vehe ñu”, ndichi xiñi ra.

⁵ Tyicuan ta cana ra chi noo noo ra yosoyicá chi chitoho ra. Ta quichaha catyí ra chi noo ra cuan: “¿Yoso yosoyicón chi chitohi?” catyí ra.

⁶ Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuvi ra. Ta cuahan ra.

⁷ Tyicuan ta chaa inga ra. Ta quichaha ndaca tuhun tucu ra chi ra cuan ta catyí ra: “¿Yoso yosoyicá yoho chi chitohi?” Ta nacahan ra cuan ta catyí ra: “Yosoyiqué noo mil arroba trigo”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra.

⁸ Tyicuan ta chitó chitoho ra cha ña vaha cha

chinyacuv̄i ra. Ta iyo xaan cuñí ra vatyí yatyí xaan saha ra cuan chi ra —catyí ra Jesús.

Ta quichaha catyí tucu ra chi ra cachicá noo chihin ra:

—Ñáyiv̄i ña vaha aña yatyí xaan ca sahá ñu chi ñu ícan saha ñáyiv̄i vaha aña.

⁹Ta catyí chi ndo, vatyí cotyíño ndo cha tyaȳi cha iyó siqui ñuhu ñáyiv̄i ihya, ta saha ganaa ndo amigo. Ta quiv̄i cha ndih̄i cha tyaȳi cuan, cuñihi ndo nu cunyicu ndo nya nu nyaá Nyoo tyicuan ri maa.

¹⁰Tatu chitó ndo cotyíño ndo chiin cha iyó chi ndo cha cuenda cha vaha, tyicuan caa coto tucu ndo cotyíño ndo tatu cuaha iyó chi ndo. Soco tatu ña chitó ndo cotyíño ndo chiin cha iyó chi ndo, tyicuan caa ma coto tucu ndo cotyíño ndo tatu cuaha coo chi ndo.

¹¹Ta catyí chi ndo, tatu ña sahá ndo tumañi ñi chihin cha iyó chi ndo siqui ñuhu ñáyiv̄i ihya, Nyoo ma cuhva ra noo cha tyaȳi cha ndicha chi ndo.

¹²Tandih̄i cha iyó chi ndo maa Nyoo chaha noo chi ndo. Soco tatu ña sahá ndo tumañi ñi chihin cuan, ma cuhva ra cha tahán chi chi ndo.

¹³Noo musu ma cuvi coo uvi tahan chitoho ra. Vatyí musu cuan cuñí ca ra chi noo ra, ta ñima ca chi inga ra. O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuvi cuñi ndo chi Nyoo ta suri cuhva cuan cuñi tucu ndo cha tyaȳi —catyí ra Jesús.

¹⁴Tyicuan ta cha chiñi ra fariseo tandih̄i tuhun cahán ra Jesús. Tyicuan ta quichaha chacu cuehe ra nyehe ra chi ra. Vatyí maa ra fariseo cuan cuñí xaan ra chi xuhun.

15 Tyicuan ta quichaha catyí ra Jesús chi ra:

—Vaha xaan sahá ndo chi ndo nuu ñáyivi. Soco chitó Nyoo vatyí añima ndo ña vaha. Ta tandihi cha catyí ñáyivi vatyí cahnu xaan ihya siqui ñuhu ñayivi, Nyoo ña cuñí nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo añima yo chi yo

16 'Ley cha tachí Nyoo chi ra Moisés vatyí tyaa ra, ta tuhun cha tyaa ra profeta Nyoo ta cha naha, ican chi cuvi cha saquehen ityi chí ñáyivi nyacua nya quivi chaá ra Juan. Ta maa ra Juan quichaha cahan ra tuhun vaha vatyí cha cuñí quichi Nyoo vatyí cunyaca ñaha ra. Ta tandihi ñáyivi cha nducú cuhva yoso caa cunyaca ñaha Nyoo añima ñu, ican ñu quihvi ndaha ra.

17 'Soco catyí chi ndo, vasi cunaa andivi ta ñuhu ñayivi, soco cha cuví ley Nyoo cha tyaa ra Moisés, ma naa nyacua nya cha yahá cuvi tandihi.

Sañahá ra Jesús vatyí ña vaha cha sandoo rayi chi ñasihí ra
(Mt. 19.1-12; Mr. 10.1-12)

18 'Tatu noo rayi iyó ñasihí ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayi chihin noo ñaha cha sandoo yi chii, coo tucu cuatyí ra nuu Nyoo.

Nu sañahá ra Jesús tuhun noo ra tyayi chihin ra Lázaro

19 'Chiyó noo ra tyayi. Ta vaha ñihnó ra. Ta tandihi quivi iyó ra vico ta chachí vaha ra.

20 Ta chiyō tucu noo ra ndahvi cha nañí Lázaro. Ta cuaha xaan ndihyí iñi ra. Ta nyaá ra yuvehe ra tyayii cuan.

21 Ta ra ndahvi cuan, cuñí ra cachi ra, vasi cha canacoyo nu mesa ra tyayii cuan. Ta nyacua nya ina ta chaá ti nu nyaá ra, ta yuyaá ti nu cahvi chi ra.

22 Ta noo quiví cuan chihí ra ndahvi cuan. Ta ángel Nyoo quehen ra chi ra ta cua nyaca ra chi ra nya nu nyaá ra Abraham gloria. Tyicuan ta chihí tucu ra tyayii cuan. Ta chicuchí ñu chi ra.

23 Tyicuan ta ra tyayii cuan nyehé xaan ra tundo ho nu ñohó ra anyaya. Ta nanyehé ra nu cañi. Ta nanyehé ra chi ra Abraham chihin ra Lázaro, nyaá ra chihin ra yucuan.

24 Tyicuan ta canachaa ra ta catyí ra: “Tata Abraham, cundahvi cuñi chii. Tachi chi ra Lázaro na satyí ra chiin nundaha ra. Ta na satoo ra ñn titi ndutyá nu yai. Vatyí nyehé xain tundo ho nu cayú ñuhu ihya”, catyí ra.

25 Soco ra Abraham catyí ra chi ra: “Ñicohon iñun vatyí vaha chiyon ñuhu ñayiví. Ta ra Lázaro, ña vaha chiyō ra. Vityin vaha iyó ra ihya, ta yoho nyehún tundo ho.

26 Ta sñn ri, mahñu ihya cono xaan. Ta ma cuvi yaha ra iyó tyehe cahun ra chiña. Ta ma cuvi yaha ra iyó chiña, quichi ra tyehe”, catyí ra Abraham chi ra.

27 Tyicuan ta quichaha catyí ra tyayii cuan: “Tata Abraham, sahun tumañi iñi chii. Ta tachun chi ra Lázaro nya vehe suti.

28 Vatyí iyó ohon tahan yañi. Ta cuñí vatyí nacatyí ra chi ra yoso caa iyé ihya nu nyehí

tundoho, coto quichi coyo tucu ra cuan ihya”,
catyí ra.

²⁹ Tyicuan ta quichaha catyí ra Abraham: “Iyó ley cha tyaa ra Moisés. Ta iyó tuhun cha tyaa ra profeta Nyoo ta cha naha. Na quichaha ra tu cuñí ra”, catyí ra Abraham.

³⁰ Tyicuan ta quichaha catyí ra tyayii cuan: “Tata Abraham. Ma quichaha ra. Soco tatu yóo cha nandoto, ta cuhun cucahan chihin ra, yucuan ta tyasoho ra ta nasama ra cuhva iyó ra”, catyí ra cuan.

³¹ Soco ra Abraham catyí ra: “Tatu ña cuñí ra quichaha ra tuhun tyaa ra Moisés ta tuhun cha tyaa ra profeta Nyoo ta cha naha, ma chino iñi ra tuhun cahan noo ndiyi tatu nandoto ra ta cahan ra chihin ra.”

17

*Nu sañahá ra Jesús chi yo yoso caa saha cuenda yo
chi yo coto sacuvi yo cha ña vaha
(Mt. 18.6-7, 21-22; Mr. 9.42)*

¹ Tyehe caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativí chi ñáyivi. Soco ndahvi ra ndahvi ra sativí chi ñáyivi.

² Vaha taxin ca cuhñi ra noo yuu sucun ra. Ta cutuchi ra chi ra nu tyañuhu. Coto sativí ra chi ñu ni nasama cuhva iyó ihya.

³ Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Catyi ndo chi ra vatyi ña vaha cha sacuvi ra. Tatu nasama ra cuhva iyó ra, saha ndo tucahnu iñi chi ra.

⁴ Ta ñi ri maa sacuvi ra cha ña vaha chihin ndo ucha tahan chaha cha noo quiñi. Tatu ndi ucha tahan chaha ta catyi ra chi ndo vatyí ndu uvi ñi ra cha sacuvi ra chi ndo, ndi ucha tahan chaha saha ndo tucahnu ñi chi ra.

Nu sañahá ra Jesús chi yo vatyí tatu chinó ñi yo chi ra, cuví sacuvi yo cuaha cha vaha

⁵ Tyicuan ta quichaha catyi ra cachicá tyiño nuu ra Jesús chi ra:

—Cuhva cha chinó ca ñi ndi chuun —catyi ra.

⁶ Tyicuan ta catyi ra Jesús chi ra:

—Tatu chinó ñi ndo chi yuhu vasi chiin ri tari cuhva noo chiti mostaza luhlu, cuví catyi ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo —catyi ra Jesús.

Yoso caa tahán chi quichaha yo chi Nyoo

⁷ Ta catyi ra Jesús:

—Tatu noo nyoho ta iyó noo musu ndo. Ta nachaa ra cha chahan ra nu chiqui chi sahatyiño ra, o chi saha cumi ra quití sana ndo, ¿atu catyi ndo chi ra: “Cunya ta cachun”? Ña catyi ndo chi ra tyicuan caa.

⁸ Soco tyehe caa catyi ndo chi ra: “Sanduvaha cha cuxiñi. Ta tyihun cha cachi. Cha yaha cha cachi tyicuan ta cachi tucu maun”, catyi ndo chi ra.

⁹ Ni ña tuhvá ndo nacuhva ndo tyahvi nyoo chi ra vatyí sacuvi ra ñáá noo tyiño tavá ndo chi ra.

¹⁰ Tyicuan caa tucu nyoho chihin Nyoo. Quiñi ndihí sacuvi ndo cha catyi Nyoo chi ndo, tahán

chi catyí ndo: “Nyuhu chiin ri cha tachun chi ndi, yucuan ri sacuví ndi. Ta ña yaha ca.”

Nu sanduvahā ra Jesús chi uchi tahan ra tyahyu coño

¹¹ Ityi cuahan ra Jesús ityi ñuu Jerusalén yahā ra nu cuví xahñi Samaria chihin Galilea.

¹² Nu chaā ra noo ñuu, quitā coyo uchi tahan ra cuhví chihin cha tyahyu coño ra. Ta chicuitayucu ra nyasava ri.

¹³ Ta quichaha cacanachaa ra chi ra Jesús, ta catyí ra:

—Yoho, Maestro Jesús, cundahvi cuñi chi ndi —catyí ra.

¹⁴ Tyicuan ta nanyehē ra Jesús chi ra ta catyí ra chi ra:

—Cuahan ndo. Ta cua sañaha ndo chi ndo chi tata sutu vatyí cha nduvahā ndo.

Tyicuan ta cuahan coyo ra cuan. Ta ityi cuahan coyo ra ta cananyehē ra vatyí nduvahā ra.

¹⁵ Tyicuan ta cuhva cha nanyehē noo ra cuan vatyí nduvahā ra, cuanuhu chata ra nu nyaá ra Jesús. Ta canā chaa ra, ta sacahnu ra chi Nyoo.

¹⁶ Ta chicuiñi chiti ra. Ta nacañi noo ra xiñi ra nya nu ñuhu nuu ra Jesús. Ta nacuhva ra tyahvi nyoo chi ra. Ta ra cuan, ra Samaria cuví ra.

¹⁷ Tyicuan ta catyí ra Jesús chi ra:

—¿Atu ñima uchi tahan ndo nduvahā? ¿Nya nyaá inga ñn tahan ca ra?

¹⁸ ¿Ñáá tuhun cha noo tuhun ri maa ra inga ñuu nandichi chata ra ta sacahnu ra chi Nyoo? —catyí ra Jesús.

¹⁹ Tyicuan ta quichaha catyí ra chi ra cuan:

—Nducuita ta cuahan. Nduvahun vatyi chinó iñun —catyí ra Jesús chi ra.

Yoso caa cuquichi Nyoo cunyaca ñaha ra nu iyó yo ihya

(Mt. 24.23-28, 36-41)

²⁰ Candacā tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñayivi, ñima cha nyehé yo cuví.

²¹ Ma cuví catyí ñáyivi: “Ma ra nyaá ihya, o ma ra nyaá ityi cuan.” Vatyí Nyoo cha chaā ra mahñu ndo, ta nyacá ñaha ra ñanima ñáyivi cuenda ra —catyí ra chi ra.

²² Yahā cuan ta catyí ra chi ra cachicá noo chihin ra:

—Cuchaa chi quivi vatyí cucuñi ndo nyehe ndo chi yuhu Rayi cha quichi nya gloria. Soco ma nyehe ndo chii.

²³ Cuchaa tucu chi quivi ta cucatyí ñáyivi chi ndo: “Ihya nyaá ra”, o “Yucuan nyaá ra.” Soco ma cuhun ndo cunyehe ndo. Ta ma cunyicon ndo chi ra cuan vatyí ñime cuví.

²⁴ Vatyí tandihí ñáyivi cunyehe chi yuhu Rayi cha quichi nya gloria quivi quichi inga chaha. Tari nyehé tandihí ñáyivi nu quihvi tacha nicahnu andivi, tyicuan caa cucuvi.

²⁵ Soco cunyehe xihne tundoho. Vatyí ñáyivi cha iyó cha vityin cua cutasi cuñi nyehe ñu chii.

²⁶ Tari cuví quivi ra Noé, tyicuan caa cucuvi quivi quichi yuhu Rayi cha quichi nya gloria inga chaha.

27 Qui^vi ra Noé, chachí ñu. Chihí ñu. Tandahá ñu. Ta chahá ñu sehe ñu tandaha. Nya qui^vi qui^hvⁱ ra Noé chichi barcu ra, ta coon savi xaan. Ta tandihⁱ ñu cachihⁱ ñu.

28 Tyicuan caa tucu cuvⁱ qui^vi ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu.

29 Soco qui^vi cha quitá ra Lot ñuu Sodoma cuan, coon ñuhu chihin azufre andivⁱ. Ta chihⁱ tandihⁱ ñáyivⁱ Sodoma.

30 Ta tyicuan caa cucuvi qui^vi cha quichi tucu yuhu Ray^h cha quichi nya gloria inga chaha.

31 "Ta qui^vi cuan tatu nyicú ndo nuquehe ndo, ma ndih^vi ndo chichi vehe ndo vatyⁱ tava ndo ndaha tyiño ndo. O tatu chicá noo ndo nu chiqui, ma cunuhu ndo nya vehe ndo.

32 Nⁱcohon iñi ndo ñasihⁱ ra Lot, ñáá cha cuvⁱ chi ña.

33 Tandihⁱ ndo cha cuñí ca ndo cha iyó siqui ñuhu ñayivⁱ ihya, cucunaa ndo. Ta tandihⁱ ndo cha ña quichaha ndo cha iyó ñáyivⁱ ihya, cucacu ndo.

34 "Ta catyⁱ chi ndo vatyⁱ cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra.

35 Ta uvi tahan ñusihⁱ ñn ri cu nyicó ñu qui^vi cuan. Noo ri ña, cunaquehin. Ta nonga ña cundoo ña.

36 Ta catyⁱ chi ndo vatyⁱ uvi tahan ra cohon nu chiqui. Noo ra cunaquehin, ta nonga ra cundoo ra —catyⁱ ra Jesús.

37 Cuhva cha chiñⁱ ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —catyⁱ ñu. Tyicuan ta nacañan ra Jesús ta catyⁱ ra:

—Nu catuví coño ñuhu chihi, yucuan cundu ñri chii.

18

Nu sañahá ra Jesús vatyi tari chicán noo ñaha chihi yñi chi juez, tyicuan caa tahán chi cacan yo chi Nyoo

¹ Tyicuan ta chahá ra Jesús noo cuhva ihya. Vatyi na cacan tahvi ñu tyicuan ri maa, ta ma cundihñi ñu.

² Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyivi chi Nyoo. Ta ni ri ña quichaha maa ra chi ñáyivi.

³ Ta suri ñuu cuan iyó tucu noo ñaha ndahvi cha chihi yñi. Ta chahan ña chicahan ña chihin ra, vatyi chicá ña cuatyi chaha noo ra xaan iñi chi ña.

⁴ Ta juez cuan ña quichahá maa ra chi ña. Ña sandaá maa ra tyiño chicá ña. Ta cha naha xaan chicán ña. Tyicuan ta quichaha ndichi xiñi juez cuan: “Vasi ña yuhví chi Nyoo, ta ñahri cuende chi ñáyivi,

⁵ soco ñaha ihya sayangá xaan ña chii. Ta yucuan chaha cua sacaqui chi ña. Vatyi coto quichi ca ña, ta sanaquiqui ña tisihi”, ndichi xiñi ra.

⁶ Tyicuan ta catyí ra Jesús:

—Tyicuan caa catyi juez ña vaha cuan. Tu juez cuan cha quiñi iyó ra ta tyinyee ra chi ñaha ndahvi cuan,

⁷ ta nyaca cuví Nyoo, ¿atu ma tyinyee ra chi ñáyivi cha chicán ndiyaca ta ndiquivi chi ra? ¿Atu cuatu xaan ra cha tyinyee ra chi ñu?

⁸ Catyí chi ndo, vatyí numi ri cutyinyee ra chi ñu. Soco quiví quichi yuhu, Rayíi cha quichi nya gloria, inga chaha, chitó Nyoo tatu nañihi que chi ñu cha ndicha chinó iñi chii —catyí ra Jesús.

Noo cuhva cuenda ra tavá xuhun cuenda gobiernu ñuu Roma ta cuenda ra fariseo

⁹ Tyicuan ta chaha ra Jesús nonga cuhva cuenda ra savahá chii, ta ña cuñi nyehe ra chi inga ra. Ta quichaha catyí ra:

¹⁰ —Iyó uvi tahan ra chahan chichi vehe ñuhu chicacan tahvi ra chi Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra.

¹¹ Ta ra fariseo cuan chicuinyaa ra, ta quichaha cahan ra chihin Nyoo. Ta cahnu saha ra chi ra. Ta catyí ra: “Sutu Mañi yuhu, nacuhve tyahvi nyoo chuun vatyí yuhu ñima tari inga ñáyivi cuví. Vatyí suhu ñu. Quiñi iyó ñu. Iyó ñasihí ra ta iyó inga ñusihí chi ra. Ta ni ri ñima tari ra tavá xuhun cuan cuví.

¹² Vaha ca quichahí tuhun maun ta ñima ca inga ñáyivi. Vatyí uvi chaha cha noo vitya ña chachí. Ta chahí uchi siqui noo noo cientu cha sahá ganai chuun”, catyí ra.

¹³ Soco ra tavá xuhun cuenda gobiernu Roma cuan cha cañi ri chiin nanyaá ra. Ta ña caña iñi ra nanyehe ndaa ra. Ta cañi ra ndaha ra añima ra vatyí ndu uvi iñi ra cuatyí ra. Ta catyí ra: “Sutu Mañi yuhu. Nyehe ndahvi chii vatyí iyó xaan cuatyí”, catyí ra —catyí ra Jesús.

¹⁴ Ta catyí tucu ra Jesús tyehe caa:

—Catyí chi ndo vatyí Nyoo sahá ra tucahnu iñi chi ra tavá xuhun cuan. Sanaa Nyoo cuatyí ra ta cuanuhu ra nya vehe ra. Soco ra fariseo cuan, ñahri tucahnu iñi ñihi ra, vatyí yóó ñáyiví cha savahá xaan chi nuu Nyoo, cusanocuee Nyoo chi ñu, ta ñu sanocuee chi, Nyoo cusanducahnu ra chi ñu —catyí ra Jesús.

Nu nasocó ra Jesús chi ra cuatyaa

(Mt. 19.13-15; Mr. 10.13-16)

¹⁵ Tyicuan ta quichi nyaca ñáyiví chi ra cuatyaa chi ra Jesús vatyí na tyiso ra ndaha ra xiñi ndotyín. Soco cuhva cha nanyehé ra cachicá noo chihin ra vatyí tyicuan caa, ña chaha ca ra.

¹⁶ Tyicuan ta cana ra Jesús chi ra cachicá noo chihin ra, ta catyí ra chi ra:

—Saña ndo chi ra cuatyaa na quichi maa ndotyín nu nyai. Ta ma casi ndo, vatyí ñu nyacá ñaha Nyoo aña, cuví ñu tari ra cuatyaa ihya.

¹⁷ Ta catyí chi ndo vatyí tatu ña ita iñi ndo chi Nyoo, tari noo ra cuatyaa ita iñi ndotyín chi sutu ndotyín, ma cuvi quihví ndo nu nyacá ñaha Nyoo.

Nu chahá ra Jesús tuhun vatyí y# xaan nacuhva cuenda noo ra tyay# chi ra chi Nyoo

(Mt. 19.16-30; Mr. 10.17-31)

¹⁸ Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catyí ra:

—Maestro, ra vaha cuvún. ¿Yoso caa cunyacuvi ta ñihi ñayiví cha ma naa ca maa coi? —catyí ra.

¹⁹ Tyicuan ta catyí ra Jesús chi ra:

—¿Ñáá tuhun catyún vatyí ra vaha cuví? Noo ri maa Nyoo cuví ra ra vaha. (Ta cha catyún tyi vahi, nacotón tyi Nyoo cuví.)

20 Yoho chitón tandihí tuhun cha tachí Nyoo tyi sacuvi yo: “Cha ma coo inga ñusihí chuun. Ma cahñun chi ñáyiví. Ma suhun. Ma cahun cuendu siqui ñáyiví. Ta sahun ñáyiví chi sutun ta chi sihun” —catyí ra Jesús.

21 Tyicuan ta ra cuan catyí ra:

—Tandihí ihya ta quichahí nyata luhli ta nyacua nya vityin —catyí ra.

22 Nu chiñi ra Jesús cha catyí ra cuan, tyicuan ta catyí ra chi ra:

—Soco cumañi sacuvun nonga cha sacuvun. Xico tandihí cha iyó chuun. Ta cuhva chi ñu ndahvi. Ta quichun chate. Tyicuan ta coo cha tyayí chuun nya gloria —catyí ra.

23 Soco ra cuan nu chiñi ra tuhun cuan, nducuihya xaan iñi ra, vatyí tyayí xaan ra.

24 Cha nanyehe ra Jesús vatyí nducuihya iñi ra, ta quichaha catyí ra:

—Yíi xaan ta cuví nacuhva cuenda ñu tyayí chi ñu na cunyaca ñaha Nyoo aña ñu.

25 Tañi tyehe yaha noo camello xiu noo yiqui ticu, ta ñima ca cha quihvi noo ñu tyayí nu nyacá ñaha Nyoo —catyí ra.

26 Ta ñu cha cachiñi tuhun ihya catyí ñu:

—Tatu tyicuan caa, ¿yóó cha cuví cacu vii?
—catyí ñu.

27 Tyicuan ta ra Jesús catyí ra:

—Tandihí cha ña cuví sacuvi rayí, Nyoo cuví sacuvi ra —catyí ra.

28 Tyicuan ta ra Pedro catyí ra:

—Sutu Mañi yuhu, nyuhu tandihí maa cha iyó chi ndi sandoq ndi, ta nyicón ndi chuun —catyí ra.

29 Tyicuan ta catyí ra Jesús chi ra:

—Cha ndicha catyí chi ndo. Vatyí tandihí ndo cha sandoo ndo vehe ndo, o ñasihí ndo, o yañi ndo, o sutu ndo, o sehe ndo cha catyí cha chaha ndo cha cunyaca ñaha Nyoo añima ndo,

30 cuaha xaan cha vaha cunañihí ndo ihya ñayiví ta cunañihí ndo inga ñayiví cha ma naa ca maa —catyí ra Jesús.

Inga chaha sacotó ra Jesús yoso caa cucahñi ñáyivi chi ra

(Mt. 20.17-19; Mr. 10.32-34)

31 Ta cana sñin ra Jesús chi ndi uchi uvi ra cachicá noo chihin ra, ta catyí ra chi ra:

—Vityin cuhun yo nya Jerusalén. Vatyí yucuan cuchino cava tandihí tuhin cha tyaa ra profeta Nyoo ta cha naha. Vatyí yuhu Rayí cha quichí nya gloria cuví.

32 Vatyí cucuhva cuenda ra chii chi ra inga ñuu, ra cha ñima ra ñuu Israel cuví. Ta cucuacu nyaa ra chii. Ta cucahan ra chii. Ta cutyicusí ra nui.

33 Ta cucañi ra chii, ta cucahñi ra chii, soco nu cu uñi quiví ta cunandote —catyí ra Jesús.

34 Ta ra cachicá noo chihin ra ña cutuñi ñi ra tuhun cuan ni ña cachitó ra ñáá tuhun cahán ra Jesús chihin ra. Vatyí ña chaha Nyoo vatyí cacutuñi ñi ra.

Nu sananyehé ra Jesús chi noo ra cuaa ñuu Jericó

(Mt. 20.29-34; Mr. 10.46-52)

35 Cuhva cha cua chaa ra Jesús ñuu Jericó. Ta yuhu ityi cuan nyaá noo ra cuaa. Ta chicán ra limuxtan.

36 Tyicuan ta chiñi ra vatyí cuaha xaan ñáyivi cua yaha. Ta ndaca tuhun ra ñáá cha cuví cuan.

³ Ta cuñí xaan ra cohon nuu ra chi ra Jesús. Ta ña cuví nyehe ra chi ra vatyí cuaha xaan ñáyívi. Ta maa ra tyaha xaan ra.

⁴ Yucuan ta chino vavaha ra cuahan ra ityi nuu, ta ndaa ra nu noo yutun cha nañí sicómoro cha nanyaá yuhu ityi nu cua yaha ra Jesús, tacuhva cuví nyehe ra chi ra.

⁵ Ta cuhva cha yahā ra Jesús nanyehé ndaa ra ityi siqui ta nanyehe ra chi ra Zaqueo. Ta quichaha catyí ra chi ra:

—Zaqueo, sanumi ta noun nu yutun chiña. Vatyí vityin cuhin vehun —catyí ra chi ra.

⁶ Tyicuan ta numi ri noo ra Zaqueo nuu yutun cuan. Ta sii vavaha cuví chi ra. Ta quehen cuenda ra chi ra Jesús. Ta cuahan ra chihin ra nya vehe ra.

⁷ Ta cha nyehe ñáyívi cha tyicuan caa, ta tandiñi ñu quichaha cahán nyaa ñu chi ra Jesús. Ta catyí ñu vatyí ndoo ra vehe noo ra iyó cuatyí.

⁸ Nu canyicú ra chichi vehe cuan, ra Zaqueo nicuinanyaā ra. Ta quichaha catyí ra chi ra Jesús:

—Sutu Mañi yuhu, yuhu cua cuhve sava cha iyó chii chi ñu ndahvi. O tatu suhi chi ñáyívi chihin cha sandavi ñahi chi ñu, vityin cunacuhva cuende nya cumi ca tahan chaha chi ñu —catyí ra chi ra.

⁹ Tyicuan ta catyí ra Jesús:

—Vityin cacu añimon, ta ñáyívi chi ra Abraham cuvún. Vatyí nacuhva cuendon chuun chi Nyoo tari nacuhva cuenda ra Abraham chi ra chi Nyoo.

¹⁰ Vatyí yuhu Rayñi cha quichi nya gloria vachi nanduqui ta vachi sacaqui chi ñáyívi cha cua naa —catyí ra Jesús.

*Nu sañahá ra Jesús na saha tyiño yo chihin cha
chahá Nyoo chi yo
(Mt. 25.14-30)*

¹¹ Ta cha ni ri ca cha chiñi ñáyivi tuhun cahán ra Jesús, quichaha cahan tucu ra inga cuhva ihya. Vatyí cha cuyatyin chaa ra Jerusalén. Ta ñáyivi cuñi maa ñu vatyí cha cua quichaha ra cunyaca ñaha ra yucuan.

¹² Tyicuan ta catyí ra:

—Chiyó noo ra vaha ta cuñi cuhun ra noo ñuu cañi. Vatyí yucuan cunanduvi ra rey tacuhva vatyí ndichi ra ñuu ra, soco cha cuví ra rey.

¹³ Ta cuhva cha cumañi cuhun ra, cana ra chi uchi tahan musu ra. Ta chaha cuenda ra noo xuhun chi noo noo ra. Ta catyí ra chi ra: “Saha tyiño ndo chihin xuhun chiña nyacua nya ndichi mai”, catyí ra.

¹⁴ Soco suhva ñáyivi ñuu ra, tasi cuñi ñu nyehe ñu chi ra ta ña cuñi ñu cha cuví ra rey chi ñu. Ta tachí ñu chi suhva ra cuhun chata ra, vatyí catyí ra vatyí ña cuñi ñu cha cuví ra rey chi ñu.

¹⁵ Soco ra cuan nduvi ra rey. Tyicuan ta nachaa ra nya ñuu ra. Ta quivi cha nachaa ra, cana ra chi musu ra, ra cha sandoo ra xuhun chii. Vatyí coto ra yoso saha ganaa xuhun ra cha ni ri ca cha chahan ra.

¹⁶ Ta chaa noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoun chii”, catyí ra.

¹⁷ Tyicuan ta quichaha catyí rey cuan chi ra: “Vaha xaan. Yoho vaha musu cuvún. Vatyí vaha saha tyiño chihin chiin xuhun cha chahí chuun.

Ta vityin cunyaca ñahun uchi tahan ñuu”, catyí rey cuan chi ra.

¹⁸ Tyicuan ta chaꞗ tucu inga ra cha chaha ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoun chii”, catyí ra.

¹⁹ Tyicuan ta catyí rey chi ra: “Yoho cunyaca ñahun ohon tahan ñuu”, catyí ra.

²⁰ Tyicuan ta chaꞗ tucu inga ra cuan. Ta quichaha catyí ra: “Ma xuhun ihya cha chahun chii. Yuhu chicumj vahi chichi noo pañitu.

²¹ Vatyí yuhví xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyiví”, catyí ra cuan.

²² Tyicuan ta rey cuan catyí ra chi ra: “Yoho musu ña vaha cuvún. Vityin suri chihin tuhun cha catyun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehín cha ña saha tyiñe,

²³ ¿ñáá tuhun ña chahun ta chityihun xuhin banco vatyí nachai soco cha nducuaha ca xuhin?” catyí rey cuan.

²⁴ Ta quichaha catyí ra chi ra canyicú cuan: “Tinyaa ndo xuhun cha chahí chi ra, ta cuhva ndo chí ra cha saha ganaa uchi ca tahan cuan”, catyí ra.

²⁵ Tyicuan ta quichaha catyí ra chi rey cuan: “Tata, soco ra cuan, cha iyó uchi tahan chí ra”, catyí ra.

²⁶ Tyicuan ta rey cuan catyí ra: “Soco catyí yuhu chí ndo. Vatyí ra cha vaha ca sahá tyiño chihin cha chahí chí, cucuhva que chí ra. Ta ra

cha chah̄i chiin ri, ta ña cuñí ra sahá tyiño ra chihin cuan, cutinyaa nd̄ihi chi ra.

²⁷ Ta tandih̄i ñu xaan iñi chii, ñu ña cuñí vatyí cunyaca ñahi chi ñu, nyaca ndo chi ñu tyehe vatyí cahñi ndo chi ñu nui”, catyí rey cuan —catyí ra Jesús.

Nu cua chaa ra Jesús Jerusalén

(Mt. 21.1-11; Mr. 11.1-11; Jn. 12.12-19)

²⁸ Cha yah̄a cahan ra Jesús cuhva cuan, ta sañihi ra cuahan ra ityi Jerusalén.

²⁹ Yucuan ta cua chaa ra ñuu Betfagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tav̄a ra tyiño chi uvi tahan ra cachicá noo chihin ra.

³⁰ Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, qūiti ta coto ca tyayu, nuhñi ti. Ndachi ndo chi ti. Ta nyaca ndo chi ti tyehe.

³¹ Tatu yóo cha catyí chi ndo: “¿Ñáá tuhun cha ndachi ndo chi ti?” catyí ndo chi ñu: “Vatyí chiñuhú ti chi maa ra nyaca ñaha chi yo.”

³² Tyicuan ta ra cachicá noo chihin ra, cuahan coyo ra. Ta nañih̄i ra chi ti tari cuhva catyí maa ra Jesús.

³³ Ta cuhva cha candachi ra chi ti, chāa coyo chitoho ti. Ta candaca tuhun ra chi ra:

—¿Ñáá tuhun cha ndachi ndo chi burru chiña?
—catyí ra.

³⁴ Tyicuan ta canacahan ra cuan ta cacatyí ra:

—Ndachí ndi chi ti vatyí chiñuhú ti chi maa ra nyacá ñaha —catyí ra.

³⁵ Tyicuan ta quehen ra chi ti. Ta chinyaca ra chi ti nu nyaá ra Jesús. Ta tyiso ra sahma ra siqui ti. Tyicuan ta casandaá ra chi ra Jesús siqui ti.

³⁶ Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityi nu cua yaha ra, yosó ra burru cuan.

³⁷ Tyicuan ta cha cua cuyatyin tandihi ñu chihin ra Jesús nu iñi noo yucu Olivo cuan. Ta quichaha cana chaa tandihi ñu chinó iñi chi ra chihin cha sií cuví chi ñu. Ta sacahnú ñu chi Nyoo vatyí cuaha xaan cha vaha nyehe ñu cha sacuví ra.

³⁸ Yucuan chaha catyí ñu:

—¡Na sacahnu yo chí Rey ihya vatyí vachi ra chihin sívi Nyoo! ¡Na coo cha taxi ri andivi! ¡Ta na sacahnu yo chí Nyoo! —catyí ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha cacatyí ra:

—Maestro, sacutaxin chí ñu nyicón chuun —cacatyí ra.

⁴⁰ Nacahan ra Jesús ta catyí ra:

—Tatu ñáyivi ihya ta cu taxin ñu, nyacua nya yuu ta nacana chaa chí, ta sacahnu chí chí —catyí ra Jesús.

⁴¹ Yucuan ta cha cua chaa ra yatyin ri Jerusalén cuan. Ta nanyehe ra Jesús chí ñuu cuan ta quichaha chacu chaa ra vatyí cuihya iñi ra.

⁴² Ta catyí ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chí ndo quívi ihya. Soco xehe xaan ñohó cha chíni tuñi cuan, ta ña ñañihí maa ndo.

⁴³ Soco cuchaa quívi ña vaha vatyí ra xaan iñi chí ndo cutyihi chacu ra chí ndo. Vatyí tandihi ri

ityi cuquichi coyo ra siqui ndo. Ta cucañi tahan ra chihin ndo.

⁴⁴ Ta cucacun ñuhú ra chi ndo ta cucahñi ra chi ndo. Ta ni noo yuu yoso nyitahan ta ma sandoo ra. Tyicuan caa cucuvi vatyí ña cuñi ndo nacoto ndo cha quichi Nyoo quichi sacacu ra chi ndo.

Nu tavá ñehe ra Jesús chi ra caxico chichi vehe ñuhu cahnu

(Mt. 21.12-17; Mr. 11.15-19; Jn. 2.13-22)

⁴⁵ Tyicuan ta ra Jesús quihvi ra chichi nuquehe vehe ñuhu cahnu. Ta quichaha tava ñehe ra tandihi ra caxicó ta casatá yucuan.

⁴⁶ Ta catyí ra chi ra:

—Nu tutu Nyoo catyí chi vatyí vehe Nyoo, nu chicán tahvi yo chi ra cuví. Soco nyoho sananduvi ndo vehe nu nyicú ra suhu —catyí ra.

⁴⁷ Ta tandihi quivi chahán ra Jesús chisañaha ra chi ñáyivi chichi vehe ñuhu cuan. Soco ra cacuví nuu chi tata sutu, ta ra casacuahá cuenda ley vehe ñuhu, ta ra cacuví nuu chi ñuu cuan, canducú ra kuhva yoso caa ta cahñi ra chi ra.

⁴⁸ Soco ña ñihí maa ra kuhva yoso caa sacuvi ra. Vatyí tandihi ñáyivi ta vaha tyasohó ñu tuhun cahán ra Jesús.

20

Nu ndaca tuhun ra fariseo chi ra Jesús yóo cha tachi chi ra vatyí cahán ra nuu ñáyivi

(Mt. 21.23-27; Mr. 11.27-33)

¹ Noo quivi cuan cha ni ri ca cha sañahá ra Jesús chi ñáyivi chichi vehe ñuhu cahnu, ta cahán ra tuhun yoso caa sacacú Nyoo chi ñu. Ta cha coyo ra cuví nuu chi tata sutu chihin ra casacuahá

cuenda ley vehe ñuhu, ñin ri chihin ra cacuví mandoñi.

² Ta cacatyí ra chi ra:

—Catyí chi ndi ¿yóó cha tyaa tyiño chuun vatyí sacuvun tyehe caa? —catyí ra.

³ Tyicuan ta ra Jesús quichaha catyí ra chi ra:

—Yuhu tucu cua ndaca tuhin noo tuhun chi ndo.

⁴ ¿Yóó cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi?

⁵ Tyicuan ta cacatyí ra cuan chi ra tahan ra:

—Tatu catyí yo vatyí Nyoo tachí chi ra Juan cuan, cucatyí ra chi yo “Ñáá tuhun ña chinó iñi ndo tuhun cahān ra.”

⁶ Ta tatu catyí yo vatyí ñáyivi tachí chi ra, ñáyivi cahñi ñu chi yo chihin yuu. Vatyí tandihí ñu, ta cuñí ñu vatyí Nyoo tachí chi ra —cacatyí ra.

⁷ Tyicuan ta cacatyí ra chi ra Jesús vatyí ña cachitó ra yóó cha tachí chi ra Juan vatyí na sacondutya ra chi ñáyivi.

⁸ Tyicuan ta ra Jesús catyí ra chi ra:

—Ñi ri yuhu, ta ma catyí chi ndo yóó cha tachí chii, cha sacuvi tyehe caa.

Nu sañahá ra Jesús vatyí tari ra sahá tyiño ña vaha tyicuan caa cuví ra cha cucahñi chi ra (Mt. 21.33-44; Mr. 12.1-11)

⁹ Tyicuan ta quichaha catyí ra Jesús noo cuhva ihya chi ñáyivi:

—Noo ra tachí ra cuaha yoho tichaha ndivi nu ñuhú ra. Yahā cuan ta chahā noo ra ñuhú cuan chi suhva ra casaha tyiño. Tyicuan ta naha cuahan ra inga ñuu.

10 Ta chaꝝ quiv̄i cha iñí chit̄i cuan. Tyicuan ta tach̄i ra chí noo musu vatyi cuquehen ra suhva chit̄i cha tahán chí chí ra. Soco cacañi xaan ra casahá tyiño cuan chí musu cuan. Ta sacunuhu ra chí ra chihin nu ndaha nu ndīi ra.

11 Tyicuan ta chitoho yoho tichaha ndiv̄i cuan tach̄i tucu ra chí inga musu. Suri cacañi xaan ra chí ra. Ta cacahan uhvi ra chí ra. Ta natach̄i ra chí ra. Soco suri ñahri cachaha ra cuiso ra cunuhu.

12 Tyicuan ta chitoho cuan tach̄i tucu ra chí inga ra. Soco suri tyicuan caa chinyacuvi tucu ra chihin ra. Ta sañicuehe ra chí ra. Ta tava ñehe ra chí ra yucuan.

13 Yahá cuan ta quichaha catyi chitoho ñuhu cuan: “¿Yoso caa cunyacuvi vityin? Cua tach̄i chí sehi, ra cha cuñí vavahi. Ta cha nanyehe ra chí ra, vasi casaha ra ñáyiv̄i chí ra, vatyi sehi cuví chí ra.”

14 Soco cuhva cha cananyehe ra casahá tyiño cuan chí ra, catyí ra chí ra tahan ra: “Ican ra ihya cundoo chihin ñuhú ihya tatu chihi sutu ra. Soco nacañi yo chí ra. Vatyi ndoo maa yo chihin ñuhú ihya”, catyí ra.

15 Tyicuan ta tava ñehe ra chí sehe chitoho ñuhú cuan ityi chata chacu. Ta cachahñi ra chí ra —catyí ra Jesús.

Tyicuan ta catyí ra Jesús chí ñáyiv̄i nyicú cuan:

—¿Ñáá cha cusacuvi chitoho ñuhú cuan chí ra cachahñi chí sehe ra cha cuhva cha cuñí nyoho?

16 Catyí chí ndo vatyi quichi ra ta cahñi ra chí ra casahá tyiño cuan. Ta cuhva ra ñuhú cuan chí inga ra —catyí ra Jesús.

Ta cuhva cha chiñi ñáyiv̄i tuhun cuan, yuhví xaan ñu cuví. Ta quichaha catyí ñu:

—¡Ña cuñi Nyoo ta cuvi tyicuan caa! —catyí ñu.

¹⁷ Soco ra Jesús nanyehe ra chi ñu ta catyí ra:

—Tyicuan caa cucuvi. Vatyí nyaá nu tutu Nyoo ta catyí chi tuhin tyehé caa:

Yuu cha ña cuñí ra casavahá vehe cotyiño ra,

Ican cuan cuví yuu cha niñi ca.

¹⁸ Tari tahnú noo ra cha canacava siqui yuu, tyicuan caa tiví ñu ña cuñí quichaha tuhun cahín. Ta siñ ri, tari taxin nyihi noo ra cha canacava yuu siqui, tyicuan caa cunaa ñu ña cuñí quichaha tuhun cahín —catyí ra Jesús.

¹⁹ Ta ra cacuví nuu chi tata sutu ta ra casacuahá cuenda ley vehe ñuhu catuví iñi ra vatyí tuhun cha catyí ra Jesús, chi maa ra nañi cuan. Ta cuñí ra catiñ ra chi ra Jesús vatyí cacahñi ra chi ra. Soco ña cachitó maa ra yoso caa. Vatyí yuhví ra chi ñáyivi.

Tuhun cha tyiyahví ñu xuhun chi gobiernu ñuu Roma

(Mt. 22.15-22; Mr. 12.13-17)

²⁰ Tyicuan ta catachi ra chi suhva ra vatyí cunducu nyehe ra chi ra Jesús. Ta casaha ra tyi ra vaha cacuvi ra. Vatyí coto ra ñáá noo tuhun ña vaha cahán ra Jesús tacuhva cuvi catiñ ra chi ra. Ta cuhva cuenda ra chi ra chi gobernador.

²¹ Yucuan chaha candaca tuhun ra casavaha chii cuan chi ra Jesús:

—Maestro, chitó ndi vatyí vaha tuhun cahún. Ta sañahún cha vaha chi ñáyivi. Ta ñima cuhva iyó ri ñu nyehun soco aña ñu ñandihi. Ta maa ri maa ityi Nyoo sañahún.

22 Catyi chi ndi ¿atu vaha cha tyiyahvi yo cha chicán gobiernu ñuu Roma chi yo, o ña vaha?
—catyí ra.

23 Soco ra Jesús tuví iñi ra vatyí cuñí ra nducu nyehe ra chí ra. Ta catyí ra chí ra:

—¿Ñáá tuhun cuñí ndo nducu nyehe ndo chii?

24 Sañaha ndo noo xuhun chiña chii, na nyehi. ¿Yóó chi nuu ta yóó chi sivi nyaá nu xuhun ihya?
—catyí ra.

Tyicuan ta nacahan ra cuan, ta catyí ra:

—Nuu gobiernu, ta sivi ra ñandihí —cacatyí ra.

25 Tyicuan ta catyí ra Jesús:

—Tu tyicuan caa, cuhva ndo xuhun chiña chi ra cuví gobiernu cuan vatyí chí maa ra tahán chí. Ta cuhva tucu ndo chí Nyoo cha tahán chí chí ra
—catyí ra Jesús chí ra.

26 Ta ña cuví maa sandahvi ñaha ra chí ra Jesús chihin tuhun cahán ra nuu ñáyivi. Ta iyo xaan cacuñí ra tuhun cha nacahan ra. Ta taxi ri cuví ra.

*Nu cacuñí ra saduceo sandavi ñaha ra chí ra Jesús
(Mt. 22.23-33; Mr. 12.18-27)*

27 Cha yaha cuan ta chaꝯ coyo suhva ra saduceo nu nyaá ra Jesús. Maa ra cuví ra casañahá vatyí ña nandotó ndiyi.

28 Tyicuan ta catyí ra chí ra Jesús:

—Maestro, sandoꝯ ra Moisés tuhun ihya vatyí tatu noo ra chihí ra ta ndoo ñasihí ra, tatu yori sehe ra chiyo chihin ña, tahán chí cha tandaha yañi ra chihin ña tacuhva cha ma cunaa tata yañi ra.

29 Soco cuñí ndi coto ndi vatyí chiyó ucha tahan ra chihin yañi ra. Ta ra cha ñihi ca chicoo ñasihí ra, soco yori sehe ñu chiyó, ta chihí ra.

30 Tyicuan ta naquehen ra cha cu uvi suri maa ña cuan. Ta yori tucu sehe ñu chiyó. Ta chihí tucu ra cuan.

31 Ta suri tyicuan caa cuví chihin ra cu uñi cuan. Ta suri tyicuan caa cuví chi ndi ucha ra. Ni noo ra ta yori sehe ra chiyó chihin ña.

32 Ta nu ndihi tuhun chihí ndihi maa ña.

33 Ta cuñí ndi coto ndi yóo ra cuví ñasihí chi ña chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

34 Tyicuan ta nacahan ra Jesús, ta catyí ra:

—Ihya ñayiví, rayíi ta ñusihí tandaha ñu.

35 Soco ñu cha tahan chi nandoto inga ñayiví nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha.

36 Ta ñahri tuhun chihi iyó nyicuan. Soco cucuvi ñu tari ángel. Ta cuví ñu sehe Nyoo cha ndicha vaha vatyí nandoto ñu.

37 Cha ndicha cuví vatyí ra Moisés nu sacoto ra tuhun cha cayu taca iñu cuan, yucuan sacoto ra chi yo vatyí ñu chihi nandoto ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra.

38 Vatyí Nyoo ñima Nyoo cuenda ñáyiví chihi cuví ra. Nyoo cuenda ñu nyitó cuví ra. Vatyí cha cuenda Nyoo tandihí yo ta nyitó ñima yo vasi chihí coño ñuhu yo —catyí ra Jesús.

39 Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahun Maestro —catyí ra.

⁴⁰ Yucuan ta ña caña ca maa iñi ra candaca tuhun ra ñáá ca tuhun chi ra Jesús.

Cristo vachi ra tata ra David, ta suri cuví tucu ra Sehe Nyoo

(Mt. 22.41-46; Mr. 12.35-37)

⁴¹ Tyicuan ta ndaca tuhun ra Jesús chi ñu:

—¿Ñáá tuhun cha catyí ndo vatyí ra Cristo tata ra David vachi ra?

⁴²⁻⁴³ Vatyí suri maa ra David catyí ra nu libru Salmo tyehe caa:

Cahán Suti Nyoo chihin Suti ra Cristo, ta catyí ra chi ra:

“Cun^yaa chiyo vahi nyacua nya cuhve chi ra xaan iñi chuun vatyí cuaca chahun siqui ra”,
catyí Nyoo chihin yuhu ra David ta cha naha.

⁴⁴ ¿Yoso caa cha ra vachi tata ra David cuví chi ra Cristo, ta suri maa ra David catyí vatyí Sutu ra cuví chi ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr. 12.38-40; Lc. 11.37-54)

⁴⁵ Tandihí ñáyivi cachiñí ñu tuhun cahán ra Jesús chihin ra cachicá noo chihin ra nu catyí ra tyehe caa:

⁴⁶ —Saha ndo cuenda chi ndo chihin ra casacuahá ley vehe ñuhu. Tahán xaan iñi ra cuihno ra sahma cañi. Ta cuñí ra vatyí saha ndo ñáyivi chi ra nuyahvi ta cuhva ndo nocumi chi ra. Ta nanducú ra tyayu vaha cun^yaa ra chichi vehe ñuhu ta nu cuahan ra vico.

⁴⁷ Ta naha chicán tahvi ra chi Nyoo nu tuvi, cha cuñi ra cha catyi ñáyivi tyi vaha ñáyivi cuví ra. Soco suri maa ra tinyaá ra vehe ñu ndahvi cha chihí yii vatyi ña cuví tyiyahvi ñu xuhun cha tavá ra siqui ñu. Yucuan chaha ñihi ca cutachi tuñi Nyoo chi ra —catyí ra Jesús.

21

*Noo ofrenda cha chaha noo ñaha sihi cha chihí yii
(Mr. 12.41-44)*

¹ Ta nyehe ra Jesús vatyi cuaha xaan ñu tyayii catyihí ra xuhun chichi caja cha nanyaá chichi vehe ñuhu cahnu.

² Ta nyehe tucu ra noo ñaha ndahvi cha chihí yii. Ta tyihí ña uvi tahan ri xuhun cuatyí.

³ Ta catyí ra Jesús:

—Cha ndicha catyí chi ndo vatyi nuu Nyoo cuaha ca tyihí ñaha ndahvi ihya ta ñima ca tandihi ñu tyayii cuan.

⁴ Vatyi cha ndoó ri siqui chi ñu catyihí ñu. Soco ñaha ihya tyihí ña tandihi cha iyó chí ña —catyí ra.

*Nu catyí ra Jesús vatyi cucani ñáyivi vehe ñuhu
cahnu
(Mt. 24.1-2; Mr. 13.1-2)*

⁵ Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyi tyaqui xaan yuu. Tyaqui xaan tacaá cha chaha ñáyivi. Tyicuan ta quichaha catyí ra Jesús:

⁶ —Coo quivi ta tandihi cha nyehé ndo ihya cutani. Ni noo yuu ta ma coso ca siqui tahan. Vatyi cusanacoyo ra xaan iñi chi ndo.

Ñáá ndihí seña cha cucuvi cha ni cumañi ca naa ñáyiví

(Mt. 24.3-28; Mr. 13.3-23)

⁷Tyicuan ta quichaha candaca tuhun ra chi ra Jesús, ta catyí ra:

—Maestro, ¿ama cucuvi tandihí tuhun cahun ihya? ¿Yoso caa ta coto ndi tatu cha cuyatyin cha naa ñáyiví? —cacatyí ra.

⁸Tyicuan ta catyí ra Jesús:

—Saha vaha ndo cuenda, coto sandavi ñaha ra chi ndo. Vatyí cuaha xaan ra cuquichi, ta cucotyíño ra sivi, ta cucatyí ra: “Yuhu cuví Cristo ra cha saquichí Nyoo chi. Cha cuñí cunaa ñáyiví”, cucatyí ra. Soco ma cunyicon ndo chi ra. Ta ma chino iñi ndo chi ra.

⁹Ta quívi ñihí ndo tuhun tyí iyó cuatyí ta cañí tahan ñáyiví, ma nayuhvi ndo. Vatyí tandihí cuan cutahan chí cuví xihna ca. Soco cumañi ca chaa quívi cha naa ñáyiví.

¹⁰Ta catyí tucu ra:

—Ñáyiví iyó noo ñuu cucañi tahan ñu chihin ñáyiví inga ñuu. Ta cucoo cuatyí.

¹¹Ta cutaan nahnu. Ta cucoo tama. Ta cucoo cuehe tandihí rí ityí. Ta cunyehe ñáyiví cuaha xaan cha yuhví andívi. Cuaha xaan seña nahnu cha ña tuhvá ñu nyehe cunyehe ñu.

¹²Soco cha cumañi ca cuví ihya, cutasí iñi ñáyiví chí ndo. Ta cucacan ñu cuatyí chaha ndo. Vatyí cucutuñi chí ndo ta cucuhva cuenda ñu chí ndo chí tata sutu. Ta cutyíhi ñu chí ndo chichí vehe caa. Ta cunyaca ñu chí ndo nuu rey ta nuu ra cacuví tyíño cha catyí yuhu.

¹³Tyicuan ta cuví cahan ndo tuhin chihin ñu.

14 Soco saha ndo cuenda ta ma caca xiñi ndo ñáá tuhun cunacahan ndo chihin ra cuví tyiño cuan.

15 Vatyí yuhu cucuhve tuhun cunacahan ndo. Ta cucuhve cha chiñi tuñi xiñi ndo. Vatyí ni noo ra xaan iñi chi ndo ta ma cuvi chasaha ra chi ndo chihin tuhun cahán ra.

16 Soco ñáyívi cunacuhva cuenda ñu chi ndo nuu ñu xaan iñi chi ndo. Nyacua nya sutu ndo ta sihi ndo, yañi ndo, tahan ndo, ta ra tahan ndo cunacuhva cuenda ra chi ndo chi ñu xaan iñi chi ndo. Ta yihí nyoho cucahñi ñu chi ndo.

17 Tandihí ñáyívi ta cutasi cuñí ñu nyehe ñu chi ndo cha catyi yuhu.

18 Soco ni noo ixi xiñi ndo ta ma cunaa.

19 Tatu ma ndu uvi iñi ndo chii, cucacu añima ndo.

20 Quívi nyehe ndo vatyí nicachico yuhu ñuu Jerusalén ihya nyicú sindaro, coto ndo vatyí cha cuñi chaa quívi cha sanaa ra ñuu ihya.

21 Ta ñáyívi cha nyicú ityi Judea, na cono ñu ta na tixehe nuu ñu ityi yucu. Ta ñu nyicú ñuu Jerusalén ihya, na quita ñu. Ta ñu nyicú nu chiqui, ma ndichi ñu ñuu ihya.

22 Vatyí yucuan quívi cutachi tuñi Nyoo chi ñáyívi ñuu ihya. Vatyí cuchino cava tandihí cuhva catyí maa nu tutu Nyoo.

23 Ta ndahvi ñusihí cha ñohó sehe quívi cuan. Ta ndahvi ñu cha iyó cha lee sehe cha ni chaxín ca. Vatyí cuaha xaan tindoho cunyehe ñu ta tandihí ñáyívi. Vatyí cuxaan xaan Nyoo chihin ñáyívi ñuu Jerusalén ihya.

24 Sindaro cucahñi ra chi suhva ñáyívi chihin mityi ra. Ta suhva ñu cutin ra ta cunyaca ra chi

ñu vehe caa inga ñuu. Ta ñáyiví cha ñima ñu Israel cuví, cucuaca chaha ñu Jerusalén nyacua nya quiví cha catyí maa Nyoo.

Yoso caa cuquichi Rayi cha quichi nya gloria inga chaha

(Mt. 24.29-35, 42-44; Mr. 13.24-37)

²⁵ Tyicuan ta cuaha cha iyo cunyehe ñáyiví nu ñanyii, ta nu yoo, ta nu tiño. Ta ihya siqui ñuhu ñayiví cunayuhvi ñáyiví chihin cha iyo cunacatyin tyañuhu.

²⁶ Ta cucoña ñu chihin cha yuhví ñu cha chicá xiñi ñu ñáá ndihí cha cua cuví ihya siqui ñuhu ñayiví. Vatyí nyacua nya cha iyó andiví cunacanda.

²⁷ Tyicuan ta cunyehe ñu chi yuhu Rayi cha quichí nya gloria vachi chichi noo vico tyaqui chihin tunyee iñi Nyoo, ta chihin cha cahnu cuví ra.

²⁸ Ta cuhva cha quichaha tuhun ihya, sanduní ndo iñi ndo ta cusí cuñi ndo vatyí numi xaan ta cucacu ndo —catyí ra.

²⁹ Tyicuan ta chaha ra Jesús noo cuhva ihya, ta catyí ra:

—Saha ndo cuenda noo yutun cha nañí higuera, o ñáá nonga yutun.

³⁰ Tatu cha cua cuyatyin cha coon savi cha nduyutya numa tun.

³¹ Ta tyicuan caa tucu nyoho, tatu cha nyehe ndo vatyí cha quichaha tandihí tuhun cha catyí chi ndo, coto ndo vatyí cha cuyatyin quiví cha cunyaca ñaha Nyoo siqui ñuhu ñayiví ihya.

³² Soco catyí chi ndo vatyí tuhun ihya cucuvi cha ni ri ca cha iyó ñáyiví.

³³ Ta coo quiví cucunaa andiví ta ñuhu ñayiví, soco tuhun cahán yuhu, tyicuan ri cucuvi tari cuhva catyí.

³⁴ Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan iñi ndo tuhun tundoho ñayiví ihya. Ta coto sana iñi ndo ta chaa quiví quichi yuhu ta quichi tundoho siqui ndo.

³⁵ Vatyí tyicuan caa cucuvi chi tandihí ñáyiví iyó siqui ñuhu ñayiví. Sana iñi ñu ta tari noo cha cua nacasi Nyoo nu ñohó ñu ta ma cuvi quita ñu.

³⁶ Soco nyoho cuatu tuhva ri ndo. Çacan tahvi ndo chi Nyoo tandihí quiví, tacuhva tyinyee ra chi ndo. Ta ma cunaa ndo quiví cuan, tacuhva cuvi chaa vaha ndo nuu yuhu Rayíi cha quichi nya gloria —catyí ra Jesús.

³⁷ Ta cha ñucahñu sañahá ra Jesús chi tandihí ñáyiví chichi vehe ñuhu cahnu. Ta cha cha cuaa chahán ra yucu Olivo.

³⁸ Ta tandihí ñáyiví chaa coyo ñu chichi vehe ñuhu cahnu ndihí ñaha ri. Vatyí cuiñi ñu tuhun cahán ra.

22

*Nu cua xico ra Judas Iscariote chi ra Jesús
(Mt. 26.1-5, 14-16; Mr. 14.1-2, 10-11; Jn. 11.45-53)*

¹ Ta cha nyañaa yatyin quiví cha coo vico pascua vico nu tuhva ñu chachi pan cha ñahri yuchan iya yihí chihin.

² Ta ra cacuví nuu chi tata sutu chihin ra casacuahá cuenda ley vehe ñuhu, nducú xaan ra cuhva yoso caa ta cacahñi ra chi ra Jesús. Soco cayuhví ra chi ñáyiví.

³ Tyicuan ta quihvi cuihna chi ra Judas cha catyí ñáyivi Iscariote chi. Ta maa ra cuvi noo ra cha uchi uvi tahan ra cha nacachi ra Jesús.

⁴ Ta ra cuan, chahan ra chi cahan ra chihin ra cuví nuu chi tata sutu, ta chihin ra cuví nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús.

⁵ Ta ra cuan sii xaan cacuví chi ra. Ta tyaa ra cuhva vatyí cuhva ra xuhun chi ra Judas.

⁶ Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñáyivi nyicú chihin ra.

Nu cuxiñi ra Jesús chihin ra cachicá noo chihin ra (Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ta chaa quivi cha cuví vico nu chachí ñu pan cha ñahri yuchan iya yihí. Ta suri quivi cuan tuhvá ñu chahñi ñu noo mbee luhlu cha vico pascua cuan. Vatyí cachi ñu chi ti.

⁸ Ta ra Jesús tachí ra chi ra Pedro chihin ra Juan, ta catyí ra chi ra:

—Cuahan ndo cua sanduvaha ndo mbee cha cuxiñi yo —catyí ra.

⁹ Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñi yo? —cacatyí ra.

¹⁰ Tyicuan ta catyí ra Jesús chi ra:

—Cuahan ndo chichi ñuu. Ta yucuan cunañihi ndo chi noo ra nyisó noo quiyi ndutya. Ta cuahan ndo chata ra nyacua nya nu quihvi ra chichi vehe.

11 Ta catyi ndo chi chitoho vehe cuan: “Ra Sacuaha, cuñi ra coto ra nya nyaá cuarto nu sanduvaha ra cha cuxiñi ra chihin ra cachicá noo chihin ra, vatyí casanducahnu ra vico pascua.” Tyicuan caa catyi ndo chi ra.

12 Tyicuan ta maa ra cuan cusañaha ra cuarto cahnu ityi siqui nu cu uvi piso chi ndo. Ta cha yahā nduvii. Ta yucuan sanduvaha ndo cha cuxiñi yo —catyi ra chi ra.

13 Tyicuan ta cuahan coyo ra. Ta nañihī ra tandihī tari kuhva catyi ra Jesús. Tyicuan ta casanduvahā ra cha cuxiñi ra cha vico pascua cuan.

14 Yucuan ta cha chaā kuhva cha cuxiñi ra Jesús ta tandihī apóstol ra, cachicunyicu ra yuhu mesa.

15 Tyicuan ta ra Jesús quichaha catyi ra:
—Cuñi xain cuxiñi in caa ri chihin ndo cuenda vico pascua ihya cha ni ri ca cha cumañi ca cunyehe tundohe ta cúvi.

16 Vatyí nya ri ca ihya cua cachi ta cucúvi. Yucuan ta cachi tiqui soco nya nu nyacá ñaha Nyoo —catyi ra.

17 Tyicuan ta quehen ra noo vasu vinu. Ta nacuhva ra tyiahvi nyoo chi Nyoo, ta sayahā ra chi tandihī ra nyicú chihin ra. Ta quichaha catyi ra:

—Quehen ndo ihya. Ta coho ndo suhva suhva.

18 Vatyí catyi chi ndo vatyí ma coho que vinu tichaha ndivi nyacua nya quichi cha nyacá ñaha Nyoo ñayivi ihya —catyi ra.

19 Ta yahā cuan ta quehen ra pan. Ta nacuhva ra tyahvi nyoo chi Nyoo. Ta tahvi sava ra. Ta chahā ra chi ra cachicá noo chihin ra. Ta quichaha catyi ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri ñicohon iñi ndo chii ta cuxiñi ndo tyehe caa —catyí ra.

²⁰ Ta cha yahá cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chihin ihya natyihí tahan Nyoo tuhun chaa chihin ndo vityin. Vatyí vinu cha yihí chichi vaso ihya, tari ñiñi cuví. Ta cha catyí nyoho ta cucati ñiñi. Vatyí cucúvi cha catyí ndo.

²¹ Soco vityin, ra cha cua nacuhva cuenda chii chi ra xaan iñi chii, ñin ri yoso ndaha ra chihin ndahi nu mesa ihya.

²² Vatyí yuhu Rayi cha quichi nya gloria cua cuvi chii tari cuhva cha nyaá maa tyi cuvi chii. Soco ñndahvi ra ndahvi, ra cha cunacuhva cuenda chii! —catyí ra Jesús.

²³ Tyicuan ta ra cachicá noo chihin ra Jesús quichaha candaca tuhun ra chi tahan ra, nya ra cuví ra cua nacuhva cuenda chi ra chi ra xaan iñi chi ra.

Nu candatuhún ra cachicá noo chihin ra Jesús yóo ra cahnu ca cuví

²⁴ Yahá cuan ta quichaha candatuhun ra cachicá noo chihin ra Jesús nya ra cahnu ca cuví.

²⁵ Soco ra Jesús catyí ra:

—Chitó nyoho vatyí ra nyacá ñaha chi ñáyivi iyó siqui ñuhu ñayivi, ñihi xaan yosó ra siqui ñu. Ta cacuñi ra vatyí catyí ñáyivi tyi tyinyee ra chi ñu.

²⁶ Soco nyoho ña tahán chi sacuvi ndo tari sacuví ra cuan. Vatyí tatu cuñi ndo cuvi ndo ra cuví nuu, tahán chi sacuvi ndo tyiño nuu ñáyivi.

Vatyi tatu sacuví ndo tyiño nuu ñáyiví, ican ndo cuví ra cuví nuu.

²⁷ Vatyi ihya siqui ñuhu ñayiví ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuví ra tyiño nuu ra. Soco yuhu ra cuví nuu cuví, ta sacuví tyiño nuu ndo.

²⁸ Soco nyoho tyicuan ri ndihí ndo chihin, tandihí chaha cha nyehí tundoho.

²⁹ Yucuan chaha, yuhu चाहí noo nu cunyaca ñaha ndo tari cha chaha Suti chii cha cunyaca ñahi.

³⁰ Vatyi cucachi ndo cucho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaqui. Ta cunyaca ñaha ndo chi ndi uchi uvi tahan ityi ñáyiví vachi tata ra Israel.

Catýí ra Jesús vatyi cua catýí ra Pedro vatyi ña ñohó nuu ra chi ra
(Mt. 26.31-35; Mr. 14.27-31; Jn. 13.36-38)

³¹ Tyicuan ta catýí ra Jesús chi ra Pedro:

—Nyehe vahun, yoho Simón. Vatyi cuihna, ra nañí Satanás, cha chican ra chi Nyoo na cuhva ra ityi chi ra vatyi quisí ñihno ra chi ndo tari naquisi ñihno yo trigu, tacuhva ndu uvi iñi ndo chi Nyoo.

³² Soco chicán xain chi Nyoo cha catyun, vatyi ma ndihí cha chinó iñun chi ra. Ta quiví ndu uvi iñun cuatyun ta na chino vaha iñun chii cutyinyeun chi ra tahun cha ma sandihí ra cha cachino iñi ra chii —catýí ra Jesús chi ra Simón.

³³ Ta ra Simón catýí ra chi ra:

—Sutu Mañi yuhu, cha iyó vahi vatyi cuhin chuhun vasi vehe caa, vasi tuhun chihi —catýí ra.

³⁴ Tyicuan ta catýí ra Jesús chi ra:

—Pedro, catyí chuun vatyí vityin cha ñi ri ca cha cumañi ca cuacu chaa loho, yoho cha uñi tahan chaha cucatyun vatyí ña ñohó nuun chii —catyí ra Jesús chi ra.

Nu cha cuñí chaa cuhva cha cunacuhva cuenda ra Judas chi ra Jesús

³⁵ Tyicuan ta ndaca tuhun ra Jesús chi ra cachicá noo chihin ra, ta catyí ra:

—Ñicohon iñi ndo qui_vi cha tach_i chi ndo vatyí cucahan noo ndo nuu ñáy_vi ta ñahri nyiso_o ndo, ñi ri cha cachi ndo, ñi ri xuhun, ñi ri sahma ndo. ¿Atu chiyo_o cha cumañi chi ndo qui_vi cuan? —catyí ra Jesús.

Tyicuan ta canacahan ra, ta catyí ra:

—Ñahri cha cumañi chi ndi.

³⁶ Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó xuhun ndo, cu_iso ndo. Ta tatu ñahri mityi ndo, x_ico ndo noo sahma ndo ta sa_ta ndo.

³⁷ Vatyí catyí chi ndo, vatyí tand_ihi tuhun cha nyaá nu tutu Nyoo cuchino cava vatyí tyehe caa catyí chi: “Sahá ñu tuhun tyi cuv_i ra noo ra quiñi iyó.” Tyicuan caa catyí tuhun nu tutu Nyoo. Ta tand_ihi cuan cuchino cava —catyí ra.

³⁸ Tyicuan ta quichaha catyí ra cachicá noo chihin ra:

—Ihya nyaá uvi tahan mityi —catyí ra.

Tyicuan ta catyí ra Jesús:

—Cha iyó vaha ri —catyí ra.

Nu chican tahvi ra Jesús chi Nyoo Getsemaní (Mt. 26.36-46; Mr. 14.32-42)

³⁹ Tyicuan ta quita ra Jesús vehe cuan. Ta cuahan ra nya yucu Olivo. Tari cuhva tuhvá maa ra chahan. Ta ra cachicá noo chihin ra cuahan coyo ra chata ra.

⁴⁰ Ta cuhva cha chaa ra yucuan, quichaha catyi ra chi ra cachicá noo chihin ra:

—Çacan tahvi ndo chi Nyoo tacuhva ma cuvi chasaha cuihna chi ndo.

⁴¹ Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuiñi chi ra. Ta quichaha cahan ra chihin Nyoo,

⁴² ta catyí ra:

—Sutu Mañi yuhu, tu yoho ta cuñún, cuhva cha ma nyehi tundoho ihya. Soco ma cuvi tari cuhva cha cuñí mai. Soco na cuvi tari cuhva cha cuñí maun —catyí ra.

⁴³ Tyicuan ta tuví noo ángel, vatyí cuhva ca ra tunyee iñi chi ra.

⁴⁴ Ta cha ni ri ca cha nyehé xaan ra Jesús tundoho vatyí cuihya vavaha iñi ra, ta ñihi ca chicán tahvi ra chi Nyoo. Ta cuaha xaan tyeen ra quitá ta canacoyó nu ñuhú, ta tari caa niñi caa.

⁴⁵ Yucuan ta nducuita ra cha ndihí cahan ra chihin Nyoo. Ta cuanu hu ra nu canyicu tandihí ra cachicá noo chihin ra. Ta nyehe ra vatyí caquixí ra, cha cuenda vatyí cacuihya xaan iñi ra, ña cacunyeē ra ñumahna ta caquixi ra.

⁴⁶ Tyicuan ta quichaha catyi ra Jesús chi ra:

—¿Ñáá tuhun cha caquixí ndo? Nducuita ndo. Ta çacan tahvi ndo chi Nyoo, tacuhva cha ma cuvi chasaha cuihna chi ndo.

*Nu chaha cuenda ra Judas chi ra Jesús chi ra xaan
iñi chi ra*
(Mt. 26.47-56; Mr. 14.43-50; Jn. 18.2-11)

⁴⁷ Ni cahán ca ra Jesús tuhun ihya, ta cuaha xaan ra cachaa coyo. Ta ityi nuu vachi ra Judas, noo ra chicá noo chihin ra Jesús cuví ra. Ta tuhva ra chi ra Jesús vatyí cua tyayuhu ra xitín ra.

⁴⁸ Tyicuan ta catyí ra Jesús chi ra:

—Judas, ¿atu chihin cha cua tyayuhun chii, nacuhvá cuendon chi yuhu, Rayii cha quichi nya gloria, chi ra xaan iñi chii? —catyí ra Jesús.

⁴⁹ Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityi? —catyí ra.

⁵⁰ Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

⁵¹ Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha.

⁵² Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catiín ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo?

⁵³ Ndiquivi chinyaí chichi vehe ñuhu cahnu, ¿ñaá tuhun ña cuví tñn ndo chii? Soco vityin chaa

cuhva cha ñaa iñi vatyí ra ña vaha nyacá ñaha.
Yucuan chaha vachi t̃in ndo chii.

*Nu catyí ra Pedro vatyí ña ñohó nuu ra chi ra Jesús
(Mt. 26.57-58, 69-75; Mr. 14.53-54, 66-72; Jn.
18.12-18, 25-27)*

⁵⁴ Tyicuan ta cat̃in ra chi ra Jesús. Ta cua nyaca ra chi ra nya vehe ra cuví nuu chi tata sutu. Ta ra Pedro nyasava ri cuahan ra chata ra.

⁵⁵ Ta cha chaḡ coyo ra vehe ra cuví nuu chi tata sutu cuan, casanatahan ra ñuhḡ nuquehe. Ta chicunyicú cutya ra ñicachico ri nu cayú ñuhḡ cuan. Ta chicunyaḡ tucu ra Pedro mahñu ñáyivi cuan.

⁵⁶ Ta cuhva cha ndundichin cha cayu ñuhḡ cuan, tyicuan ta noo ñaha cha cuví musu tata sutu cuan nanyehe ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷ Soco ra Pedro catyí ra:

—Yuhu ña ñohó nui chi ra cuan.

⁵⁸ Tañi ri cuan ta nyehe tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹ Ta cha yahḡ noo ora, ta nanyehe tucu inga ra chi ra ta catyí ra chi ra tahan ra:

—Cha ndicha cuii vatyí ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰ Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahán ca ra Pedro
tuhun cuan, ta chacu chaa ri noo loho.

⁶¹ Tyicuan ta ra Jesús nanyehę ra nuu ra Pedro.
Ta ra Pedro nicohon iñi ra tuhun cha catyi ra
Jesús chi ra: “Cuhva cha ni cumañi ca cuacu chaa
loho, yoho cha catyun tyi ña ñohó nuun chii uñi
tahan chaha.”

⁶² Tyicuan ta quitą ra Pedro ityi chata vehe. Ta
chacu vavaha ra cha cuihya iñi ra.

*Nu cachacú nyaa ra chi ra Jesús ta cacañi ra chi ra
(Mt. 26.67-68; Mr. 14.65)*

⁶³ Tyicuan ta ra casahá cuenda chi ra Jesús,
quichaha chacu nyaa ra chi ra. Ta cacañi ra chi
ra.

⁶⁴ Cachahñi ra sahma nuu ra, ta quichaha
cacatu ra nuu ra. Ta cacatyí ra chi ra:

—Nącoto yóo cha cañi chuun —cacatyí ra chi
ra.

⁶⁵ Ta cuaha vavaha ca cha cacahan ra chi ra.

*Nu ndacá tuhun ra chi ra Jesús tatu Sehe Nyoo cuví
chi ra
(Mt. 26.59-66; Mr. 14.55-64; Jn. 18.19-24)*

⁶⁶ Ta cha cundichin inga quivi cuan. Ta candu
ñin ri ra chahnu ñuu cuan chihin ra cuví nuu chi
tata sutu, ta ra casacuahá cuenda ley vehe ñuhu.
Ta caquehen ra chi ra Jesús. Ta cuahan coyo ra
chihin ra nya nu cuví junta cahnu. Ta quichaha
candaca tuhun ra chi ra:

⁶⁷ —Cątyi chi ndi ąatu ra Cristo ra cha saquichi
Nyoo cuvún? —catyi ra chi ra.

Ta ra Jesús nacahan ra, ta catyi ra:

—Tatu catyi chi ndo vatyi ican, ma chino iñi
ndo.

⁶⁸ O tatu ndaca tuhin ñáá cha ndaca tuhin chi ndo, ma nacahan ndo ni ma saña ndo chii.

⁶⁹ Soco vityin ta ityi nuu ca yuhu Rayi cha quichi nya gloria cucunyai chiyo vaha Nyoo ra cha iyó tandihí tunyee iñi chi —catyí ra.

⁷⁰ Tyicuan ta tandihí ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ican cuví.

⁷¹ Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quita. Ña niñi ca cha tava yo cha ndaa. Vatyí suri maa yo chiñi —cacatyí ra.

23

Nu nyehe ra Pilato vatyí ñahri cuatyí ra Jesús (Mt. 27.1-2, 11-14; Mr. 15.1-5; Jn. 18.28-38)

¹ Tyicuan ta tandihí ra nducuita ra. Ta cua nyaca ra chi ra nya nu nyaá ra Pilato, ra cuví gobernador.

² Tyicuan ta quichaha cacatyí ra chi ra Pilato:

—Ra ihya, sativí ra chi ñáyivi chihin cha cahán ra nuu ñu, ta catyí ra vatyí ña vaha tyiyahvi ndi xuhun chi gobiernu ñuu Roma. Ta sñn ri catyí ra vatyí ra Cristo ra cha saquichi Nyoo vatyí cuví ra rey cuví ra —cacatyí ra.

³ Tyicuan ta ra Pilato quichaha ndaca tuhun ra chi ra Jesús, ta catyí ra:

—¿Atu ican yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ican, suri maun catyí.

⁴ Tyicuan ta quichaha catyí ra Pilato chi ra cuví nuu chi tata sutu ta chi ñáyivi:

—Ñahri cuatyí ra ihya —catyí ra chi ñu.

⁵ Soco xaan ca nanduví ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chaha ra, vatyí cahán ra nuu ñáyivi. Cha xihna ri quichaha cahan noo ra nuu ñáyivi ityi Galilea. Ta nicañi maa ityi vachi ra cahán ra chihin ñáyivi nyacua nya chaḡ ra Judea ihya —catyí ñu.

Nu tachí ra Pilato chi ra Jesús nuu ra Herodes

⁶ Cuhva cha chiñi ra Pilato tuhun ihya, quichaha ndaca tuhun ra tatu ra Galilea cuví ra Jesús.

⁷ Ta catyí ñáyivi chi ra vatyí ican. Tyicuan ta sacuhun ra Pilato chi ra nya nu nyaá ra Herodes. Vatyí ra Herodes cuví ra gobernador nicañu Galilea. Soco quivi cuan ñohó ra ñuu Jerusalén.

⁸ Ta cuhva cha nanyehe ra Herodes chi ra Jesús, si xaan cuví chi ra. Vatyí cha naha xaan cuñi ra nyehe ra chi ra. Vatyí ñihí ra tuhun vatyí cuaha xaan milagru sacuví ra. Ta cuñi xaan ra nyehe ra noo milagru cha sacuví ra Jesús.

⁹ Ta cuaha xaan tuhun ndaca tuhun ra chi ra. Soco ra Jesús ña nacahan maa ra.

¹⁰ Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyí siqui ra.

¹¹ Tyicuan ta ra Herodes chihin sindaro cuenda ra chacu nyaa ra chi ra. Ta sandihvi noo ra noo

sahma yahvi ta tyaquĩ chi ra, tari cha tuhvá rey ñihnó. Tyicuan ta natachĩ ra Herodes chi ra inga chaha nuu ra Pilato.

¹² Ta quivĩ cuan ra Pilato chihin ra Herodes nduvaha iyó ra chihin tahan ra. Vatyí nu quichi chi, ña cuví canyehe ra chi tahan ra.

*Nu cutuñí chi ra Jesús vatyí cucúvi ra
(Mt. 27.15-26; Mr. 15.6:15; Jn. 18.39—19.16)*

¹³ Tyicuan ta ra Pilato sandu ñn ri ra chi ra cuví nuu chi tata sutu, ta chi ra cuví tyiño, ta chi ñáyivĩ ñandihĩ.

¹⁴ Ta catyí ra chi ñu:

—Nyoho quichĩ nyaca ndo chi ra ihya chii. Ta catyí ndo vatyí sativĩ ra chi ñáyivĩ. Soco yuhu cha sacutuñĩ chi ra nuu ndo. Ta ñahri cuatyí ra nañihĩ tari cuhva catyí ndo.

¹⁵ Ta ni ri ra Herodes ña nañihĩ ra ni noo cuatyí ra. Yucuan chaha sandichĩ ra chi ra inga chaha nu nyai. Nyehe ndo vatyí ñahri cha sacuví ra, ñahri cuatyí ra. Ta ña tahán chi cha cúvi ra.

¹⁶ Yucuan chaha cua tachi tuñi ri chi ra. Yaha cuan ta sañe chi ra —catyí ra Pilato.

¹⁷ Tyicuan caa catyí ra Pilato vatyí cha ni ri ca cha iyó vico cuan, tahán chi cha saña ra noo ra ñohó vehe caa, tari cuhva cha tuhva maa ra.

¹⁸ Soco tandihĩ ñu ñn ri nacanachaa ñu, ta catyí ñu:

—Cahñi chi ra Jesús. Ta saña chi ra Barrabás —catyí ñu.

¹⁹ Ta ra Barrabás cuan ñohó ra vehe caa cha cuenda cha cuñí ra nacanda ra siquĩ ra cuví tyiño. Ta siñ ri chahñi ra chi ñáyivĩ.

²⁰ Ta ra Pilato cuñí ra saña ra chi ra Jesús. Ta quichaha catyí ra chi ñáyivi cuan inga chaha vatyí cusaña ra chi ra.

²¹ Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

²² Tyicuan ta cha cu uñi chaha catyí ra Pilato chi ñu:

—Soco ¿ñaá cha ña vaha sacuvi ra ihya? Nyehi tyi ña tahán chi cúvi ra. Tacuhva cutachi tuñi ri chi ra, ta sañe chi ra —catyí ra Pilato.

²³ Soco ñáyivi caná chaa ca ñu, ta catyí ñu vatyí tyaa ra chi ra nu cruzi. Ta cuví chasaha ñu. Vatyí maa ñu ta ra cacuví nuu chi tata sutu caná chaa ñu.

²⁴ Tyicuan ta sacuvi ra Pilato tari cuhva catyí ñu.

²⁵ Ta tari cuhva catyí ñáyivi, saña ra chi ra Barrabás cha ñohó vehe caa cha cuenda cha cuñí ra nacanda ra siqui ra cuví tyiño ta cha cuenda cha chahñi ra. Ta sacuvi ra chi ra Jesús tari cuhva catyí ñu.

*Nu cua cunyaa ra Jesús nu cruzi
(Mt. 27.32-44; Mr. 15.21-32; Jn. 19.17-27)*

²⁶ Yucuan ta quehen sindaro chi ra Jesús. Ta cuahan ra chihín ra. Ta catiñ tucu ra chi noo ra Cirene cha nañi Simón. Ra cuan ni cua ndichi ra cha chahan ra nu chiqui. Ta saniñi sindaro chi ra, na cuiso ra cruzi ra Jesús ta cuahan ra chata ra.

²⁷ Ta cuaha xaan ñáyivi cuahan chata ra. Ta cuaha xaan ñusihi chacú chaa ñu cha cuihya iñi ñu cha catyí ra.

²⁸ Soco ra Jesús nanyehé ra chi ñu. Ta quichaha catyí ra chi ñu:

—Tandihí nyoho ñusihí ñuu Jerusalén, ma cuacu ndo cha catyi yuhu. Cuacu ndo, soco cha catyi maa ndo ta cha catyi sehe ndo.

²⁹ Vatyí cuquichi quívi nu cunyehe xaan ndo tundo. Ta cucahan ñáyivi chihin tandihí ndo cha cuví ndo ñusihí cha yori sehe ndo iyó. Ta cucatyí ñu chi ndo: “Vaha xaan vatyí yori sehe ndo iyó vatyí cuaha xaan tundo nyehé yo vityin”, cucatyí ñu chi ndo.

³⁰ Vatyí quívi cuan cucuñí ñu vatyí na canacoyo yucu síqui ñu tacuhva sahvi chí chí ñu.

³¹ Vatyí tatu tyehe caa sacuvi ñu chihin yuhu cha ñahri cuatyí. Yaha ca cuhva cunyacuvi tucu ñu chihin maa ndo cha iyó cuatyí ndo —catyí ra Jesús.

³² Ta quehen tucu sindaro cuan chí uvi tahan ra quiñi iyó, vatyí cahñi ra chí ra ñin ri chihin ra Jesús.

³³ Tyicuan ta cachaa ra noo nu nañi Nu Cuví Yiqui Xiñi Ndiyí. Ta yucuan chicatacaa ra chí ra Jesús nu cruzi. Ta tyicuan caa tucu chinyacuví ra chihin ninduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra.

³⁴ Ta cuhva cha tacaá ra Jesús nu cruzi cuan, quichaha catyi ra:

—Sutu Mañi yuhu, saha tucahnu iñi chí ra. Vatyí ña chitó ra ñáá cha nyacuví ra chihin —catyí ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan.

³⁵ Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyí ra:

—Sacacu ra chi inga ñáyivi. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyí ra.

³⁶ Ta suri cahán cuehe tucu sindaro chi ra. Ta catuhva ra chi ra. Ta chaha ra vinu iya coho ra.

³⁷ Ta quichaha cacatyí ra chi ra:

—Tatu rey cuenda ñáyivi Israel cuvún. Sacacu chuun —cacatyí ra.

³⁸ Ta siqui cruzi ityi xiñi ra nyaá noo nu tyaa ra chihin griego, chihin latín, ta chihin hebreo. Tyehe caa quita cahán letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹ Ta noo ra quiñi iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chi ndi ñandihí —catyí ra.

⁴⁰ Soco inga ra cuan catyí ra chi ra:

—¿Atu ña yuhvún chi Nyoo? Vatyí nyehún suri tundoho cha nyehé maa ra vityin.

⁴¹ Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyí ra.

⁴² Tyicuan ta quichaha catyí ra chi ra Jesús:

—Yoho Jesús, ñicohon iñun tuhin quivi cunyaca ñahun —catyí ra.

⁴³ Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu nyaá aña ñu chinó iñi chi Nyoo —catyí ra Jesús chi ra.

*Nu chihí ra Jesús**(Mt. 27.45-56; Mr. 15.33-41; Jn. 19.28-30)*

⁴⁴ Tyicuan ta ñáá cuhva ora quichaha nduñaá ñayiví, nyacua nya caa uñi cha cha ñni.

⁴⁵ Vatyí nduñaá ñanyii. Ta sahma cha tacaá chichi vehe ñuhu cahnu cuan, tahnya sava.

⁴⁶ Tyicuan ta quichaha cana chaa ra Jesús:
—Sutu Mañi yuhu, natyaí añime chichi ndahun —catyí ra.

Ta cuhva cha catyí ra tuhun ihya, ta chihí ra.

⁴⁷ Ta ra cuví nuu chi sindaro cuan, nyehe ra tandihí cha cuví cuan. Ta sacahnú ra chi Nyoo, ta catyí ra:

—Ñahri ndicha cuii cuatyí ra iyó —catyí ra.

⁴⁸ Ta tandihí ñáyiví cha canyicú yucuan canyehe ñu cha cuví cuan. Ta cuahan coyo ñu ta suri cacañi ñu ndaha ñu yiquí nyica ñu. Vatyí chitó ñu vatyí ña vaha cha chinyacuví ñu chihin ra Jesús.

⁴⁹ Ta tandihí ñu cha ñohó nuu chi ra Jesús, ta ñusihí cha chinyicon chi ra nya Galilea, canyicú ñu nya sava ri. Ta nyehe ñu tandihí cha cuví yucuan.

*Nu cua cuchi ra chi ra Jesús**(Mt. 27.57-61; Mr. 15.42-47; Jn. 19.38-42)*

⁵⁰ Ta iyó noo ra vaha, nañi ra José. Ta Arimatea ityi Judea cuví ñuu ra. Ta cuví ra noo ra cuví nuu cuenda Junta Cahnu ñu Israel.

⁵¹ Ta ra José cuan nyatú ra quiví cha cunyaca ñaha Nyoo. Ta ña ndoo ra vaha chihin cha sacuví ra tahan ra, ra cacuví nuu cuenda tata sutu cuan.

⁵² Tyicuan ta chahan ra chicacan ra coño ñuhu ra Jesús chi ra Pilato.

⁵³ Ta yaha cha sanoo ra José cuan coño ñuhu ra Jesús nu cruzi, ta natyihí ra chichi noo sahma cha cuví lino. Ta cuahan ra cua cuchi ra chi ra chichi noo ñaña chaa cha cuví yavi yuu cha savaha ñu.

⁵⁴ Ta viarni cuví, quiví cha sanduvahá ñáyiví cha cachi ñu cha sabaru inga quiví, quiví nyitatu ñu. Ta cha cuñí cuví sabaru.

⁵⁵ Ta tandihí ñusihí cha quichi chihin ra Jesús nya Galilea, cuahan ñu chata ra. Ta nyehe ñu chichi yavi yuu cuan. Ta nyehe ñu yoso caa chicava coño ñuhu ra.

⁵⁶ Ta cuanuhu coyo ñu nya vehe ñu. Ta sanduvaha ñu ndutya vixi chahán vatyi cutyihí ñu coño ñuhu ra Jesús coto coo xico. Vatyi tyicuan caa cuví costumbre cuiya cuan. Tyicuan ta nyitatu ñu inga quiví cuan tari cuhva catyí maa tuhun cha tachí Nyoo chi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Cundichin timingu quiví nu quichaha vitya. Ta ñaha cuiri cuahan coyo ñusihí cuan nya nu ñaña ra Jesús. Ta nyisó ñu ndutya vixi chahán cha sanduvaha ñu.

² Ta cuhva cha chaá coyo ñu, nanyehe ñu vatyi ña nyasí ca yavi yuu cuan tari cuhva chinyasí maa.

³ Ta quihví ñu chichi, soco ña nañihí ñu coño ñuhu Sutu Mañi yo Jesús.

4 Ta yucuan tayucú ñu chihin cha yuhví ñu. Ta ña chitó ñu ñáá cunyacuvi ñu. Ta tuví uvi tahan rayíi nuu ñu. Ta xiño vavaha sahma cañihnó ra.

5 Ta chihin cha yuhví ñu, ta chicuiñi chiti ñu chihin nuu ñu nya nu ñuhú. Tyicuan ta quichaha cacatyí ra cuan chi ñu:

—¿Ñáá tuhun nanducú ndo chi ra Jesús ihya nu ñohó ndiyi?

6 Yori ra ñohó ihya, vatyí cha nandoto ra. Nicohon iñi ndo tuhun cha cahán ra chihin ndo quivi chicá noo ra Galilea.

7 Catyi ra vatyí tahan chi cucuhva cuenda ñu chi ra ndaha ra iyó cuatyí. Vatyí cuví ra Rayíi cha quichi nya gloria. Ta tahan chi cucahñi ra chi ra nu cruzi. Soco nu cu uñi quivi cunandoto ra. Tyicuan caa catyi ra chi ndo —catyí ángel cuan chi ñu.

8 Tyicuan ta nicohon iñi ñu tuhun cahán ra Jesús quivi cuan.

9 Ta cuanuhu coyo ñu. Ta nacatyí ñu chi ndi uchi in tahan ra apóstol ra Jesús chihin tandihí ca ñáyivi.

10 Ta ñu sacoto tuhun cuan chi ra cuan cuví ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusihi.

11 Soco ra cachica noo chihin ra Jesús cuñi maa ra vatyí cahán ri maa ñu. Ta ña chinó iñi ra tuhun cahán ñu.

12 Soco ra Pedro nducuita ra ta chingo vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehe ra chichi yavi yuu cuan tyi sahma ri cayucú inchiyo xiin. Tyicuan ta

cuanuhu ra nya vehe. Ta iyo cuñí ra vatyí ñahri ca coño ñuhu ra Jesús catuví chichi ñaña cuan.

Noo cha cuvī ityi Emaús
(Mr. 16.12-13)

¹³ Suri maa quiví cuan, uvi tahan ra chicá noo chihin ra Jesús cuahan coyo ra nya ñuu cha nañí Emaús, tari noo cha uchi ñn kilómetro cha quita yo Jerusalén.

¹⁴ Ta cuahan coyo ra ta ndatuhún ra tuhun ñáá ndihí cha cuvī.

¹⁵ Ta cha ñi ri ca cha candatuhún ra, ta ra Jesús natahan ra chi ra nu cuahan coyo ra.

¹⁶ Soco ñi ri maa nyehé ra chi ra Jesús, ña canicohon nuu ra chi ra. Vatyí tari cha iyó noo cha chasi nuu ra tacuhva cha ma canicohon nuu ra chi ra Jesús.

¹⁷ Tyicuan ta quichaha ndacā tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan iñi ndo? —catyí ra chi ra.

¹⁸ Ta ra cha nañí Cleofas, nacañan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuvī ñuu cuan? —catyí ra.

¹⁹ Tyicuan ta catyí ra Jesús chi ra:

—¿Ñáá cha cuvī?

Ta quichaha canacatyí ra chi ra:

—Tuhun ra Jesús ra ñuu Nazaret. Vatyí cuvī ra noo ra profeta Nyoo. Ta chihin tunyee iñi cahnu Nyoo sacuvī ra cha vaha nuu Nyoo ta nuu ñáyiví.

²⁰ Soco ra cacuví nuu chi tata sutu ta ra cacuví nuu cuenda vehe ñuhu, nacuhva cuenda ra chi ra

chi sındaro ñuu Roma. Ta cachahñi ra chi ra. Ta chihj ra nu cruzi.

²¹ Ta cha vityin cha iyó uñi quivi cuvi tuhun cuan. Ta nyuhu cuñi maa ndi vatyí ican ra cuví ra cusacacu chi ñáyivi Israel.

²² Soco vityin iyo xaan cuñi ndi cha nacatyí suhva ñusihí chi ndi. Vatyí maa ñu, ñaha cuií ri chahan coyo ñu nu ñaña ra.

²³ Ta nacatyí ñu chi ndi vatyí ñahri ca coño ñuhu ra catuví. Ta nacatyí ñu vatyí nyehe ñu uvi tahan ángel. Ta catyí ángel cuan chi ñu vatyí ra Jesús nyitó ra.

²⁴ Yahá cuan ta chahan coyo tucu suhva ra tahan ndi nu ñaña. Ta nyehe ra vatyí cha ndicha cuví tari cuhva catyí ñusihí cuan. Vatyí ñahri ca coño ñuhu ra Jesús catuví —catyí ra chi ra.

²⁵ Tyicuan ta ra Jesús catyí ra chi ra:

—Chiin xaan cutuñi ñi ndo. Ta cuee xaan chinó ñi ndo tuhun tyaa ra profeta Nyoo ta cha naha.

²⁶ ¿Atu ña chitó ndo vatyí tahán chi cha cunyehe xihna ra Cristo tundoho? Yaha cuan ta tahán chi cuñihi ra tyiño cha cunyaca ñaha ra —catyí ra Jesús chi ra.

²⁷ Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaa ra Moisés ta cha naha. Ta yahá cuan ta cahan ra tuhun tandihí libru cha tyaa ra profeta Nyoo.

²⁸ Ta cuhva cha chaá ra nya ñuu Emaús cuan nu cuahan coyo ra, ta sahá ra Jesús vatyí cañi ca cuahan ra.

²⁹ Tyicuan ta cacatyí ra chi ra na ndoo ra chihin ra. Ta catyí ra:

—Ndoo chihin ndi vatyí cha cua quee ñanyii
—cacatyí ra.

Tyicuan ta cuahan ra Jesús nya vehe nĩnduvi ra cuan.

³⁰ Ta cuhva cha chicunyaḗ ra yuhu mesa chihin ra, quehen ra pan. Ta chaha ra tyahvi nyoo chi Nyoo. Ta chahnũ sava ra, ta chaha ra chi ra.

³¹ Ta caa cuhva ri cuan nuña nuu ra canicohon nuu ra chi ra Jesús. Soco ra Jesús cuanaa ri ra.

³² Tyicuan ta quichaha catyí ra chi ra tahan ra:

—Yucuan chaha vaha xaan cuñí ññima yo cuhva cha vachi ra chihin yo, ta nacatyí vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyí ra.

³³ Ññari ca cha canyatũ ra, ta cuanuhu coyo ra nya Jerusalén. Ta yucuan nañihĩ ra chi ndi uchi ññ ra chicá noo chihin ra Jesús, canyicú ra.

³⁴ Tyicuan ta quichaha canacatyí ndi uchi ññ tahan ra chi ra cha nichaa coyo cuan:

—Ndicha vatyí Sutu Mañi yo, nandotoḗ ra. Vatyí ra Simón nyehe ra chi ra —cacatyí ra.

³⁵ Tyicuan ta ra cha ni nachaa coyo cuan canacatyí tucu ra yoso caa ndatuhun ra Jesús chihin ra ityí cuahan ra ññuu Emaús, ta yoso caa canicohon nuu ra chi ra nu chahnũ ra pan.

Nu tuvi ra Jesús nu canyicu ra cachicḗ noo chihin ra (Mt. 28.16-20; Mr. 16.14-18; Jn. 20.19-23)

³⁶ Nĩ cahán ca ra tuhun cuan ta tuví ra Jesús nu canyicú ra. Ta chaha ra nocumi, ta catyí ra:

—Na coo cha taxi ri ññima ndo.

³⁷ Tyicuan ta canayuhví xaan ra. Ta cacuñí maa ra vatyí noo tatyí ri cuví.

³⁸ Tyicuan ta catyí ra Jesús chi ra:

—¿Ñáá tuhun cha nayuhvi ndo? ¿Ñáá tuhun cha chicá uvi iñi ndo?

³⁹ Nyehe ndo ndahi. Ta nyehe ndo chahi. Vatyí suri mai cuví. Tñn ndo chii ta coto ndo. Vatyí tatyí, ñahri coño ñuhu. Ta ñahri yiqui tari cha nyehé ndo tyi yihí chi yuhu —catyí ra Jesús.

⁴⁰ Ta cuhva cha catyí ra tuhun ihya, sañahá ra ndaha ra ta chaha ra.

⁴¹ Soco maa ra chaha cha iyo cacuñí ra ta sii cacuñí ra nyacua ña chinó vaha iñi ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴² Tyicuan ta chaha ra chiin yuhu tiyaca tyihyo chihin tyañuñu chi ra.

⁴³ Ta quehen ra. Ta quichaha chachi ra.

⁴⁴ Ta catyí ra chi ra:

—Tandihí cha cuví chii, ican ihya cuví cha catyí chi ndo quivi cuan. Ta catyí chi ndo vatyí tyicuan caa cucuvi, tari cuhva nyaá tuhun cha tyaa ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵ Tyicuan ta chaha ra Jesús vatyí na cutuñi iñi tandihí ra cuan yoso caa catyí nu tutu Nyoo.

⁴⁶ Tyicuan ta catyí ra Jesús chi ra vatyí tyicuan caa nyaá nu tutu Nyoo vatyí tahán chi cha cúvi ra Cristo. Ta nu cu uñi quivi nandoto ra.

⁴⁷ Ta tahán chi coto ñáyivi tuhun sivi ra Cristo ñuu Jerusalén, ta yaha cuan ta tandihí ñuu

nicahnu ñuhu ñayivi. Tacuhva cuvi ndu uvi ñi ñu ta ndachi cuatyí ñu.

⁴⁸ —Ta nyoho cuví ndo cha ndaa tandihí tuhun ihya.

⁴⁹ Ta cusaquichi mai Tatyí Ii Nyoo siqui ndo tari catyí Suti tyi cuhva ra chi ndo. Soco cunyicu ndo Jerusalén ihya. Ta ma quita maa ndo nyacua nya quichi tunyee ñi Tatyí Ii Nyoo cuquihí chi ndo —catyí ra Jesús.

Nu nandaq xica ra Jesús andivi

(Mr. 16.19-20)

⁵⁰ Tyicuan ta ra Jesús cuahan ra chihin tandihí ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra.

⁵¹ Ta cha ni ri ca cha nasocó ra chi ra, nandaq xica ra andivi.

⁵² Tyicuan ta tandihí ra sacahnú xaan ra chi ra. Ta sii xaan cacuví chi ra, cuanuhu coyo ra Jerusalén.

⁵³ Ta tyicuan ri chinyicú ra chichi vehe ñuhu cahnu cuan, ta sacahnú xaan ra chi Nyoo.

clix

Tuhun cha sañahá ra Jesucristo chi yo
New Testament in Mixtec, Jamiltepec
(MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

clx

2014-04-30

PDF generated using Haiola and XeLaTeX on 11 Mar 2026 from source
files dated 29 Jan 2022
7411d349-0f34-5963-987e-74457a7bad38